

ରୋମିୟମାନଙ୍କ ନିକଟକୁ ପାଉଲଙ୍କ ପତ୍ର ରୋମିରେନ୍ ବିଶ୍ୱାସୀକତାଃତେ ପ୍ରେରିତ୍ ପାଉଲୁସ୍‌ଆଃ ଚିଟାଉ ପାରିଚାଏ

ରୋମି ଚିଟାଉ ପ୍ରେରିତ୍ ପାଉଲୁସ୍‌ଆଃ ହରାତେ ହବାସାକାଅଆଃ ଖ୍ରୀଷ୍ଟ ତାୟମ୍ ୫୪ ଏତେ ୫୮ କରେ ଅଲ୍ଲୀକାନା । ପାଉଲୁସ୍ ରୋମ୍‌ତେ ସେନଃ ସିଦାରେ ଯିହୁଦୀ ଆତଃ ସାଅଁସାର୍ ବିଶ୍ୱାସୀକକେ ଚିହ୍ନଲଃ ନାଗେନ୍ତେ ନେ ଚିଟାଉ ଅଲ୍ଲୀକାଦ୍ ତାଇକେନାଏ । ସବେନ୍ କିଲିକ ଖ୍ରୀଷ୍ଟକେ ଚିଲ୍ଲକା ବିଶ୍ୱାସୀୟାକ ଆତଃ ମାଇନ୍ ରିକାଇୟାକ, ଏନା ନାଗେନ୍ତେ ଜନିଃ କରନ୍ତି ସାହାରରେ ତାଇନ୍ ଇମ୍‌ତା ରୋମ୍‌ରେନ୍ ଖ୍ରୀଷ୍ଟ ବିଶ୍ୱାସୀ ହାଗା ମିଶିକକେ ନେ ଚିଟାଉ ଅଲ୍ଲୀକାଦ୍‌କଆଏ ।

ସବେନ୍‌କତାଃରେ ଆତଃ ସବେନ୍ ଖ୍ରୀଷ୍ଟ ବିଶ୍ୱାସୀକ ନାଗେନ୍ତେ ରୋମି ପୁଥ୍ ମିଆଁଦ୍ ବୁଗିନ୍ ଚିଟାଉ ତାନାଃ । ଚିୟାଃଚି ଖ୍ରୀଷ୍ଟ ଆବୁକେ ଚିଲ୍ଲକା ପାପ୍‌ରାଃ ତନଲ୍‌ହେତେ ରାଡାବୁଆଏ, ଏନ୍ କାଜିକେ ବୁଗି ଲେକାତେ ସୁକୁକାଜିରେ ଉଦୁବାକାନା । ଚିଟାଉରାଃ ଆଧ୍ୟାୟ ୧:୧୭ ପାଦ୍ ହବାଅଃତାନା ତାଲା ଚାଜି । ଅକ କାଜିଚି ଅଲ୍ଲୀତାନା, ଆଇଙ୍ଗ୍ ସୁକୁକାଜି ନାଗେନ୍ତେ କାଇଙ୍ଗ୍ ଗିହୁଗଃଆ, ଚିୟାଃଚି ନେଆଁ ବିଶ୍ୱାସେତାନ୍ ସବେନ୍‌କଆଃ ନାଗେନ୍ତେ ପେଡ଼େଃ ତାନାଃ । ସିଦାତେଦ୍ ଯିହୁଦୀକଆଃ ନାଗେନ୍ତେ ଏନ୍ ତାୟମ୍‌ତେ ସାଅଁସାର୍ ହଡକଆଃ ନାଗେନ୍ତେ ତାନାଃ ।

ପାହିଲା ହିସାରେ ୧-୧୨ପୁରାଃଗି ଆମ୍‌କି କାଜିକ ଅଲ୍ଲୀକାନା । ଏଟାଃ ହିସାରେ ୧୩-୧୫ ଖ୍ରୀଷ୍ଟକେ ଜୀଦାନରେ ସବେନ୍ ହୁଲାଙ୍ଗ୍ ମାନାତିଙ୍ଗ୍ କାଜିକ ଅଲ୍ଲୀକାନା ।

ପୁଥ୍ ଭିଟାରରେ ତାଇକାନ୍ କାଜି

୧. ପାଉଲୁସ୍ ଆୟାଃ ଆପ୍‌ନାଃ ବିଷାଏରେ ଆତଃ ଅକଏତାଃତେ ନେ ଚିଟାଉ ଅଲ୍ଲେତାନାଏ ଏନାରେୟାଃ ପାରିଚାଏ । ୧:୧-୧୫

- ୨. ମାନଞ୍ଜାରୀ ରାଇଜ୍ ଆଡ଼ଃ ଯୀଶୁ ଖ୍ରୀଷ୍ଟିଆଃ ସୁକୁକାଜି । ୧:୧୭-୧୧:୩୬
- ୩. ସବେନ୍ ଦୁଲାଇଜ୍ ଖ୍ରୀଷ୍ଟିଲଃ ଜୀଦାନ୍ ବିତାଅ ବିଷାଏରେ କାଜି । ୧୨:୧-୧୫:୧୩
- ୪. ରୋମରେନ୍ ବିଶ୍ୱାସୀ ହାଗାକକେ ଜହାର୍ କାଜିତାନ୍ଲଃ ନେ ଚିଟାଉ ଅଲ୍ ଚୁଣ୍ଡୁ ତାନାଏ । ୧୬

ପାଉଲୁସଆଃ ଜହାର୍

୧ ପାଉଲୁସ, ଖ୍ରୀଷ୍ଟି ଯୀଶୁଆଃ ଦାସି ଆଡ଼ଃ ସାଲାକେଦତେ କୁଲକାନ୍ନିଃ ଆଡ଼ଃ ସୁକୁକାଜି ଉଦୁବ୍ ନାଗେନ୍ତେ ପାର୍ମେଶ୍ୱାର୍ତେ କେଡ଼ାକାନ୍ନିଃ ତାନିଃ । ୨ ପାବିତାର୍ ଧାରାମ୍ପୁଅରେ ଅଲକାନ୍ ଲେକା ଏନ୍ ସୁକୁକାଜି ବିଷାଏରେ ପାର୍ମେଶ୍ୱାର୍ ସିଦାରେ ଆୟାଃ ନାବୀକଆଃ ହରାତେ ବାନାର୍ସା ଏମାକାଦ୍ ତାଇକେନାଏ । ୩ ଏନା ହବାଅଃତାନା, ପାର୍ମେଶ୍ୱାର୍ଆଃ ହନ୍, ଆବୁଆଃ ପ୍ରାଭୁ ଯୀଶୁ ଖ୍ରୀଷ୍ଟି ହଡ଼ମ ଲେକାତେ ଦାଉଦଆଃ କିଲିଏତେ ଜାନାମ୍ୟାନା । ୪ ମେନ୍ଦ୍ ଧାର୍ମାନରେନ୍ ପାବିତାର୍ ଆମ୍ବା ବିଷାଏରେ ଗଜାକାନ୍କଏତେ ଜୀଉବିରିଦ୍ୟାନ୍ ହରାତେ ଇନିଃ ପାର୍ମେଶ୍ୱାର୍ଆଃ ହନ୍ ମେନ୍ତେ ପୁରାଃ ପେଡ଼େଃଲଃ ଉଦୁବ୍ୟାନା । ଇନିଃ ଆବୁଆଃ ପ୍ରାଭୁ ଯୀଶୁ ଖ୍ରୀଷ୍ଟି ତାନିଃ । ୫ ଖ୍ରୀଷ୍ଟିଆଃ ନାଗେନ୍ତେ ପାର୍ମେଶ୍ୱାର୍ ଆଇଜ୍କେ ପ୍ରେରିଡ୍ ଲେକା ସାଲାକେଦତେ ସବେନ୍ ହଡ଼କତାଃରେ ଉଦୁବ୍ ନାଗେନ୍ତେ ସାୟାଦ୍ ଏମାକାଦିୟାଏ, ଜେ'ଲେକାଚି ଇନ୍କୁ ଖ୍ରୀଷ୍ଟି ଯୀଶୁତାଃରେ ବିଶ୍ୱାସକେଦତେ ଆୟାଃତାଃରେ ମାନାତିଜ୍କ୍ ହବାଅଃଆ । ୬ ଆପେ ରୋମରେ ତାଇନ୍ତାନ୍ ହଡ଼କ ତାନ୍ପେ, ଆପେକେୟଗି ଯୀଶୁ ଖ୍ରୀଷ୍ଟିଆଃ ହବାଅଃ ନାଗେନ୍ତେ ପାର୍ମେଶ୍ୱାର୍ କେଡ଼ାକାଦ୍ପେୟାଏ । ୭ ପାର୍ମେଶ୍ୱାର୍ ଦୁଲାଇଜ୍ତାନ୍ ରୋମରେନ୍ ହଡ଼କକେ ଆଡ଼ଃ ଆୟାଃ ଆପ୍ନାଃ ପାବିତାର୍ ହଡ଼ ହବାଅଃ ନାଗେନ୍ତେ କେଡ଼ାକାଦ୍କକେ, ଆଇଜ୍ ନେ ଚିଟାଉ ଅଲେତାନାଇଜ୍ । ଆବୁଆଃ ଆପୁ ପାର୍ମେଶ୍ୱାର୍ ଆଡ଼ଃ ପ୍ରାଭୁ ଯୀଶୁ ଖ୍ରୀଷ୍ଟି ଆପେକେ ସାୟାଦ୍ ଆଡ଼ଃ ଜୀଉସୁକୁ ଏମାପେକାଏ ।

ଧାନ୍ୟାବାଦରାଃ ବିନ୍ତି

୮ ଆପେୟାଃ ବିଶ୍ୱାସ୍ ବିଷାଏରେ ଗଟା ଅତେଦିଶ୍ୱମ୍ରେ ଉଦୁବଃତାନା, ଏନାମେନ୍ତେ ପାହିଲାରେ ଆଇଜ୍ ଆପେ ସବେନ୍କ

ନାହିଁ ଯୀଶୁ ଖ୍ରୀଷ୍ଟୁଆଃ ନୁହୁମ୍ଭେ ପାରମେଶ୍ଵରକେ ଧ୍ୟାନବାଦ୍ ଏମାଲତାନାଲକ୍ । ୯ ଆଇକ୍ ଅକ ପାରମେଶ୍ଵରକେ ଆଇଁୟାଃ ମନ୍ସୁରୁଦ୍ଲଃ ସେଞ୍ଜା ତାନାଲକ୍ ଆତଃ ଅକ ପାରମେଶ୍ଵରୁଆଃ ହନ୍ ବିଷାଏରେ ସୁକ୍ଳକାଜିଲକ୍ ଉଦୁବ୍ତାନା, ଏନ୍ ପାରମେଶ୍ଵର ଆଇଁୟାଃ ଗାଞ୍ଜା ତାନିଃ । ୧୦ ସବେନ୍ ଇମ୍ଭା ବିକ୍ତି ତାଇୟାଃରେ ଆପେକେଇକ୍ ପାହାମ୍ପେତାନାଃ ଆତଃ ଆପେତାଃରେ ହିଜୁଃ ନାଗେନ୍ତେ ଆଇକ୍ କେ ନେତା ନାମଃକା ମେନ୍ତେ ପାରମେଶ୍ଵରତାଃରେଇକ୍ ବିକ୍ତିତାନା । ୧୧ ଆପେତାଃରେ ସେଟେରକେଦ୍ରେ ଆଇକ୍ ନାମାକାଦ୍ ଆମ୍ପାରେୟାଃ ଦାନ୍ ବିଷାଏରେ ଆପେକେ ଉଦୁବାପେ ହରାତେ ଆପେୟାଃ ବିଶ୍ଵାସକେ କେଟେଜେୟାଲକ୍ ମେନ୍ତେ ଆଇଁୟାଃ ପୁରାଃଗି ସାନାଲ୍ତାନାଃ । ୧୨ ନେ ହରାତେ ଆରୁ ମିହୁଡ୍, ଆତଃମିହୁଡ୍ରେ ବିଶ୍ଵାସକେ କେଟେଦ୍ ରିକା ଦାଡ୍ଡିୟାଃବୁ ।

୧୩ ✱ହେ ହାଗା ମିଶିକ, ଆଇକ୍ ଆପେତାଃରେ ହିଜୁଃ ନାଗେନ୍ତେ ପୁରାଃଗିଲକ୍ ମନେକେଦା, ମେନ୍ଦ୍ ପୁରାଃ କାଜିକଟକ୍ ହରାତେ ନାହାଁଃ ଜାକେଦ୍ ଆଇକ୍ ଆପେତାଃରେ କାଲକ୍ ସେଟେର ଦାଡ୍ଡିକାନା । ଏଟାଃ ପାରଗାନ୍ରେନ୍ ଗ୍ରୀକ୍ ହଡକଆଃ ଆଲ୍ଲାରେ ଆଇକ୍ ବାଚାନ୍ ଉଦୁବକେଦ୍ରେ ଜୀଉବାଞ୍ଚାଅକ ନାମକେଦ୍ ଲେକା ଆପେୟାଃ ପାରଗାନ୍ରେୟ୍ ଜୀଉବାଞ୍ଚାଅକ ନାମେକା ମେନ୍ତେ ଆଇଁୟାଃ ପୁରାଃ ସାନାଲ୍ । ୧୪ ଚିୟାଃଟି ଗ୍ରୀକ୍ ଦିଶ୍ଵମ୍ରେନ୍ ହଡ୍ ଚାଏ ଏଟାଃ ଦିଶ୍ଵମ୍ରେନ୍ ହଡ୍, ସେଣାନ୍କ ଚାଏ କା ସେଣାନ୍କ, ନେ ସବେନ୍ ହଡକଆଃ ନାଗେନ୍ତେ ଆଇକ୍ ରିଣୀକାନା । ୧୫ ଏନା ନାଗେନ୍ତେ, ଆଇକ୍ ଆପେକେ ଆତଃ ରୋମ୍ରେ ତାଇନ୍ତାନ୍ ହଡକକେୟାଗି ସୁକ୍ଳକାଜି ଉଦୁବ୍ ନାଗେନ୍ତେଇକ୍ ତେତାଲ୍ତାନା ।

ସୁକ୍ଳକାଜିରାଃ ପେଡ଼ଃ

୧୬ ✱ଏନ୍ ସୁକ୍ଳକାଜି ଚେତାନ୍ରେ ଆଇଁୟାଃ ପୁରାଃଗି ଆସ୍ତା ମେନାଃ । ନେଆଁଦ୍ ସିଦାତେ ଯିହୁଦୀକ ନାହିଁ ଏନ୍ ତାୟମ୍ଭେ ଗ୍ରୀକ୍ ବିଶ୍ଵାସୀକଆଃ ଜୀଉବାଞ୍ଚାଅ ନାଗେନ୍ତେ ପାରମେଶ୍ଵରୁଆଃ ପୁରାଃ ପେଡ଼ଃ ମେନାଃ । ୧୭ ହଡକ ପାରମେଶ୍ଵରତାଃରେ ଚିଲ୍ଲକା ଧାରମାନ୍ ହବା ଦାଡ୍ଡିୟାଃଆକ ଏନା ସୁକ୍ଳକାଜିରେ ଉଦୁବାକାନା,

✱ ୧:୧୩ ୧:୧୩ ପ୍ରେରିଡ୍ ୧୯:୨୧. ✱ ୧:୧୭ ୧:୧୭ ମାର୍କ ୮:୩୮.

ମୁନୁଏତେ ଚୁଣ୍ଟୁଜାକେଦ୍ ଜାଉବାସ୍ତାଅ ନାମେରେୟାଃ ମିଆଁଦଗି ହରା ମେନାଃ, ଏନାଦ୍ ବିଶ୍ୱାସ୍ ତାନାଃ । ଧାରାମ୍ପୁଥୁରେ ଅଲ୍ଲାନା, “ଧାର୍ମାନ ହତ୍ତ ବିଶ୍ୱାସ୍ ହରାତେ ବାସ୍ତାଅଃଆ ।”

ପାପ୍ ନାଗେନ୍ତେ ପାର୍ମେଶ୍ୱାର୍ଆଃ ଖୁସ୍

^{୧୮} ଅକନ୍ ଏଡକାନ୍ ହତ୍ତକ ଆକଆଃ ସବେନ୍ ପାପ୍ ଆତଃ ଏଡକାନ୍ କାମି ହରାତେ ସାନାର୍ତ୍ତକେକ କେସେଦେତାନା, ଇନ୍କୁଆଃ ବିରୁଧ୍ରେ ସିର୍ମାଏତେ ପାର୍ମେଶ୍ୱାର୍ଆଃ ଖୁସ୍ ହବାଅଃତାନା । ^{୧୯} ପାର୍ମେଶ୍ୱାର୍ଆଃ ବିଷାଏରେୟାଃ ସାରି କାଜିତେୟାଃକେ ଇନ୍କୁ ସାରିତାନାକ ଏନା ପାର୍ମେଶ୍ୱାର୍ ଆଇଃକ୍ରି ଇନ୍କୁତାଃରେ ଉଦୁବାକାଦକଆ । ^{୨୦} ପାର୍ମେଶ୍ୱାର୍ ଅତେଦିଶୁମ୍ବକେ ବାଇକେଦ୍ ଦିପିଲିଏତେଗି, କା ନେଲଃତାନ୍ କାଜିତାୟାଃକ, ଆୟାଃ ଜାନାଅ ଜାନାଅରେୟାଃ ପେଡ଼େଃ ଆତଃ ଆୟାଃ ଆକ୍ଦାନ୍ଦାଅ ସଭାବ୍ ଫାର୍ତା ଫାର୍ତଗି ନେଲଃତାନା, ଆୟାଃ ବାଇୟାକାନ୍ ବିଷାଏକରେ ଏନା ଆବ୍କାର୍ଉରୁମଃ ତାନା, ଏନାତେ ହତ୍ତକ କାଲେ ସାରିୟାଃ ମେନ୍ତେ କାକ କାଜି ଦାଡ଼ିୟା । ^{୨୧} *ଇନ୍କୁ ପାର୍ମେଶ୍ୱାର୍କେ ସାରିକାଈଃରେୟାଃ ଇନିଃକେ କାକ ମାଇନ୍କିୟା ଚାଏ ଜେତାନ୍ ବିଷାଏ ନାଗେନ୍ତେ ଧାନ୍ୟାବାଦ୍ କାକ ଏମ୍କିୟା । ମେନ୍ଦ୍ ଇନ୍କୁଆଃ ଉଡ଼ୁକ୍ ସାମାକାଜି ତାନାଃ ଆତଃ ଇନ୍କୁଆଃ ତଣ୍ଟୁ ମନ୍ଦ୍ ଏଡକାନ୍ ଉଡ଼ୁତେ ନୁବାଗାକାନା । ^{୨୨} ଇନ୍କୁ ଆପାନ୍କେ ସେଣାନ୍ ମେନ୍ତେକ କାଜିନ୍ତାନା ମେନ୍ଦ୍ ଇନ୍କୁ ସାର୍ତଗି ତଣ୍ଟୁଗିୟାକ । ^{୨୩} କା ଜିୟନଃ ପାର୍ମେଶ୍ୱାର୍କେ କା ସେଝାକେଦ୍ତେ, ଇନ୍କୁ ଜିୟନଃ ମାନଝାକଆଃ, ଚେଣ୍ଟେକଆଃ ଆତଃ ଜାଁତୁକଆଃ ଚାଏ ଅତେରେ ରେଙ୍ଗାଅଃତାନ୍କଆଃ ମୁରୁଡ଼କକେ ପୁଜାକତାନାକ ।

^{୨୪} ଏନାମେନ୍ତେ ପାର୍ମେଶ୍ୱାର୍ ଇନ୍କୁକେ ବାଗିକାଦକଆ ଆତଃ ଇନ୍କୁ ଆକଆଃ ଆପ୍ନାଃ ମନ୍ସୁରୁଦ୍ରେୟାଃ ଏଡକାନ୍ ସାନାଲ୍ଲେକାତେ ମିହୁଡ୍ ଆତଃମିହୁଡ଼ଲଃ ହତ୍ତମରେୟାଃ ଗିହୁଗଃ ଲେକାନ୍ କାମିକ କାମିତାନା । ^{୨୫} ଇନ୍କୁ ପାର୍ମେଶ୍ୱାର୍ଆଃ ସାନାର୍ତ୍ତ ବାଦ୍ଲାରେ ହସତ୍ତ କାଜିକରେକ ଆସ୍ରାକେଦା । ବାବାଇନିଃ ପାର୍ମେଶ୍ୱାର୍କେ ଆତଃ ଜାନାଅ ସାହାରାଅ ନାମେତାନ୍ନିଃକେ

* ୧:୨୧ ୧:୨୧ ଏଡ଼ିସିୟ ୪:୧୭,୧୮.

ବାଗିକେଦ୍‌ତେ ବାଇୟାକାନ୍ ତେୟାଃକକେ ପୁଜାକେଦାକ । ଆମେନ୍
|

୨୭ ଇନ୍‌କୁ ଗିହୁଗାନ୍ ଏଡ଼କାନ୍ କାମିକରେକ ପେରେଜାକାନ୍ ହରାତେ ପାର୍‌ମେଶ୍ଵାର୍ ଇନ୍‌କୁକେ ବାଗିକେଦ୍‌କଆ, ଇନ୍‌କୁଆଃ କୁଡ଼ିକ ଆକଆଃ ଆପ୍‌ନାଃ କଡ଼ାକଲଃ ହଡ଼୍‌ଫରାଃ କାମି ବାଗିକେଦ୍‌ତେ କୁଡ଼ି କୁଡ଼ିକଲଃ ହଡ଼୍‌ଫରାଃ କାମିକ କାମିତାନା । ୨୭ ଏନ୍‌ଲେକାଗି କଡ଼ାକହଗି ଆକଆଃ ଆପ୍‌ନାଃ କୁଡ଼ିକଲଃ ହଡ଼୍‌ଫରାଃ କାମି ବାଗିକେଦ୍‌ତେ କଡ଼ା କଡ଼ାକଲଃ ହଡ଼୍‌ଫରାଃ କାମିକ କାମିତାନା । କଡ଼ାକ ଆକ ଆକଗି ଗିହୁଗାନ୍ କାମିକ କାମିତାନା, ଆଡ଼ଃ ଏଡ଼କାନ୍ କାମି ହରାତେ ଆକ ଆକଗି ଆକଆଃ ନାଙ୍ଗ୍ ସାଜାଇକ ଆଡ଼଼େତାନା ।

୨୮ ନେ ହଡ଼କ ପାର୍‌ମେଶ୍ଵାର୍‌ଆଃ ବିଷାଏରେୟାଃ ସାର୍‌ତି ସେଣ୍‌କେ ବୁଗିଲେକାତେ ସାରି ନାଗେନ୍ତେ କାକ ସାନାଙ୍ଗ୍‌କେଦା, ଏନାମେନ୍ତେ ପାର୍‌ମେଶ୍ଵାର୍ ଇନ୍‌କୁକେ ଆୟାଃ କା ଲାଗାଡ଼ିଙ୍ଗ୍ କାମି ରିକାନାଗେନ୍ତେ ଏଡ଼କାନ୍ କାମିରେ ଜିମାକେଦ୍‌କଆ । ୨୯ ଇନ୍‌କୁଦ ସବେନ୍ ଲେକାନ୍ ଏଡ଼କାନାଃତେ ପେରେଜାକାନ୍‌କ, ଏଡ଼କାନ୍ କାମିକ, ହାଏୟାଃଅତାନ୍‌କ, ଏଟାଃକଆଃ ନକ୍‌ସାନ୍‌ତାନ୍‌କ, ଆଡ଼ଃ ହାଁକାର୍‌ତେ ପେରେଜାକାନ୍‌କ, ହଡ଼ ଗଗଏଃକ, ଲାପାଡ଼ାଇକ, ବେଦାକ, ଆଡ଼ଃ ହିସଙ୍ଗାତେ ପେରେଜାକାନ୍‌କ ତାନ୍‌କ । ଇନ୍‌କୁ ଏଟାଃନିୟାଃ ରୁପ୍‌ରା କାଜିକ କାଜିୟାଃ, ୩୦ ମିହୁଡ୍ ଆଡ଼ଃମିହୁଡ୍‌ଆଃ ଏଡ଼କାନ୍ କାଜିକ ଜାଗାରାଃ, ଇନ୍‌କୁ ପାର୍‌ମେଶ୍ଵାର୍‌କେ ହିଲାଙ୍ଗ୍ ହଡ଼କ ତାନ୍‌କ, ଏଟାଃକକେ ଲାୟାଃକ, ଆକ ଆକଗି ମାରାଙ୍ଗ୍‌ୟେନ୍‌କ, ଆଡ଼ଃ ମାରାଙ୍ଗ୍ ଆଟ୍‌କାରେନ୍ ତାନ୍‌କ, ଆଡ଼ଃଗି ଏଡ଼କାନ୍ କାମିକ କାମିନାଙ୍ଗ୍ ଉଡ଼଼ୁତାନ୍‌କ, ଆକଆଃ ଏଙ୍ଗା ଆପୁକକେ କାକ ମାନାଡ଼ିଙ୍ଗ୍ ତାନ୍‌କ, ୩୧ ବିବେକ୍ ବାନଃକ, ଆକଆଃ କାଜି କାଜିକାଦ୍‌ତେୟାଃକେ କା ପୁରାଏକ, ଆଡ଼ଃ ଏଟାଃକ ନାଗେନ୍ତେ କାଟିଃଲେକାହ୍ ଦାୟା ଦୁଲାଡ଼ ଆଡ଼ଃ ଲିନିବୁଇ ବାନଃକ ତାନ୍‌କ । ୩୨ ଇନ୍‌କୁ ସାରିତାନାକ, ପାର୍‌ମେଶ୍ଵାର୍‌ଆଃ ଆନ୍‌ରୁ ଲେକାତେ ନେ ଲେକାନ୍ ହଡ଼କ ଗନଏଃରାଃ ସାଜାଇ ନାମେଗିୟାଃକ । ନେଆଁ ସାରିକାଦ୍‌ରେୟ ଇନ୍‌କୁ ଏନ୍‌ଲେକା ଏଡ଼କାନ୍ କାମିକ କାମିତାନା ଆଡ଼ଃ ଏନ୍‌ଲେକା କାମିତାନ୍ ହଡ଼କକେୟଗି ଉସ୍‌କୁରକତାନାକ ।

୨

ପାର୍ମେଶ୍ୱାର୍‌ଆଃ ନ୍ୟାୟ ବିଚାର

୧ ☆ ଏ ହାଗା ଚାଏ ମିଶି, ଆମ୍ ତିନାଃ ଏଟାଃକଆଃ ବିଚାରତାନାମେ ? ଆମ୍ ଜେତାଏ ହଡ଼ ତାନମେରେୟ୍, ନେଆଁ ରିକା ନାଗେନ୍ତେ ଆମ୍ ନାଙ୍ଗ୍ କା ବୁଗିନାଃ । ଏଟାଃକକେ ଚିଟାକେଦତେ ଆମ୍‌ଗି ଏନ୍ କାମିମ୍ କାମିତାନ୍‌ରେଦ, ଆମ୍ ଆମ୍‌ଗି ସାଜାଇୟେନ୍ ତାନାମେ । ୨ ଆବୁ ସାରିତାନାବୁ, ପାର୍ମେଶ୍ୱାର୍ ନେ'ଲେକା କାମିତାନ୍ ହଡ଼କକେ ସାର୍‌ତିଗି ବିଚାରକଆ । ୩ ହେ ହାଗା ମିଶିକ, ଅକ ଏଡ଼କାନ୍ କାମି ନାଗେନ୍ତେ ଆପେ ଏଟାଃକକେପେ ଚିଟାକ ତାନା, ଏନା ଆପେଗିପେ କାମିତାନ୍‌ରେଦ, ଚିୟାଃ ଆପେ ପାର୍ମେଶ୍ୱାର୍‌ଆଃ ବିଚାରହେତେ ବାଚାଅଃଞ୍ଜାଲେ ମେନ୍ତେପେ ଉଡ଼ଃତାନା ? ୪ ହବାସାକାଅଆଃ, ଆପେ ପାର୍ମେଶ୍ୱାର୍‌ଆଃ ମାରାଙ୍ଗ୍ ଦାୟା, ଧୁରାଜ୍ ଆଡ଼ଃ ସାହାତିଙ୍ଗ୍ ଜୀଞ୍ଜାନ୍‌କେପେ ହିଲାଙ୍ଗ୍‌ତାନା । ଆପେ ସାର୍‌ତିଗିପେ ସାରିତାନା ଯେ, ଆପେୟାଃ ମନ୍‌ରେ ହେୟାତିଙ୍ଗ୍ ଆଉଖେ ନାଗେନ୍ତେ ପାର୍ମେଶ୍ୱାର୍ ଦାୟାକାଦପେୟାଏ । ୫ ମେନ୍‌ଦ ଆପେ କେଟେଦ୍‌ମନ୍‌କ ଆଡ଼ଃ କା ବାଦଲ୍ୟାଃ ମନ୍‌ସୁରୁଦ୍‌କ ତାନ୍‌ପେ । ଏନାତେ ଚୁଣ୍ଟୁ ହୁଲାଙ୍ଗ୍‌ରେୟାଃ ନ୍ୟାୟ ବିଚାର ଇମ୍‌ତା ଆପେ ପାର୍ମେଶ୍ୱାର୍‌ଆଃ ଖ୍‌ସ୍‌ଆକାନ୍ ହବାକେଦତେ ପୁରାଃଗି ସାଜାଇପେ ନାମେୟାଁ । ୬ ଚିୟାଃତି ପାର୍ମେଶ୍ୱାର୍ ସବେନ୍‌କକେ ଆକଆଃ କାମିଲେକାତେ ନାଲାଏ ଏମାକଆ । ୭ ଅକ ହଡ଼କ ମାନାରାଙ୍ଗ୍, ମାଇନାନ୍ ଆଡ଼ଃ କା ଚୁଣ୍ଟୁ ଜୀଦାନ୍ ନାମେରେୟାଃ ଆସ୍ତାରେ ଧୁରାଜ୍ ସାବକେଦତେ ବୁଗିନ୍ କାମିକ କାମିୟା, ଇନ୍‌କୁକେ ପାର୍ମେଶ୍ୱାର୍ ଜାନାଅ ଜୀଦାନ୍ ଏମାକଆଏ । ୮ ମେନ୍‌ଦ ଅକନ୍ ହଡ଼କ ଆପାନାଃ ନାଗେନ୍ତେ ଏସ୍‌କାର୍ ଉଡ଼ଗୁାଃକ, ସାନାର୍‌ତିରାଃ ହରାକେ ବାଗିକେଦତେ ଏଡ଼କାନ୍ ହରାକ ଅତଙ୍ଗ୍‌ଆଃ, ଇନ୍‌କୁଆଃ ଚେତାନ୍‌ରେ ପାର୍ମେଶ୍ୱାର୍‌ଆଃ ଖ୍‌ସ୍ ପୁରାଃଗି ଆଡ଼ଃ ବରଞ୍ଜାନ୍‌ଗି ହବାଅଃଆ । ୯ ଅକନ୍‌କ ଏଡ଼କାନ୍ କାମି କାମିତାନାକ ଇନ୍‌କୁଆଃ ଜୀଉରେ ଦୁକୁ ଆଡ଼ଃ ସାସାତିରେୟାଃ ଦିପିଲି ହିଜୁଃତାନା । ସିଦାତେଦ ଯିହୁଦୀକଆଃ ନାଗେନ୍ତେ ଏନ୍ ତାୟମ୍‌ତେ ଗ୍ରାକ୍ ହଡ଼କଆଃ ନାଗେନ୍ତେ ହବାଅଃଆ । ୧୦ ମେନ୍‌ଦ ଅକନ୍‌କ ବୁଗିନ୍ କାମିକ କାମିତାନା, ଇନ୍‌କୁକେ ପାର୍ମେଶ୍ୱାର୍

☆ ୨:୧ ୨:୧ ମାଥୁଉ ୭:୧; ଲୁକ ୭:୩୭.

ମାନାରାଜ୍, ମାଇନାନ୍, ଆଡ଼ଃ ଜୀଉସୁକୁ ଏମାକଥାଏ । ସିଦାତେ ଯିହୁଦୀ ହଡ଼କକେ ଏନ୍ତାୟମ୍ତେ ଗ୍ରୀକ୍ ହଡ଼କକେ, ^{୧୧} ଚିୟାଃଚି ପାର୍ମେଶ୍ୱାର୍ ସବେନ୍କକେ ମିଦ୍ଲେକାଗି ବିଚାରକଥା ।

^{୧୨} ଗ୍ରୀକ୍* ହଡ଼କ ମୁଣା ନାବୀ ଅଲ୍ଲାକାଦ୍ ଆନ୍ତୁ କାକ ନାମାକାଦା । ଇନ୍କୁ ବେଗାର୍ ଆନ୍ତୁତେ ପାପ୍କେଦାକ, ଏନାତେ ଇନ୍କୁ ବେଗାର୍ ଆନ୍ତୁତେ ଜିୟନଃଆକ । ମେନ୍ଦ୍ ଯିହୁଦୀକ ଆନ୍ତୁ ସାରିକେଦ୍ତେହ୍ ପାପ୍କେଦାକ, ଏନାତେ ଏନ୍ ଆନ୍ତୁ ହରାତେଗି ବିଚାରଃଆକ । ^{୧୩} ଚିୟାଃଚି ଆନ୍ତୁ ଆୟୁମ୍କେଦ୍ତେ ଏସ୍କାର୍ ହଡ଼କ ପାର୍ମେଶ୍ୱାର୍ଆଃ ସାମନାଙ୍ଗ୍ରେ ଧାର୍ମାନ୍ କାକ ହବା ଦାଡ଼ିୟଃଆ, ମେନ୍ଦ୍ ଆନ୍ତୁ ମାନାତିଙ୍ଗ୍କେଦ୍ତେହ୍ରି ଧାର୍ମାନ୍ ହବା ଦାଡ଼ିୟଃଆ । ^{୧୪} ଗ୍ରୀକ୍ ହଡ଼କଆଃ ଆନ୍ତୁ ବାନଃଆ, ମେନ୍ଦ୍ ଇନ୍କୁ ଆନ୍ତୁ ହୁକୁମାକାଦ୍ ଲେକାକ ମାନାତିଙ୍ଗ୍ତାନ୍ରେଦ୍ ଏନାଗି ଇନ୍କୁଆଃ ଆନ୍ତୁ ଲେକ୍ନାଃ ତାନାଃ । ^{୧୫} ଇନ୍କୁଆଃ ଚାଇଲ୍ ଚାଲାନ୍ ହରାତେ ଉଦୁବଃତାନା, ଆନ୍ତୁରେୟାଃ ନିୟାମ୍କ ଇନ୍କୁଆଃ ମନ୍ସୁରୁଦ୍ରେ ଅଲ୍ଲକେଦ୍ତେ ମେନାଃ । ନେ କାଜିରେୟାଃ ସାନାର୍ତି ଇନ୍କୁଆଃ ବିବେକ୍ତେହ୍ରି ଉଦୁବାକାନା, ବୁଗିନ୍ ଉଡ଼ଃତାନ ଇମ୍ତା ବିବେକ୍ ଇନ୍କୁକେ ଦେଙ୍ଗାକଥା, ଆଡ଼ଃ ଏଡ଼କାନ୍ ଉଡ଼ଃ ଇମ୍ତା ଚିଚାକଥା । ^{୧୬} ଅକନ୍ ହୁଲାଙ୍ ପାର୍ମେଶ୍ୱାର୍ ଯୀଶୁ ଖ୍ରୀଷ୍ଟ୍ଆଃ ହରାତେ ସବେନ୍ ହଡ଼କଆଃ ଉକୁଆକାନ୍ କାଜିକ୍ଏ ବିଚାରେୟା, ଏନ୍ ହୁଲାଙ୍ ଆଇଙ୍ ଉଦୁବେତାନ୍ ସୁକୁକାଜି ଲେକାତେ ନେ ସବେନାଃ ହବାଅଃଆ ।

ଯିହୁଦୀକ ଆଡ଼ଃ ଆନ୍ତୁ

^{୧୭} ଆପେ ଚିନାଃ କାଜିତାନାପେ ? ଆପେ ଆପାନ୍କେ ଯିହୁଦୀ ମେନ୍ତେପେ କାଜିନ୍ତାନା, ମୁଣା ଏମାକାଦ୍ ଆନ୍ତୁ ଚେତାନ୍ରେ ଭାର୍ସାକେଦ୍ତେ ଆଡ଼ଃ ପାର୍ମେଶ୍ୱାର୍ଲଃ ଆପେୟାଃ ନାତା ମେନାଃ ମେନ୍ତେ ଆପାନ୍କେ ମାରାଙ୍ ମେନ୍ତେପେ ଉଡ଼ଃତାନା, ^{୧୮} ମୁଣା ନାବୀରାଃ ଆନ୍ତୁଏତେ ଆପେ ଇତୁକାନାପେ ଆଡ଼ଃ ପାର୍ମେଶ୍ୱାର୍ଆଃ ଇଛାସାନାଙ୍ଗ୍କେ ସାରିକେଦ୍ତେ ବୁଗିନାଃ ଆଡ଼ଃ ଏଡ଼କାନାଃରେୟାଃ ସେଣାକେପେ ଆବ୍କାର୍ତୁରୁମ୍ କାଦା,

* **୨:୧୨** ୨:୧୨ ଅକନ୍କ ଯିହୁଦୀ ହଡ଼କ ନାହାଁଲକ

୧୯ ସାର୍ବତ୍ରିକରେ ସାରିତାନା, ଆପେ କା ନେଲ୍ ଦାଢ଼ିନିୟାଃ ହରା ଉଦ୍ଭବକ୍ ତାନ୍ଦେ, ନୁବାଃରେ ତାଜନ୍ତାନ୍ ହଡ଼କ ନାଗେନ୍ତେ ମାର୍ସାଲକ୍ ତାନ୍ଦେ, ୨୦ ତଣ୍ଡ ହଡ଼କକେ ଇତ୍ତୁ ହଡ଼କ ତାନ୍ଦେ, କା ସେଣ୍ଟାନ୍‌କଆଃ ଇନିତୁକ୍ ତାନ୍ଦେ । ଆପେୟାଃ ବିଶ୍ୱାସ୍, ଆନ୍‌ତୁଏତେ ଆପେ ପୁରା ସାନାର୍‌ତି ଆତଃ ସେଣ୍ଟାପେ ନାମାକାଦା । ୨୧ ଆପେ ଏଟାଃକକେ ଇତୁକ୍‌ତାନାପେ ମେନ୍‌ଦ ଆପେ ଆପେଗି ଚିୟାଃ ମେନ୍ତେ କାପେ ଇତୁନ୍‌ତାନା ? “ଆଲ୍‌ପେ କୁମ୍‌ତୁଆଃ” ମେନ୍ତେ ଇତୁକେଦତେ ଆପେଗିପେ କୁମ୍‌ତୁତାନାତି ? ୨୨ “ଆପାଙ୍ଗିର୍ କାମି ଆଲ୍‌ପେ ରିକାଏୟା” ମେନ୍ତେ କାଜିକେଦତେ, ଚିୟାଃ ଆପେଗି ଆପାଙ୍ଗିର୍ କାମିପେ ରିକାତାନା ? ଆପେ ମୁରୁଡ଼କକେ ହିଲାଙ୍ଗକେଦତେ ଚିୟାଃ ମାନ୍‌ଦିରେୟାଃ ଜିନିଷକକେପେ ରେଃକ୍‌ତାନା ? ୨୩ ଆପେ ପାର୍‌ମେଶ୍ୱାର୍‌ଆଃ ଆନ୍‌ତୁ ନାମାକାଦାଲେ ମେନ୍ତେ ଆପାନ୍‌କେ ମାରାଙ୍ଗ୍ ମେନ୍ତେପେ କାଜିନ୍‌ତାନା, ମେନ୍‌ଦ ଆୟାଃ ଆନ୍‌ତୁକେ ଟଟାଃକେଦତେ ଚିୟାଃ ପାର୍‌ମେଶ୍ୱାର୍‌କେପେ ନିୟାଲ୍ ତାନା ? ୨୪ ଧାରାମ୍‌ପୁଅରେ ଅଲ୍‌କାନା, “ଆପେୟାଃ ନାଗେନ୍ତେ ଗ୍ରୀକ୍ ହଡ଼କ ପାର୍‌ମେଶ୍ୱାର୍‌ଆଃ ଏଡ଼କାନାଃକ କାଜିତାନା ।”

୨୫ ଆନ୍‌ତୁକେପେ ମାନାତିଙ୍ଗ୍ ତାନ୍‌ରେଦ, ଆପେୟାଃ ଖାତ୍‌ନାଅରାଃ ଗନଙ୍ଗ୍ ମେନାଃ, ମେନ୍‌ଦ ଆନ୍‌ତୁକେ କାପେ ମାନାତିଙ୍ଗ୍‌ତାନ୍‌ରେଦ ଆପେ କା ଖାତ୍‌ନାଅକାନ୍ ହଡ଼କଲଃ ମିଦ୍‌ଗିୟାପେ । ୨୬ କା ଖାତ୍‌ନାଅକାନ୍ ମିଆଁଦ୍ ଗ୍ରୀକ୍ ହଡ଼ଆଃ ଆନ୍‌ତୁରେୟାଃ ରିତିରିଝାଜ୍‌କକେ ମାନାତିଙ୍ଗ୍ ତାନ୍‌ରେଦ, ପାର୍‌ମେଶ୍ୱାର୍ ଇନିଃକେ ଖାତ୍‌ନାଅକାନ୍ ହଡ଼ ଲେକା କାଏ ଚି ମାଜ୍‌ନିୟା ? ୨୭ ଏନାମେନ୍ତେ ହଡ଼୍‌ମରେ କା ଖାତ୍‌ନାଅକାନ୍‌ରେୟ ଆନ୍‌ତୁ ମାନାତିଙ୍ଗ୍‌ତାନ୍ ଗ୍ରୀକ୍ ହଡ଼କ ଯିହୁଦୀ ହଡ଼କକେ ବିଚାର୍‌କଆକ, ଚିୟାଃଚି ଇନ୍‌କୁ ହଡ଼୍‌ମ ଲେକାତେ ଖାତ୍‌ନାଅକାନ୍‌ରେୟ ଏନ୍ ଅନଲ୍ ଆନ୍‌ତୁକେ କାକ ମାନାତିଙ୍ଗ୍ ତାନା । ୨୮ ବାହାରି ହଡ଼୍‌ମ ଲେକାତେ ଏସ୍‌କାର୍ ଖାତ୍‌ନାଅକାନ୍‌ନିଃ ଯିହୁଦୀ ମେନ୍ତେ କାଜିୟଃତାନା ମେନ୍‌ଦ ସାର୍‌ତି ଯିହୁଦୀ ନାହାଲିଃ । ୨୯ ସାର୍‌ତି ଯିହୁଦୀ ତାନିଃରେଦ, ଇନିଃ ମନ୍ ଭିତାର୍‌ଏତେଗି ଯିହୁଦୀ ତାନିଃ । ସାର୍‌ତି ଖାତ୍‌ନାଅ ମନ୍‌ସ୍‌ପୁରୁଦ୍‌ରେଗି ହବାଅଃଆ, ଏନା ପାର୍‌ମେଶ୍ୱାର୍‌ଆଃ ଆମ୍‌ାତେ ହବାଅଃଆ, ଅନଲ୍‌ତେଦ କାହାଗି

। ଅକନ୍ଦ ହତ୍ତ ମନ୍ସୁରୁଦ୍ରେ ଆମ୍ଭାତେ ଖାତ୍ନାଅକାନା, ଇନିଃ ପାର୍ମେଶ୍ଵାର୍ତାଃଏତେ ସାହାରାଅ ନାମେୟାଏ, ହତ୍ତକତାଃଏତେଦ କାହାଗି ।

୩

୧ ତାବଦ ଗ୍ରୀକ୍ ହତ୍ତକତାଃଏତେ ଯିହୁଦୀ ହତ୍ତକଆଃ ପୁରାଃ ସୁବିଧା ତିନାଃ ତାନାଃ ? ତାଏ ଖାତ୍ନାଅକାନ୍ରେୟାଃ ତିକାନ୍ ସୁବିଧା ମେନାଃ ? ୨ ହେଗି, ଯିହୁଦୀ ହତ୍ତକତାଃରେ ପୁରାଃ ବିଶେଷ୍ ବିଷାଏକ ମେନାଃ । ସବେନାଃଏତେ ବିଶେଷ୍ କାଜି ହବାଅଃତାନା, ପାର୍ମେଶ୍ଵାର୍ ଆୟାଃ ବିଷାଏରେ କାଜିରାଃ ବାହାରମ୍ ଯିହୁଦୀକକେ ପାହିଲାତେ ଏମାକାଦକଆ । ୩ ମେନ୍ଦ୍ ରିମିନ୍ ହତ୍ତକ କା ପାତିୟାର୍ରେଃ ଲେକାନ୍ନିଃ ତାନ୍ନକ, ଏନାତେ ତିନାଃ ପାର୍ମେଶ୍ଵାର୍ କା ପାତିୟାର୍ରେଃ ଲେକାନ୍ନିଃ ହବାଅଃଆଏ ? ୪ କାହାଗି, ଏନ୍କାଦ ଆଲ ହବାଅଃକା । ସବେନ୍ ହତ୍ତକ ହସତ୍ତ ହବାଅଃରେୟ ପାର୍ମେଶ୍ଵାର୍ ସାର୍ତି ତାନିଃ । ଧାରାମ୍ ପୁଅରେ ଅଲାକାନା,

“ଆମାଃ କାଜି ହରାତେ ଆମ୍ ଧାରମାନ୍ ମେନ୍ତେମ୍ ସାରିୟଃଆ,
ଆମ୍ ବିଚାରଃତାନ୍ ଇମ୍ତା ଜିନିତାଅ ନାମେୟାମ୍ ।”

୫ ନେତାଃରେ ମିଆଁଦ୍ କୁନୁଲି ହବାସାକାଅଆଃ, ଆବୁ ଏତକାନ୍ କାମି ରିକାଃବୁ ଇମ୍ତା ଆର୍କାରଃଆ ଯେ ପାର୍ମେଶ୍ଵାର୍ଆଃ କାମି ବୁଗିନାଃତାନାଃ, ଏନାତେ ପାର୍ମେଶ୍ଵାର୍ ଆବୁକେ ସାଜାଇ ଏମାବୁତାନ୍ ଇମ୍ତା ଇନିଃ ଗୁହ୍ନାଁ କାମି ରିକାଏତାନା ମେନ୍ତେ କାଜି ଦାଡ଼ିୟାବୁତି ? ଆଇଙ୍ଗ୍ ହତ୍ତ ଲେକା କାଜିତାନାଇଙ୍ଗ୍ । ୬ କାହାଗି ଏନ୍କା ଆଲକା ହବାଅଃକା, ପାର୍ମେଶ୍ଵାର୍ ନ୍ୟାୟ ଏମ୍ନିଃ ନାହାଁଲିଃ ରେଦ ଇନିଃ ତିଲ୍କାତେ ଅତେଦିଶ୍ଵମ୍ରାଃ ବିଚାର୍ ରିକା ଦାଡ଼ିୟାଏ ?

୭ ମେନ୍ଦ୍ ଆଇୟାଃ କା ସାନାର୍ତି ହରାତେ ପାର୍ମେଶ୍ଵାର୍ଆଃ ସାନାର୍ତିତେୟାଃ ପୁରାଃତେ ପୁରାଗି ଉଦୁବଃଆ ଆତଃ ଇନିୟାଃ ମାନାରାଙ୍ଗ୍ ହବାଅଃରେଦ, ଆଇଙ୍ଗ୍ ପାପି ମେନ୍ତେ ତିନାଃ ନାଙ୍ଗ୍ ସାଜାଇ ନାମେୟାଇଙ୍ଗ୍ ? ୮ ଆବୁ ତିନାମେନ୍ତେ କାବୁ କାଜିୟାତାମ୍, “ଦଲାବୁ ଏତକାନ୍ କାମିକବୁ ରିକାୟା, ଏନାତେ ବୁଗିନିଆଃ ହିକ୍ଠିଆ ?” ଆଇଙ୍ଗ୍ ଠାଉକାଗି ନେ କାଜିକ କାଜିକେଦ୍ ହରାତେ, ପୁରାଃ

ହୃଦକ ଆଇଙ୍ଗ୍‌କେ ଲାନ୍ଦାକେଦିୟାଁକ ଆଡ଼ଃ ଚିଟାକେଦିୟାଁକ । ନେଆଁ ନାଗେନ୍ତେ ଇନ୍‌କୁ ସାଜାଇକ ନାମେଗିୟା ।

ଜେତାଏୟ ଧାର୍‌ମାନ୍ ହଡ଼ ବାଙ୍କଆ

୯ ତାବଦ, ଆରୁ ଯିହୁଦୀ ହଡ଼କ ଗ୍ରୀକ୍ ହଡ଼କତାଃଏତେ ଚିନାଃ ପୁରାଃ ରୁଗିନାଃବୁ ? କାହାଗି, ଯିହୁଦୀ ହଡ଼ ଆଡ଼ଃ ଗ୍ରୀକ୍ ହଡ଼ ସବେନକ ମିଦ୍‌ଗିୟାକ ମେନ୍ତେ ଆଇଙ୍ଗ୍ ସିଦାରେଗିଇଙ୍ଗ୍ କାଜି ଚାବାକାଦା, ଇନ୍‌କୁ ସବେନକ ଆକଥାଃ ଆପ୍‌ନାଃ ପାପ୍‌ରେୟାଃ ଆକ୍‌ତେୟାର୍‌ରେ ମେନାକଥା । ୧୦ ଧାରାମ୍ ପୁଥ୍‌ରେ ଅଲ୍‌କାନା, “ଧାର୍‌ମାନ୍ ହଡ଼ ଜେତାଏ ବାଙ୍କଆ, ମିହୁଡ଼ହ୍ ବାଙ୍କଆ,

୧୧ ମିହୁଡ଼ହ୍ ସେଣାନ୍ ହଡ଼ ବାଙ୍କଆ,

ଚାଏ ପାର୍‌ମେଶ୍‌ବାର୍‌କେ ସାର୍‌ତିତେ ଦାଣ୍ଡାନ୍‌ନିଃ ଜେତାଏ ବାଙ୍କଆ ।

୧୨ ଇନ୍‌କୁ ସବେନକ ପାର୍‌ମେଶ୍‌ବାର୍‌ତାଃଏତେ ସାଙ୍ଗିନାକାନାକ, ସବେନକ ହରା ଆଦାକାଦାକ, ଜେତାଏ ମିହୁଡ଼ହ୍ ରୁଗିନ୍ କାମି କାକ ରିକାତାନା ।

୧୩ ଇନ୍‌କୁଆଃ ମଚାରାଃ କାନାଜି ଉରାକାନ୍ ତପାଗାଡ଼ା ଲେକାନାଃ ତାନାଃ,

ଆଲ୍‌ଆହେତେ ଏଡ଼କାନ୍ ବେଦା ଲିଙ୍ଗିୟାତାନା, ଆଡ଼ଃ ଇନ୍‌କୁଆଃ ମଚାଏତେ ଅଡ଼ଙ୍ଗ୍‌ତାନ୍ କାଜି, ବରଝାନ୍ ବିଙ୍ଗ୍‌ରାଃ ବିଷ୍ ଲେକାନାଃ ତାନାଃ,

୧୪ ଇନ୍‌କୁଆଃ ଜାଗାର୍ ମେହେର୍‌ତେ ଆଡ଼ଃ ସାର୍‌ପାଅତେ ପେରେଜାକାନା ।

୧୫ ଇନ୍‌କୁ ଏଟାଃକକେ ନକ୍‌ସାନ୍ ଆଡ଼ଃ ଗଗଏଃ ନାଗେନ୍ତେ ସେକାଡ଼ାକାନଗିକ ତାଇନାଃ ।

୧୬ ଇନ୍‌କୁ ଜିୟନେ ନାଗେନ୍ତେ ଆଡ଼ଃ ସାସାତି ନାଗେନ୍ତେ ସବେନ୍‌ସାଃତେ ସେନାଃକ ।

୧୭ ଇନ୍‌କୁ ଜୀଉସୁକୁରାଃ ହରାକେ କାକ ସାରିୟା ।

୧୮ ଚାଏ ପାର୍‌ମେଶ୍‌ବାର୍‌କେ ବରଭାକ୍ତି ଲାଗାଡ଼ିଙ୍ଗ୍‌ୟାଃ, ଏନା ଇନ୍‌କୁ କାକ ଇଡ଼ୁକାନା ।”

୧୯ ନାହାଃ ଆରୁ ସାରିତାନାରୁ, ଅକନ୍‌କ ଆନ୍‌ରୁରେ ମେନାକଥା, ଇନ୍‌କୁକେ ଏନାରେୟାଃ ସବେନ୍ ଆନ୍‌ରୁ ମାନାଡ଼ିଙ୍ଗ୍ ଲାଗାଡ଼ିଙ୍ଗ୍‌ୟାଃ । ପାର୍‌ମେଶ୍‌ବାର୍ ସବେନ୍ ଅତେଦିଶ୍‌ବାରାଃ ବିଚାର୍ ରିକାଏ ଇମ୍‌ତା,

ଆନରୁକେ କା ମାନାତିକ୍ତାନ୍ ହତକ ଜେଡ୍‌ନାଃ ଉଦୁବ୍‌କେଦ୍‌ତେ, ଆପାନ୍‌କେ ବେଗାର୍ ତିଟାନିଃ ତାନିକ୍ ମେନ୍ତେ କାକ କାଜି ଦାଡ୍‌ୟା । ୨୦ ☆ମେନ୍‌ଦ ଆନରୁରେୟାଃ କାଜିକାମି ରିକାକେଦ୍‌ତେ ଜେତାଏ ମାନଞ୍ଜା ପାର୍‌ମେଶ୍ଵାର୍‌ଆଃ ନେପେଲ୍‌ରେ ଧାର୍‌ମାନ୍ ମେନ୍ତେ କାଏ କାଜିୟାଆ । ଆନରୁ ଆରୁଆଃ ପାପ୍ ବିଷାଏରେ ଏସ୍‌କାର୍ ଆରୁକେ ଚେଡ୍‌ଗାର୍‌ରୁଆ ।

ବିଶ୍ଵାସରେ ଧାର୍‌ମାନ୍ ହବାଅଃ

୨୧ ମେନ୍‌ଦ ନାହାଁଃ ମୁଶାରାଃ ଆନରୁ ବାଗିକେଦ୍‌ତେ ପାର୍‌ମେଶ୍ଵାର୍‌ଆଃ ଧାର୍‌ମାନ୍‌ତେୟାଃ ଉଦୁବାକାନା । ନେ ବିଷାଏରେ ମୁଶାରାଃ ଆନରୁ ଆଡ଼ଃ ନାବୀକହଗି ଗାଞ୍ଜା ଏମାକାଦାକ । ୨୨ ☆ୟାଶୁ ଖ୍ରୀଷ୍ଟତାଃରେ ଏସ୍‌କାର୍ ବିଶ୍ଵାସ୍ ହରାତେ ହତକ ପାର୍‌ମେଶ୍ଵାର୍‌ଆଃ ଆୟାର୍‌ରେ ଧାର୍‌ମାନ୍‌କ ହବାଅଃଆ । ପାର୍‌ମେଶ୍ଵାର୍ ସବେନ୍‌କକେ ମିଦ୍‌ଲେକାଗି ନେଲ୍‌ୟାଏ, ଖ୍ରୀଷ୍ଟତାଃରେ ବିଶ୍ଵାସ୍‌ତାନ୍ ସବେନ୍ ହତକକେ ନେ ସୁଯୋଗ୍ ଏମାଃଏ । ୨୩ ସବେନ୍‌କ ପାପ୍‌କାଦାକ ଆଡ଼ଃ ପାର୍‌ମେଶ୍ଵାର୍‌ଆଃ ମାନାରାକ୍ ନାମେହେତେ ସାଜିନ୍‌ରେ ମେନାକଆ । ୨୪ ମେନ୍‌ଦ ଖ୍ରୀଷ୍ଟ୍ ଯୀଶୁଆଃ ହରାତେ ବେଗାର୍ ଗନଙ୍ଗରେ ପାର୍‌ମେଶ୍ଵାର୍ ଅକନ୍ ସାୟାଦ୍ ଏମାକାଦାଏ, ଏନାକେ ଅକନ୍ ହତକ ତେଲ୍‌ଏୟାକ, ଇନ୍‌କୁ ଖ୍ରୀଷ୍ଟ୍ ଯୀଶୁଆଃ ହରାତେ ପାପ୍‌ହେତେ ରାଡ଼ାକେଦ୍‌ତେ ପାର୍‌ମେଶ୍ଵାର୍‌ଆଃ ନେପେଲ୍‌ରେ ଧାର୍‌ମାନ୍‌କ ହବାଅଃଆ । ୨୫ ପାର୍‌ମେଶ୍ଵାର୍ ଯୀଶୁକେ ଏମ୍‌କିୟାଏ, ଇନିୟାଃ ଦାଣ୍ଟି ଗନଏଃ ଚାଏ ମାୟୋମ୍ ହରାତେ ଆୟାଃତାଃରେ ବିଶ୍ଵାସ୍‌ତାନ୍ ହତକଆଃ ପାପ୍ ଛାମାରାଃ ହରାଏ ବାଇକେଦା । ପାର୍‌ମେଶ୍ଵାର୍ ଆୟାଃ ଧାର୍‌ମାନ୍‌କେ ଉଦୁବ୍ ନାଗେନ୍ତେ ନେଆଁଏ ରିକାକେଦା । ପାର୍‌ମେଶ୍ଵାର୍ ଧୂରାଜ୍ ସାବ୍‌କେଦ୍‌ତେ ହତକ ସିଦାରେ କାମିକାଦ୍ ପାପ୍‌କଏ ବାଗିକେଦା । ୨୬ ମେନ୍‌ଦ ନାହାଁଃ ଇନିଃ ଆୟାଃ ଧାର୍‌ମାନ୍‌କେ ଉଦୁବେ ନାଗେନ୍ତେ ପାପ୍ ଛାମାରେୟାଃ ହରାଏ ଉଦୁବ୍‌କେଦା । ନେ ହରାତେ ପାର୍‌ମେଶ୍ଵାର୍ ଉଦୁବ୍‌କେଦାଏ ଯେ, ଇନିଃ ଆଇଃକ୍‌ଗି ଧାର୍‌ମାନ୍‌ନିଃ ତାନିଃ ଆଡ଼ଃ ଅକନ୍‌କ ଯୀଶୁତାଃରେ ବିଶ୍ଵାସ୍ ରିକାଏୟାକ, ଏନ୍ ସବେନ୍‌କକେ ଧାର୍‌ମାନ୍ ମେନ୍ତେ କାଜିକଆ ।

☆ ୩:୨୦ ୩:୨୦ ଗାଲାତିୟ ୨:୧୭.

☆ ୩:୨୭ ୩:୨୭ ଗାଲାତିୟ ୨:୧୭.

୨୭ ତାବଦ, ଆବୁ ଅକ ବିଷାଏରେ ଆପାନ୍‌କେ ମାରାଙ୍ଗ୍‌ୟେନ୍‌ ମେନ୍ତେବୁ କାଜିନାଃ ? କାହାଗି, ଏନ୍‌ଲେକାନ୍‌ ବିଷାଏ ଜେଡ୍‌ନାଃ ବାନଃଆ । ଆପାନ୍‌କେ ମାରାଙ୍ଗ୍‌ୟେନ୍‌ ମେନ୍ତେ କାଜିନ୍‌ତେୟାଃ ଆବୁଆଃ ଚିନାଃ ତାଇନ୍‌ସାକାଅଃଆ ? ଚିନାଃ ଆନ୍‌ତୁକେ ପୁରା ମାନାତିଙ୍ଗକାଦାରୁ ମେନ୍ତେ ? କାହାଗି, ଆବୁଆଃ ବିଶ୍ୱାସ୍ ଏସ୍‌କାର୍ ତାନାଃ, ଅକ୍‌ନାଃତି ଆବୁ ଆପାନ୍‌କେ ମାରାଙ୍ଗ୍‌ୟେନ୍‌ ମେନ୍ତେବୁ କାଜିନ୍‌ ତାନା । ୨୮ ନେଆତେ ଆବୁ ସାର୍‌ତିଗି ଆଟ୍‌କାର୍ ଭରୁମେତାନାରୁ ଯେ, ମିହୁଡ୍‌ ଆୟାଃ ବିଶ୍ୱାସ୍ ହରାତେ ଏସ୍‌କାର୍ ପାର୍‌ମେଶ୍ୱାର୍‌ଆଃ ନେପେଲ୍‌ରେ ଧାର୍‌ମାନ୍‌ ହବାଅଃଆଏ, ମେନ୍‌ଦ ଆନ୍‌ତୁକେ ମାନାତିଙ୍ଗ ହରାତେ କାହାଗି । ୨୯ ପାର୍‌ମେଶ୍ୱାର୍‌ ଯିହୁଦୀକଆଃ ଏସ୍‌କାର୍ ପାର୍‌ମେଶ୍ୱାର୍‌ ନାହାଁଲିଃ ? ଇନିଃ ଗ୍ରୀକ୍ ହଡକଆଃ ପାର୍‌ମେଶ୍ୱାର୍‌ହୁଁ ତାନିଃ । ସାର୍‌ତିଗି ଇନିଃ ସବେନ୍‌କଆଃ ପାର୍‌ମେଶ୍ୱାର୍‌ ତାନିଃ । ୩୦ ☆ପାର୍‌ମେଶ୍ୱାର୍‌ ମିହୁଡ୍‌ଗି ତାନିଃ । ଖାଡ୍‌ନାଅ ଆଡ଼ଃ କା ଖାଡ୍‌ନାଅ ହଡକ ଆକଆଃ ବିଶ୍ୱାସ୍ ହରାତେ ଇନିଃ ଇନ୍‌କୁକେ ଧାର୍‌ମାନ୍‌ ମେନ୍ତେ କାଜିକଆ । ୩୧ ନେଆଁରାଃ ମୁଣ୍ଡି ଚିନାଃ, ଆବୁ ବିଶ୍ୱାସ୍ ହରାତେ ଆନ୍‌ତୁକେ ଜିୟନଃ ନାଗେନ୍ତେବୁ ସାନାଙ୍ଗ୍‌ତାନା ? କାହାଗି, ଏନ୍‌କାଦ କା ହବାଅଃଆ । ବିଶ୍ୱାସ୍ ହରାତେ ଆବୁ ଆନ୍‌ତୁରେୟାଃ ନିହିଁ ଗାଡା କେଟେଦକାଦାରୁ ।

୪

ଆବ୍ରାହାମ୍‌ଆଃ ନାମୁନା

୧ ତାବଦ, ହଡ୍‌ମ୍‌ ଲେକାତେ ଆବୁଆଃ ପୁର୍‌ଖା ଆପୁ ଆବ୍ରାହାମ୍‌ଆଃ ବିଷାଏରେ ଚିନାଃରୁ କାଜି ଦାଡିୟା ? ୨ ଆବ୍ରାହାମ୍‌ ଆୟାଃ କାମି ହରାତେ ପାର୍‌ମେଶ୍ୱାର୍‌ଆଃ ନେପେଲ୍‌ରେ ଧାର୍‌ମାନ୍‌ ହବାକାନ୍‌ତେୟାଃଏ ରେଦ, ଆପାନ୍‌କେ ମାରାଙ୍ଗ୍‌ ମେନ୍ତେ କାଜିନ୍‌ତେୟାଃ, ମେନ୍‌ଦ ପାର୍‌ମେଶ୍ୱାର୍‌ଆଃ ନେପେଲ୍‌ରେ ଏନ୍‌କା କା ହବାକାନ୍‌ ତାଇକେନା । ୩ ☆ଧାରାମ୍‌ପୁଥ୍‌ ଲେକାତେ, “ଆବ୍ରାହାମ୍‌ ପାର୍‌ମେଶ୍ୱାର୍‌ତାଃରେ ବିଶ୍ୱାସ୍‌କେଦା ଆଡ଼ଃ ଏନ୍‌ ବିଶ୍ୱାସ୍ ହରାତେ ପାର୍‌ମେଶ୍ୱାର୍‌ ଇନିଃକେ ଧାର୍‌ମାନ୍‌ ମେନ୍ତେ କାଜିକିୟା ।” ୪ ଜେତାଏ

☆ ୩:୩୦ ୩:୩୦ ଗାଲାତିୟ ୩:୨୦.

☆ ୪:୩ ୪:୩ ଗାଲାତିୟ ୩:୬.

କାମିନିଃ ନାଲୀ ନାମେଗିୟାଏ । ଏନାକେ ଦାନ ଲେକା କାଏ ନାମେୟା ।^୫ ମେନ୍ଦ ଦେତାଏ ଆପାନାଃ କାମିରେ ଆସ୍ତା କା ଦହକେଦ୍ତେ, ପାର୍ମେଶ୍ଵାର୍ତାଃରେ ବିଶ୍ଵାସେଆ, ଆୟାଃ ବିଶ୍ଵାସ୍ ହରାତେ ଚିଟାକାନିୟାଃ ଗୁହ୍ନାକେ ରାଡ଼ା ଦାଡ଼ିତାନ୍ ପାର୍ମେଶ୍ଵାର୍ ଇନିଃକେ ଧାର୍ମାନ୍ ମେନ୍ତେ କାଜିୟା ।^୬ ଜେତା ହଡ଼ରାଃ କାଜିକାମିକେ କା ନେଲ୍ଲକେଦ୍ତେ ପାର୍ମେଶ୍ଵାର୍ ଇନିଃକେ ଧାର୍ମାନ୍ ଲେକାଏ ତେଲ୍ଲା ଦାରମିୟା, ଇନିୟାଃ ସାହାରାଅ ରିକାତାନ୍ଲଃ ଦାଉଦ୍ କାଜିକେଦାଏ :

୭ “ଜେତାଏୟାଃ ଏଡ଼କାନ୍ କାମି ଛାମାକାନା ଇନିଃ ରାସ୍କାଗିୟାଏ, ଜେତାଏ ପାପୁଛାମା ନାମାକାଦାଏ ଇନିଃ ଧାଇନ୍ଗିୟାଏ ।
୮ ଜେତାଏୟାଃ ପାପକ ପ୍ରାଭୁ କାଏ ଲେକାଏୟା ଇନିଃ ରାସ୍କାଗିୟାଏ ।”

୯ ନେତାଃରେ ଦାଉଦ୍ ଅକନ୍କକେ ରାସ୍କା କାନ୍କ ମେନ୍ତେ କାଜିତାନା, ଇନ୍କୁ ତିନାଃ ଖାଡ଼ନାଅକାନ୍ ହଡ଼କ ଏସ୍କାର୍ ତାଇକେନାକ ? କାହାଗି, କା ଖାଡ଼ନାଅକାନ୍ ହଡ଼କଆଃହଗି ରାସ୍କା ହବା ଦାଡ଼ିୟଃଆ । ଆବୁ କାଜିତାନାବୁ, ଆବ୍ରାହାମ୍ ବିଶ୍ଵାସ୍ ହରାତେ ଧାର୍ମାନ୍ ହବାକାନାଏ, ^{୧୦} ନେଆଁ ଅକ ଦିପିଲିରେ ହବାକାନ୍ ତାଇକେନା ? ଆବ୍ରାହାମ୍ଆଃ ଖାଡ଼ନାଅ ହବାୟାନ୍ ସିଦାରେଚି ତାୟମ୍ତେ ? ନେଆଁଦ ସିଦାରେ ହବାକାନ୍ ତାଇକେନା, ତାୟମ୍ତେ କାହାଗି । ^{୧୧} ଆବ୍ରାହାମ୍ଆଃ ଖାଡ଼ନାଅ ହବାୟାନ୍ ସିଦାରେ ପାର୍ମେଶ୍ଵାର୍ ଇନିଃକେ ଆୟାଃ ବିଶ୍ଵାସ୍ ହରାତେ ଧାର୍ମାନ୍ ମେନ୍ତେ କାଜିକିୟା । ନେଆଁ ଉଦୁବେ ନାଗେନ୍ତେ ମିଆଁଦ୍ ଚିହ୍ନା ଲେକାତେ ଆବ୍ରାହାମ୍ ଖାଡ଼ନାଅୟାନାଏ । ଏନାତେ ଅକନ୍କ କା ଖାଡ଼ନାଅ କାନ୍ରେୟ ପାର୍ମେଶ୍ଵାର୍କେ ବିଶ୍ଵାସ୍କିଃ ହରାତେ ଧାର୍ମାନ୍ ମେନ୍ତେକ କାଜିୟଃତାନା ଆଡ଼ଃ ଆମ୍ବିକ୍ ଲେକାତେ ଆବ୍ରାହାମ୍ ଇନ୍କୁଆଃ ଆପୁ ତାନିଃ । ^{୧୨} ଆପୁ ଆବ୍ରାହାମ୍ ଖାଡ଼ନାଅରାଃ ସିଦାରେ ଅକ ବିଶ୍ଵାସ୍ରେୟାଃ ପାରିତାଏ ଏମାକାଦ୍ ତାଇକେନାଏ, ଏନ୍ଲେକାଗି କା ଖାଡ଼ନାଅକାନ୍ ହଡ଼କହଗି ବିଶ୍ଵାସ୍ରେୟାଃ ଜୀଦାନ୍ରେକ ତାଇନଃରେଦ, ଆବ୍ରାହାମ୍ ଇନ୍କୁଆଃ ହଗି ଆପୁ ତାନିଃ ।

ବିଶ୍ଵାସୀକକେ ପାର୍ମେଶ୍ଵାର୍ଆଃ ବାନାର୍ସା

୧୩ ☆ଆବ୍ରାହାମ୍ ଆନୁରୁ ମାନାଡ଼ିଙ୍ଗ୍ କେଦ୍‌ତେଦ କାହାଗି, ମେନ୍‌ଦ ଆୟାଃ ବିଶ୍ୱାସ୍ ନାଗେନ୍ତେ ଏସ୍‌କାର୍ ପାର୍‌ମେଶ୍ୱାର୍‌ଆଃ ହରାତେ ଧାର୍‌ମାନ୍ ମେନ୍ତେ ହବାୟାନା ଆଡ଼ଃ ଏନାମେନ୍ତେ ଆୟାଃ କିଲିକ ଅଡେଦିଶ୍ୱମ୍‌ରାଃ ଆକ୍‌ଡେୟାର୍‌ତାନକ ହବାଅଃଆ ମେନ୍ତେ ପାର୍‌ମେଶ୍ୱାର୍ ବାନାର୍‌ସାଏ ଏମାକାଦ୍ ତାଇକେନା । ୧୪ ☆ଆନୁରୁ ମାନାଡ଼ିଙ୍ଗ୍‌ତାନକ ଏସ୍‌କାର୍ ପାର୍‌ମେଶ୍ୱାର୍ ଏମାକାଦ୍ ବାନାର୍‌ସାକ ନାମେରେଦ, ବିଶ୍ୱାସ୍ ଜେଡ୍‌ନାଃ ନାହ୍‌ଲାଃ ଆଡ଼ଃ ପାର୍‌ମେଶ୍ୱାର୍‌ଆଃ ବାନାର୍‌ସା ସାମା ତାନାଃ । ୧୫ ଆନୁରୁ କା ମାନାଡ଼ିଙ୍ଗ୍ ହରାତେ ପାର୍‌ମେଶ୍ୱାର୍‌ଆଃ ଖୁସ୍ ହବାଅଃଆ, ମେନ୍‌ଦ ଆନୁରୁ ବାନଃତାଃରେ, ଆନୁରୁକେ କା ମାନାଡ଼ିଙ୍ଗ୍ କାଜି ବାନଃଆ ।

୧୬ ☆ଏନାମେନ୍ତେ ପାର୍‌ମେଶ୍ୱାର୍‌ଆଃ ବାନାର୍‌ସା ବିଶ୍ୱାସ୍ ଚେତାନରେ ଠାହାରାଅକାନା । ପାର୍‌ମେଶ୍ୱାର୍ ଆୟାଃ ସାୟାଦ୍‌ତେ ନେ ବାନାର୍‌ସାକେ ଆବ୍ରାହାମ୍‌ଆଃ କିଲିକକେ ଏମାକାଦ୍‌କଆ, ଅକନ୍‌କ ଆନୁରୁକେକ ମାନାଡ଼ିଙ୍ଗ୍ ତାନା, ଇନ୍‌କୁ ନାଗେନ୍ତେ ଏସ୍‌କାର୍ ବାନାର୍‌ସା ନାହ୍‌ଲାଃ, ମେନ୍‌ଦ ଆବ୍ରାହାମ୍ ଲେକା ବିଶ୍ୱାସ୍‌ତାନ୍ ସବେନ୍‌କ ନାଗେନ୍ତେ ଏନା ତାନାଃ । ଚିୟାଃଚି ଆବ୍ରାହାମ୍ ଇନ୍‌କୁଆଃ ଆମ୍‌କ୍ ଆପୁ ତାନିଃ । ୧୭ ଧାରାମ୍ ପୁଥିରେ ଅଲ୍‌କାନା, “ଆଲେ ଆମ୍‌କେ ପୁରାଃ କିଲିରେନ୍ ଆପୁଲେ ବାଇୟାକାଦ୍‌ମେୟାଁ ।” ପାର୍‌ମେଶ୍ୱାର୍‌ଆଃ ନେପେଲ୍‌ରେ ନେ ବାନାର୍‌ସା ବୁଗିନାଃ ତାଇକେନା, ଚିୟାଃଚି ଅକ ପାର୍‌ମେଶ୍ୱାର୍‌କେ ଆବ୍ରାହାମ୍ ବିଶ୍ୱାସ୍ ତାଇକେନାଏ, ଏନ୍ ପାର୍‌ମେଶ୍ୱାର୍‌ଗି ଗଜାକାନ୍ ହଡ଼କକେ ଜୀଉବିରିଦ୍‌କଆ ଆଡ଼ଃ ଅକ୍‌ନାଃ ବାନଃତେୟାଃ ଆୟାଃ ଆନାତୁଡେ ସବେନାଃ ହବାସାକାଅଆଃ । ୧୮ ଆସ୍ରାଏ ଲେକାନାଃ ଜେଡ୍‌ନାଃ କା ତାଇକେନ୍‌ରେୟଗି, ଆବ୍ରାହାମ୍ ଆସ୍ରା ଦହକେଦ୍‌ତେ ବିଶ୍ୱାସ୍‌କାଦ୍ ତାଇକେନାଏ । ଏନାମେନ୍ତେ ଇନିଃ ପୁରାଃ ଜାଡିରେନ୍ ଆପୁ ହବାୟାନାଏ, ଚିୟାଃଚି ଧାରାମ୍‌ପୁଥି ଲେକାତେ ଇନିଃକେ ବାନାର୍‌ସା ନାମାକାନ୍ ତାଇକେନା, “ଆମାଃ କିଲିକ ସିର୍ମାରେନ୍ ପୁରାଃଚି ଇପିଲ୍‌କ ଲେକାକ ହବାଅଃଆ ।” ୧୯ ଇମ୍‌ତା ଆବ୍ରାହାମ୍‌କେ ମଣେୟାଁ ହିସି ବରାଷ୍ ହବାଅଃ ତାଇକେନା, ମେନ୍‌ଦ ଆୟାଃ ହଡ଼ମ୍ ବିଷାଏରେ

☆ ୪:୧୩ ୪:୧୩ ଗାଲାତିୟ ୩:୨୯.

☆ ୪:୧୪ ୪:୧୪ ଗାଲାତିୟ ୩:୧୮.

☆ ୪:୧୭

୪:୧୭ ଗାଲାତିୟ ୩:୭.

ଉଡ଼ୁକେଦା, ଅକ୍ନାଃତି ଗଜଃ ଲେକା ହବାଅଃ ତାଇକେନା ଚାଏ ଆୟାଃ କୁଡ଼ିତେ ସାରାରାଃ ହନ୍‌ଗାଁଣା ହବାଅଃରେୟାଃ ନେତା ପାରମଃତାନା ମେନ୍ତେ ସାରିକେଦ୍‌ରେୟ, ଆୟାଃ ବିଶ୍ୱାସ୍ କା ନାରାଦୁରାୟାନା ।^{୨୦} ଆବ୍ରାହାମ୍ ଆୟାଃ ବିଶ୍ୱାସ୍‌କେ କାଏ ବାଗିକେଦା, ଚାଏ ପାରମେଶ୍ୱାର୍‌ଆଃ ବାନାର୍‌ସାରେ କାଏ ଆଡ଼ାଃଉଡ଼ୁୟାନା । ଆୟାଃ ବିଶ୍ୱାସ୍ ଆଇଃକ୍‌କେ ପୁରାଃଗି ପେଡ଼େଃତେ ପେରେଃକିୟା ଆଡ଼ ଇନିଃ ପାରମେଶ୍ୱାର୍‌କେ ମାରାଙ୍‌କିୟା ।^{୨୧} ପାରମେଶ୍ୱାର୍ ଅକ ବାନାର୍‌ସା ଏମାକାଇ ତାଇକେନାଏ, ଏନା ଇନିଃ ରିକାଏଗିୟାଏ ମେନ୍ତେ ଆୟାଃ ପୁରା ବିଶ୍ୱାସ୍ ତାଇକେନା ।^{୨୨} ଏନାମେନ୍ତେ ଆବ୍ରାହାମ୍ ଆୟାଃ ବିଶ୍ୱାସ୍ ହରାତେ “ପାରମେଶ୍ୱାର୍‌ତେ ଧାର୍‌ମାନ୍ ମେନ୍ତେ କାଜିୟାନା ।”^{୨୩} “ଧାର୍‌ମାନ୍ ଲେକାଏ ହବାୟାନା” ମେନ୍ତେ କାଜିତେୟାଃ, ଧାରାମ୍‌ପୁଅରେ ଆବ୍ରାହାମ୍ ନାଗେନ୍ତେ ଏସ୍‌କାର୍ ଲାଗାତିଙ୍‌ୟାଃ ମେନ୍ତେଦ କାହାଗି ।^{୨୪} ଆବୁହଗି ପାରମେଶ୍ୱାର୍‌ତାଃରେ ବିଶ୍ୱାସ୍‌କେଦ୍ ହରାତେ ଧାର୍‌ମାନ୍ ଲେକାରୁ ହବାଅଃଆ । ପାରମେଶ୍ୱାର୍ ପ୍ରାଭୁ ଯୀଶୁକେ ଗନଏଃହେତେ ଜୀଉବିରିଦ୍‌କିୟାଏ ।^{୨୫} ଏନ୍ ପ୍ରାଭୁ ଯୀଶୁଗି ଆବୁଆଃ ପାପ୍‌ଛାମା ନାଗେନ୍ତେ ଗନଏଃରେ ଜିମାୟାନା ଆଡ଼ ପାରମେଶ୍ୱାର୍‌ତାଃରେ ଆବୁକେ ଧାର୍‌ମାନ୍ ବାଇରୁ ନାଗେନ୍ତେ ଯୀଶୁ ଗନଏଃହେତେ ଜୀଉବିରିଦ୍‌ୟାନାଏ ।

୫

ପାରମେଶ୍ୱାର୍‌ଲଃ ବୁଗିନ୍ ନାତା

^୧ ନାହାଁଃଦ ଆବୁ ବିଶ୍ୱାସ୍ ହରାତେ ପାରମେଶ୍ୱାର୍‌ଆଃ ନେପେଲ୍‌ରେ ଧାର୍‌ମାନ୍ ଲେକାରୁ ହବାକାନା ଆଡ଼ ପ୍ରାଭୁ ଯୀଶୁ ଖ୍ରୀଷ୍ଟ୍‌ଆଃ ହରାତେ ଆବୁ ପାରମେଶ୍ୱାର୍‌ଲଃ ଜୀଉସୁକୁରେ ମେନାବୁଆ ।^୨ ଏନ୍ ଯୀଶୁତାଃରେ ଆବୁଆଃ ବିଶ୍ୱାସ୍ ମେନାଃ ହରାତେ ନାହାଁଃ ଆବୁଆଃ ଜୀଦାନରେ ପାରମେଶ୍ୱାର୍‌ଆଃ ସାୟାଦ୍ ଆଡ଼ ପାରମେଶ୍ୱାର୍‌ଆଃ ମାନାରାଙ୍‌ରେ ହିସା ନାମେରେୟାଃ ଆସ୍ତା ମେନାଃ ହରାତେ ଆବୁ ପୁରାଃଗି ରାସ୍‌କାଅଃ ତାନାବୁ ।^୩ ଏନା ଏସ୍‌କାର୍ କାହାଗି, ସବେନ୍ ଲେକାନ୍ ଦୁକୁ ସାସାତିରେୟଗି ଆବୁ ରାସ୍‌କାଅଃ ତାନାବୁ, ଚିୟାଃତି କା ଆକ୍‌ଚାକାଅ କେଦ୍‌ତେ ସାସାତିକେ ସାହାତିଙ୍‌ଲେରେ

ମନରେ ଧରାଉଁ ହିଁକୁଃଖିଆ ଏନାକୁ ସାରିତାନା । ^୪ ନେ ଧରାଉଁହେତେ ଆବୁଆଃ ଚାଇଲ୍ ଚାଇଲ୍ କେଟେୟଃଆ ଆଡ଼ଃ କେଟେଦ୍ ଚାଇଲ୍ ଚାଇଲ୍ହେତେ ଭାର୍ସା ନାମଃଆ । ^୫ ନେ ଆସ୍ତା ଆବୁକେ କାଏ ହୁଡ଼ିଙ୍ଗ୍ଜୀଉବୁଆ, ଚିୟାଃଚି ପାର୍ମେଶ୍ୱାର୍ ଆବୁକେ ପାବିତାର୍ ଆମ୍ବା ଏମ୍କେଦ୍ତେ ଆବୁଆଃ ମନ୍ସୁରୁଦ୍ରେ ଆୟାଃ ଦୁଲ୍ଲାଡ୍ ପେରେଃକାଦାଏ ।

^୬ ଆବୁ ଦେଙ୍ଗା କା ନାମେଲେକା ତାଇକେନ୍ ଇମ୍ତା, ପାର୍ମେଶ୍ୱାର୍ଆଃ ଠାହାରାଅକାଦ୍ ଦିପିଲିରେ, ଖ୍ରୀଷ୍ଟ୍ ଏଡକନ୍ ହଡକଥାଃ ନାଗେନ୍ତେ ଗଏଃୟାନା । ^୭ ଧାର୍ମାନ ହଡ ନାଗେନ୍ତେ ଏଟାଃ ଜେତା ହଡ ଜୀଉ ଏମ୍ତେୟାଃ କାକ ନେଲ୍ଃଆ । ହବାସାକଥାଆଃ ବୁଗିନ୍ ହଡ ନାଗେନ୍ତେ ଜେତାଏ ଜୀଉ ଏମ୍ ନାଙ୍ଗ୍ ସେକାଡ୍ ଦାଡ଼ିୟଃଆଏ । ^୮ ମେନ୍ଦ୍ ଆବୁ ପାପି ତାଇକେନ୍ ଇମ୍ତାଗି ଖ୍ରୀଷ୍ଟ୍ ଆବୁ ନାଗେନ୍ତେ ଆୟାଃ ଜୀଉ ଏମ୍କେଦାଏ, ନେଆଁ ହରାତେ ପାର୍ମେଶ୍ୱାର୍ ଆବୁକେ ଚିମିନ୍ ଦୁଲ୍ଲାଡ୍ତାନାଏ ଏନାଏ ଉଦୁବ୍କେଦା । ^୯ ଖ୍ରୀଷ୍ଟ୍ରାଃ ମାୟୋମ୍ ହରାତେ ପାର୍ମେଶ୍ୱାର୍ ଆବୁକେ ଧାର୍ମାନ ମେନ୍ତେ କାଜିବୁତାନା । ତାବ୍ଦ୍ ପାର୍ମେଶ୍ୱାର୍ଆଃ ଖ୍ମ୍ସଏତେ ଖ୍ରୀଷ୍ଟ୍ ଆବୁକେ ସାର୍ଡିଗି ବାଞ୍ଛାଅବୁଆ । ^{୧୦} ଆବୁଦ୍ ପାର୍ମେଶ୍ୱାର୍ଆଃ ବାଇରି ତାଇକେନ୍ ଇମ୍ତାଗି ଆୟାଃ ହନ୍ ଆବୁଆଃ ନାଗେନ୍ତେ ଜୀଉ ଏମ୍କେଦା, ଏନା ହରାତେ ପାର୍ମେଶ୍ୱାର୍ଲଃ ଆବୁଆଃ ମେନେସା ହବାୟାନା । ପାର୍ମେଶ୍ୱାର୍ଲଃ ମେସାୟାନ୍ ତାୟମ୍ତେ ନାହାଁଃଦ୍ ଖ୍ରୀଷ୍ଟ୍ଆଃ ଜୀଦାନ୍ ହରାତେ ଆବୁ ଜୀଉ ବାଞ୍ଛାଅ ନାମେ ନାଙ୍ଗ୍ ଚିମିନ୍ ଆଦକା ସୁୟୋଗ୍ କାବୁ ନାମେୟାଁ ? ^{୧୧} ମେନ୍ଦ୍ ଏମ୍ନାଙ୍ଗ୍ ଏସକାର୍ ନାହାଁଲାଃ, ପ୍ରାଭୁ ଯୀଶୁ ଖ୍ରୀଷ୍ଟ୍ଆଃ ହରାତେ ପାର୍ମେଶ୍ୱାର୍ ଅକ କାମିକଏ ରିକାକାଦା, ଏନାମେନ୍ତେ ଆବୁଆଃ ମନ୍ସୁରୁଦ୍ ରାସକାତେ ପେରେଜାକାନା । ଏନ୍ ଯୀଶୁ ଆବୁକେ ପାର୍ମେଶ୍ୱାର୍ଲଃ ଆଡ଼ଃମିସାଏ ମେସାକାଦ୍ବୁଆ ।

ଆଦାମ୍ ଆଡ଼ଃ ଖ୍ରୀଷ୍ଟ୍

^{୧୨} ଆଦାମ୍ ପାପ୍କେଦ୍ ହରାତେ ଅତେଦିଶୁମ୍ରେ ପାପ୍ ବଲୟାନା ଆଡ଼ଃ ଆଦାମ୍ଆଃ ପାପ୍ ହରାତେ ଗନ୍ଏଃ ହିଁକୁଃୟାନା । ସବେନ୍କ ପାପ୍କେଦ୍ ହରାତେ ଗନ୍ଏଃ ସବେନ୍ ହଡକକେ ହବାଅଃଆ । ^{୧୩} ଆନ୍ତୁ ଉଦୁବଃ ସିଦାରେ ଅତେଦିଶୁମ୍ରେ ପାପ୍ ତାଇକେନା,

ମେନ୍ଦ ଆନୁରୁ କା ତାଇକେନ୍ ଇମ୍ତା ପାପ୍ କା ଲେକାଃଅ ତାଇକେନା । ୧୪ ଆଦାମ୍ତାଃଏତେ ମୁଣା ନାବାଆଃ ଦିପିଲି ଜାକେଦ୍ ଜେତାଏ ଆଦାମ୍ ଲେକା ପାର୍ମେଶ୍ଵାର୍ଆଃ ହୁକୁମ୍ କା ମାନାତିକ୍ କେଦ୍ତେ ପାପ୍ କାମି କାକ ରିକାକାଦ୍ରେୟ୍, ସବେନ୍କଆଃରେ ଗନଏଃ ହିଜୁଃୟାନା । ଅକଏୟାଃ ହିଜୁଃରାଃ ତାଇକେନା, ଇନିଃ ଆଦାମ୍ଲଃ ମିଦ୍ଲେକାଗି । ୧୫ ମେନ୍ଦ ନେ ବାରାନ୍କିନ୍ ମିଦ୍ଲେକାଗି ବାଙ୍ଗିନା । ଆଦାମ୍ଆଃ ପାପ୍ ଆତଃ ପାର୍ମେଶ୍ଵାର୍ଆଃ ବେଗାର୍ ଗନଙ୍ ଦାନ୍ ମିଦ୍ଲେକାଗି ନାହାଁଲାଃ । ମିଆଁଦ୍ ହଡ଼ଆଃ ପାପ୍ ନାଗେନ୍ତେ ପୁରାଃ ହଡ଼କ ଗଏଃୟାନା ଏନା ସାର୍ତି ତାନାଃ । ମେନ୍ଦ ପାର୍ମେଶ୍ଵାର୍ଆଃ ମାରାଙ୍ ସାୟାଦ୍ତେ, ଆତଃମିଆଁଦ୍ ହଡ଼, ପ୍ରାଭୁ ଯୀଶୁ ଖ୍ରୀଷ୍ଟଆଃ ସାୟାଦ୍ ହରାତେ ପୁରାଃ ହଡ଼କଆଃ ନାଙ୍ ଅକ ଦାନ୍ ଏମାକାନା, ଏନା ପୁରାଃଗି ପେଡେୟାନ୍ଗିୟା । ୧୬ ମିଆଁଦ୍ ହଡ଼ରାଃ ପାପ୍ ହରାତେ ହଡ଼ ବିଚାରରେ ହିଜୁଃୟାନା ଆତଃ ଗୁହ୍ନାଁ ମେନ୍ତେ ଉଦୁବ୍ୟାନା, ମେନ୍ଦ ହଡ଼କଆଃ ପୁରାଃ ପାପ୍ ହରାତେ ଆତଃ ଛାମା ନାମେଲେକା କା ତାଇକେନ୍ରେୟ୍, ପାର୍ମେଶ୍ଵାର୍ଆଃ ଏନ୍ ଦାନ୍ ହରାତେ, ନାହାଁଃ ହଡ଼ ଧାର୍ମାନ୍ନିଃ ମେନ୍ତେ ଉଦୁବ୍ ଦାଡ଼ିୟଃଆ । ୧୭ ମିଆଁଦ୍ ହଡ଼ରାଃ ପାପ୍ ହରାତେ ଗନଏଃ ସବେନ୍ ହଡ଼କତାଃରେ ରାଇଜ୍କେଦା, ମେନ୍ଦ ମିଆଁଦ୍ ହଡ଼ ଅକଏତି ଯୀଶୁ ଖ୍ରୀଷ୍ଟ୍ ଅକଆଃ ରିକାକାଦାଏ, ଏନା ଚିମିନ୍ ମାରାଙ୍ ତାନାଃ । ଅକ ହଡ଼କ ପାର୍ମେଶ୍ଵାର୍ଆଃ ପୁରାଃ ସାୟାଦ୍ତେ ବେଗାର୍ ଗନଙ୍ରେ ପାର୍ମେଶ୍ଵାର୍ତାଃରେ ଧାର୍ମାନ୍ ମେନ୍ତେକ କାଜିୟଃଆ, ଇନ୍କୁ ଜୀଦାନ୍କ ନାମେୟାଁ ଆତଃ ଏନ୍ ହଡ଼କ ଖ୍ରୀଷ୍ଟ୍ ହରାତେ ଜିନିତାଅ ଜୀଦାନ୍କ ବିତାଅୟା ।

୧୮ ମିଆଁଦ୍ ହଡ଼ରାଃ ପାପ୍ ହରାତେ ସବେନ୍ ହଡ଼କ ସାଜାଇକ ନାମକେଦା, ଏନ୍ଲେକାଗି ମିଆଁଦ୍ ହଡ଼ରାଃ ଧାର୍ମାନ୍ ହରାତେ ସବେନ୍ ହଡ଼କ ନାଙ୍ ରାଡ଼ାନ୍ ଆତଃ ନାଞ୍ଜା ଜୀଦାନ୍ ଆଉଞ୍ଜାକାଦାଏ । ୧୯ ମିହୁଡ଼୍ କାଜି କା ମାନାତିକ୍ ହରାତେ ସବେନ୍ ହଡ଼କ ପାପିକ ହବାୟାନା, ଏନ୍ଲେକାଗି ମିହୁଡ଼୍ କାଜି ମାନାତିକ୍ ହରାତେ ସବେନ୍କ ପାର୍ମେଶ୍ଵାର୍ଆଃ ଆୟାରରେ ଧାର୍ମାନ୍କ ହବାଅୟା ।

୨୦ ଆନୁରୁ ଉଦୁବ୍ୟାନ୍ ହରାତେ ଏଡ଼କାନ୍ କାଜିକାମିକ ଆବ୍କାର୍ଉରୁମ୍ୟାନା, ମେନ୍ଦ ପାପ୍ରେୟାଃ କାଜିକ

ପସାଅଃତାନୁଲଃ ପାର୍ମେଶ୍ଵାରୁଆଃ ସାୟାଦ୍‌ହଁ ପୁରାଃତେ ପସାଇଦିୟାନା । ^{୨୧} ପାପ୍ ଜେ'ଲେକା ଗନଏଃ ହରାତେ ରାଇଜେ ତାଇକେନା, ଏନଲେକାଗି ପାର୍ମେଶ୍ଵାରୁଆଃ ସାୟାଦ୍ ପ୍ରାଭୁ ଯୀଶୁ ଖ୍ରୀଷ୍ଟୁଆଃ ଦେଙ୍ଗାତେ ଆରୁ ସବେନକକେ ଧାର୍ମାନ୍ ମେନ୍ତେ କାଜିକେଦ୍‌ତେ ଜାନାଅ ଜାନାଅରେୟାଃ ଜୀଦାନ୍‌ତେ ସୁତୁଃଇଦିୟାଃ ।



ପାପ୍ ନାଗେନ୍ତେ ଗନଏଃ ଆତଃ ଖ୍ରୀଷ୍ଟୁଲଃ ମେସାନ୍ ହରାତେ ଜାନିଦ୍

^୧ ତାବ୍‌ଦ ଚିନାଃରୁ କାଜିୟା ? ପାର୍ମେଶ୍ଵାରୁଆଃ ସାୟାଦ୍ ଆତଃଗି ହବାଅଃକା ମେନ୍ତେ ଆରୁ ଚିନାଃ ପାପ୍‌ରେ ଜୀଦାନ୍‌ରୁ ବିତାଅୟା ? ^୨ କାହାଗି ଏନକାଦ ଆଲକା ହବାଅଃକା, ପାପ୍ ନାଗେନ୍ତେ ଆରୁ ଗଜାକାନା, ଏନାରେ ଆତଃ ଚିଲ୍‌କାତେ ଜୀଦାନ୍‌ରୁ ବିତାଅୟା ? ^୩ ନେଆଁ ଚିନାଃ ଆପେ କାପେ ସାରିତାନା, ବାପ୍ରିସ୍ତା ହରାତେ ଖ୍ରୀଷ୍ଟୁ ଯୀଶୁଲଃ ମେସାକେଦ୍‌ତେ ଆରୁ ଇନିୟାଃ ଗନଏଃରେ ମେସାକାନାରୁ । ^୪ ଏନାମେନ୍ତେ ବାପ୍ରିସ୍ତା ହରାତେ ଆରୁ ସବେନକ ଯୀଶୁ ଖ୍ରୀଷ୍ଟୁଆଃ ଗନଏଃରେ ହିସାଦାର୍ ହବାକେଦ୍‌ତେ ଆୟାଃଲଃ ତପାକାନାରୁ । ଇନିଃ ଜେ'ଲେକା ଆପୁଆଃ ମାନାରାଙ୍ଗ୍‌ରେୟାଃ ପେଡ଼େଃତେ ଜୀଉବିରିଦ୍‌ୟାନା, ଆରୁହଗି ଇନିୟାଃ ହରାତେ ନାଞ୍ଜା ଜୀଦାନ୍ ନାମ୍‌କେଦ୍‌ତେରୁ ବାସ୍ତାଅଃଆଁ ।

^୫ ଚିୟାଃଟି ଆରୁ ଆୟାଃ ଗନଏଃରେ ମେସାକେଦ୍‌ତେ ଇନିଃଲଃ ମିଦ୍‌କାନାରୁ, ଏନଲେକାଗି ଆରୁ ଇନିୟାଃ ଜୀଉବିରିଦ୍‌ରେ ହଗି ଆୟାଃଲଃ ମିଦ୍‌ୟାନ୍ତେ ନାଞ୍ଜା ଜୀଦାନ୍‌ରୁ ନାମେୟାଁ । ^୬ ଆରୁ ସାରିତାନାରୁ, ଖ୍ରୀଷ୍ଟୁଲଃ କୁଣ୍ ଚେତାନ୍‌ରେ ଆରୁଆଃ ମାରି ଜୀଦାନ୍ ଗଜାକାନା । ଏନାତେ ଆରୁଆଃ ପାପ୍‌ରେୟାଃ ସଭାବ୍ ଜିୟନକାନା ଆତଃ ଆରୁ ପାପ୍‌ରେୟାଃ ଦାସିହେତେ ରାଡ଼ାକାନାରୁ, ^୭ ଚିୟାଃଟି ହଡ଼ ଗଏଃୟାନ୍‌ରେ, ପାପ୍‌ରେୟାଃ ତନଲ୍‌ହେତେ ରାଡ଼ାକଆଃଏ । ^୮ ଆରୁ ଯୀଶୁ ଖ୍ରୀଷ୍ଟୁଲଃ ଗଜାକାନ୍ ହରାତେ, ଆୟାଃଲଃ ଜୀଦାନ୍‌ରୁ ନାମେୟାଁ ମେନ୍ତେରୁ ପାତିୟାରେତାନା । ^୯ ଆରୁ ସାରିତାନାରୁ,

☆ ୬:୪ ୬:୪ କଲସିୟ ୨:୧୨.

ଖ୍ରୀଷ୍ଟ ଗଜାକାନ୍ଦକଏତେ ଜୀଉବିରିଦାକାନ୍ ହରାତେ, ଇନିଃ ଆଡ଼ଃ ଚିଉଲ୍ଲାହ୍ କାଏ ଗଜଃଆ । ଆୟାଃ ଚେତାନ୍ରେ ଗନଏଃରାଃ ଆକ୍ତେୟାର୍ ଆଡ଼ଃ ବାନଃଆ । ^{୧୦} ଇନିଃ ଅକ ଗନଏଃରେ ଗଏଃୟାନା, ଏନା ହରାତେ ପାପ୍ରେୟାଃ ପେଡ଼େଃହେତେ ମିସାତେଗି ରାଡ଼ାୟାନା । ଇନିଃ ନାହାଃ ଅକ ଜୀଦାନ୍ ବିତାଅତାନାଏ, ଏନାଦ ପାର୍ମେଶ୍ଵାର୍ଲଃ ମେନେସାରେୟାଃ ଜୀଦାନ୍ ତାନାଃ । ^{୧୧} ଏନ୍ଲେକାଗି ଆପେୟ ପାପ୍ରେତେ ଗଜାକାନାଲେ ମେନ୍ତେ ଆଟ୍ଟକାରେପେ । ଆପେ ସବେନ୍କ ନାହାଃଦ ଯୀଶୁ ଖ୍ରୀଷ୍ଟଆଃ ହରାତେ ଜୀଦାନ୍ରେ ପାର୍ମେଶ୍ଵାର୍ଲଃ ମେସାକାନାପେ ।

^{୧୨} ଏନାମେନ୍ତେ ଆପେୟାଃ ଗଜଃ ହଡ଼ମ୍ରେ ପାପ୍ ଆଡ଼ଃ ଆଲକାଏ ରାଇଜେକା, ଆପେ ହଡ଼ମ୍ରେୟାଃ ଏଡ଼କାନ୍ ସାନାଙ୍ଗ୍ରେ ଆଡ଼ଃ ଆଲ୍ପେ ତାଇନା । ^{୧୩} ଆପେ ଆପ୍ନାଃ ହଡ଼ମ୍ରେଃ ଜେତାନ୍ ହିସାକେ କା ଧାର୍ମାନ୍ରେୟାଃ ହାତେୟାର୍ ଲେକା ପାପ୍ତାଃରେ ଆଲ୍ପେ ଜିମାନାଃ, ମେନ୍ଦ୍ ଗନଏଃହେତେ ଜୀଉବିରିଦକାନ୍ ଲେକା ଆପ୍ନାଃ ପାର୍ମେଶ୍ଵାର୍ଆଃ ଆୟାର୍ରେ ଜିମାନ୍ପେ, ଆଡ଼ଃ ଆପ୍ନାଃ ହଡ଼ମ୍ରେଃ ହିସାକେ ଧାର୍ମାନ୍ରେୟାଃ ହାତେୟାର୍ ଲେକା ପାର୍ମେଶ୍ଵାର୍ଆଃ ଆୟାର୍ରେ ଜିମାନ୍ପେ । ^{୧୪} ପାପ୍ ଆପେ ଚେତାନ୍ରେ ଆଲକାଏ ରାଇଜେକା, ଚିୟାଃଟି ଆପେ ଆଡ଼ଃ ଆନ୍ତୁରେୟାଃ ଆକ୍ତେୟାର୍ରେ କାପେ ତଲ୍ଲାକାନା, ମେନ୍ଦ୍ ପାର୍ମେଶ୍ଵାର୍ଆଃ ସାୟାଦ୍ତେ ନାହାଃ ଜୀନିଦ୍ ମେନାପେୟା ।

ଧାର୍ମାନ୍ରେନ୍ ଦାସି

^{୧୫} ତାଦ୍, ଆରୁ ଆନ୍ତୁରେୟାଃ ଆକ୍ତେୟାର୍ରେ କା ତାଇନକେଦ୍ତେ ପାର୍ମେଶ୍ଵାର୍ଆଃ ସାୟାଦ୍ ନାମାକାଦାବୁ ମେନ୍ତେ ତିନାଃ ପାପ୍ରେବୁ ତାଇନାଃ ? କାହାଗି ଏନ୍କାଦ୍ ଆଲକା ହବାଅଃକା । ^{୧୬} ଆପେ ତିନାଃ କାପେ ସାରିତାନା ? ଆପେ ଆପାନ୍କେ ଦାସି ଲେକା ଜିମାନାଃପେ ଇମ୍ତା, ଆପେ ସାର୍ତ୍ତିଗି ଏନ୍ ହଡ଼ମ୍ରେଃ ଦାସି ତାନ୍ପେ, ଅକନ୍ ହଡ଼କେ ଆପେ ମାନାଡ଼ିଙ୍ଗ୍ ରିକାଇୟାପେ ଇନିଃ ହବାଅଃତାନାଏ ଆପେୟାଃ ଗୁସିୟା । ଆପେ ପାପ୍ରେୟାଃ ଦାସି ହବାଅଃରେଦ୍, ଏନାରେୟାଃ ନାଲ୍ଲ ଗନଏଃ ତାନାଃ, ଚାଏ ଆପେ ପାର୍ମେଶ୍ଵାର୍କେ ମାନାଡ଼ିଙ୍ଗ୍ରେଦ୍ ଏନାରେୟାଃ ନାଲ୍ଲ ହବାଅଃତାନା ପାର୍ମେଶ୍ଵାର୍ଲଃ ଧାର୍ମାନ୍ ମେନ୍ତେପେ କାଜିୟଃଆ । ^{୧୭} ମୁସିଙ୍ଗ୍ ଆପେ ପାପ୍ରେୟାଃ ଦାସିପେ

ତାଙ୍କକେନା, ମେନ୍ଦ ପାରମେଶ୍ଵାର୍ଥାଃ ଧାନ୍ୟାବାଦ୍ ହବାଅଃକା, ନାହାଁଃ ଆପେ ସୁକ୍ଷ୍ମକାଜିହେତେ ଇତୁଆକାନ୍ ସାନାର୍ତ୍ତିକେ ମନ୍ସୁରୁଦ୍ତେ ମାନାତିଙ୍ଗ୍ ତାନାପେ । ୧୮ ଆପେ ପାପ୍ରେୟାଃ ତନଲ୍ଲହେତେ ରାଡ଼ାକେଦ୍ତେ ଧାର୍ମାନ୍ରେୟାଃ ଦାସିପେ ହବାକାନା । ୧୯ ଆପେୟାଃ କା ପେଡ଼େୟାନ୍ ହରାତେ ନେ ସବେନ୍ କାଜିକ ଆଇଙ୍ଗ୍ ଆପେକେ ହଡ଼ ଜାଗାର୍ତାନ କାଜିତେଇଙ୍ଗ୍ କାଜିପେତାନା, ମୁସିଙ୍ଗ୍ ଆପେ ଆପେୟାଃ ହଡ଼ମ୍ରେୟାଃ ହିସାକେ ସଡ଼ରା କାମି ନାଙ୍ଗ୍ ଆଡ଼ଃ ଏଡ଼କାନ୍ କାମି ନାଙ୍ଗ୍ ଦାସି ଲେକା ଜିମାକାଦ୍ ତାଇକେନାପେ । ଏନ୍ଲେକାଗି ନାହାଁଃ ପାବିତାର୍ ହବାଅଃ ନାଙ୍ଗ୍ ଆଡ଼ଃ ହଡ଼ମ୍ରେୟାଃ ସବେନ୍ ହିସାକେ ଧାର୍ମାନ୍ରେୟାଃ ଦାସି ଲେକା ହବାଅଃ ନାଙ୍ଗ୍ ଆପାନ୍କେ ପୁରା ଜିମାନ୍ପେ ।

୨୦ ଆପେ ପାପ୍ରେୟାଃ ଦାସି ତାଇକେନ୍ ଇମ୍ତା, ଧାର୍ମାନ୍ତାଃଏତେ ରାଡ଼ାକାନ୍ ତାଇକେନାପେ । ୨୧ ନାହାଁଃ ଆପେକେ ଅକ କାମିକ ରିକା ନାଗେନ୍ତେ ଗିହୁଃ ଆବ୍କାର୍ପେ ତାନା, ଏନ୍ କାମିକ ସିଦା ଆପେ ରିକା ତାଇକେନାପେ । ଏନାରେ ତିନାଃପେ ନାମାକାଦା ? ଏନ୍ ସବେନ୍ କାମିରେୟାଃ ନାଲା ହବାଅଃତାନା ଗନଏଃ । ୨୨ ମେନ୍ଦ ନାହାଁଃ ଆପେ ପାପ୍ ତନଲ୍ଲହେତେ ରାଡ଼ାୟାନ୍ଲଃ ପାରମେଶ୍ଵାର୍ଥାଃ ଦାସିପେ ହବାକାନା, ଆଡ଼ଃ ପାବିତାର୍କାନାପେ । ଏନାରେୟାଃ ଲାଡ଼ ହବାଅଃତାନା, ପାରମେଶ୍ଵାର୍ତାଃରେ ଜୀଉକେ ପୁରା ଜିମାନ୍ ଆଡ଼ଃ ଏନାରେୟାଃ ନାଲା ହବାଅଃତାନା ଜାନାଅ ଜାନାଅରେୟାଃ ଜୀଦାନ୍ । ୨୩ ପାପ୍ରେୟାଃ ନାଲା ହବାଅଃତାନା ଗନଏଃ, ମେନ୍ଦ ପାରମେଶ୍ଵାର୍ଥାଃ ବେଗାର୍ ଗନଙ୍ଗ୍ ଦାନ୍ ହବାଅଃତାନା, ପ୍ରାଡ଼ୁ ଯୀଶୁ ଖ୍ରୀଷ୍ଟଲଃ ମେସାନ୍ ହରାତେ ଜାନାଅ ଜାନାଅରେୟାଃ ଜୀଦାନ୍ ।



ଆଣ୍ଡିରେୟାଃ ଜନ୍କା

୧ ହେ ହାଗା ମିଗିକ, ନାହାଁଃଦ ଆଇଙ୍ଗ୍ ଅକଆଃ କାଜିନାଙ୍ଗ୍ ସେନ୍ତାନାଇଙ୍ଗ୍, ଏନାଦ ଆପେ ଆବ୍କାର୍ତୁରୁମ୍ ଦାଡ଼ିୟାପେ, ତିୟାଃତି ଆପେଦ ଆନ୍ତୁ ତିନାଃ ତାନାଃ ଏନାପେ ସାରିକାଦା । ହଡ଼ଦ ଆୟାଃ ଜାନିଦ୍ରେ ତାଇନଃ ଇମ୍ତା ଏସ୍କାର୍ ଆନ୍ତୁରାଃ

ତନଲରେ ତାଇନା ।^୨ ଆଣ୍ଡିକାନ କୁଡ଼ି ଆୟାଃ କଡ଼ା ଜୀନିଦ୍ ତାଇନ ଜାକେଦ୍ କଡ଼ାତେଲଃ ମୁଗାରାଃ ଆନୁରେୟାଃ ତନଲରେ ତାଇନା । ଫେନ୍ଦ କଡ଼ାତେୟାଃ ଗନଏଃ ହବାଅଃରେ, ଇନିୟାଃ କୁଡ଼ି ନେ ମୁଗାରାଃ ଆନୁ ତନଲହେତେ ରାଡ଼ାକେନଃଆ ।^୩ କଡ଼ାତେ ଜୀନିଦ୍ ତାଇନ ଇମ୍ତା, କୁଡ଼ିତେ ଏଟାଃ କଡ଼ାଲଃ ଆଣ୍ଡିୟଃରେଦ, ଇନିଃ ଆପାଜିର୍ କୁଡ଼ି ଫେନ୍ତେ କାଜିୟଃଆ, ଫେନ୍ଦ କଡ଼ାତେୟାଃ ଗନଏଃ ହବାଅଃରେ, କୁଡ଼ିତେ ମୁଗା ଏମାକାଦ୍ ଆନୁରେୟାଃ ତନଲହେତେ ରାଡ଼ାକଆଃଏ, ଏନ୍ତେ ଏଟାଃ କଡ଼ାଲଃ ଆଣ୍ଡିୟଃରେଦ, ଇନିଃ ଆପାଜିର୍ କୁଡ଼ି ଫେନ୍ତେ କାଏ କାଜିୟଃଆ ।^୪ ହେ ହାଗା ମିଶିକ, ଆପେୟ ଏନ୍ଲେକାଗି ମୁଗାରାଃ ଆନୁରେ ଗଜାକାନାପେ । ଆପେ ବାପ୍ତିସ୍ମା ହରାତେ ଖ୍ରୀଷ୍ଟଆଃ ହଡ଼ମଲଃ ଗଏଃକେଦ୍ତେ ଆୟାଃ ଜୀଉବିନିରିଦ୍ରେୟ ହିସା ହବାକାନାପେ ଆଡ଼ଃ ନାହାଁଃ ଆପେ ପାରୁମେଗ୍ବାରଆଃ ସେଝାରେ ବେଭାର୍ ଦାଡ଼ିୟଃଆପେ ।^୫ ଚିମିନ୍ ମାହାଁ ଜାକେଦ୍ ଆବୁ ଆବୁଆଃ ହଡ଼ମରେୟାଃ ଇଛାସାନାଙ୍ଗ୍ ଲେକାବୁ ତାଇକେନା । ଆନୁରେ ମାନାକାଦ୍ ଆବୁଆଃ ପାପ୍ ଆବୁଆଃ ହରାତେ ଆନୁ ପାପ୍ରେୟାଃ କାମିକଏ ରିକାଇଚିବୁ ତାଇକେନା ଆଡ଼ଃ ନେ କାମି ଆବୁଆଃ ଆମ୍ବିକରେୟାଃ ଗନଏଃ ରିକା ତାଇକେନାଏ ।^୬ ସିଦାରେୟାଃ ଆନୁ ଆବୁକେ ଆୟାଃ ତନଲରେ ତଲକାଦ୍ବୁ ତାଇକେନା, ଫେନ୍ଦ ନାହାଁଃ ଆବୁଆଃ ମାରି ସଭାବ୍ ଗଏଃୟାନା ଆଡ଼ଃ ଆବୁ ଆନୁରେୟାଃ ତନଲହେତେ ରାଡ଼ା ଚାବାକାନାବୁ । ଏନାତେ ଆବୁ ନାହାଁଃ ସିଦାଲେକା ଅନଲ୍ ଆନୁରେୟାଃ ସେଝା କାବୁ ରିକାତାନା, ଫେନ୍ଦ ପାବିତାର୍ ଆମ୍ବା ଉଦ୍ବୁତାନ୍ ନାଝା ହରାରେବୁ ସେସେନ୍ତାନା ।

ଆନୁ ଆଡ଼ଃ ପାପ୍

^୭ ତାବ୍ଦ ଚିନାଃବୁ କାଜିୟା, ଆନୁଗି ପାପ୍ତାନାଃ ? କାହାଗି, ଏନାଦ ନାହାଁଲଃ । ଫେନ୍ଦ ପାପ୍ ଚିନାଃ ତାନାଃ ଏନା ଆନୁ ଆଇଙ୍ଗ୍କେ ଉଦ୍ବୁକାଦିୟାଁ, “ଏଟାଃନିୟାଃ ଜିନିଷ୍ଟକେ ଆଲ୍ପେ ହାୟାଃଅଃଆ,” ନେ ଆନାରୁ ଆନୁରେ କା ଏମାକାନ୍ରେ, ହାୟା ଚିନାଃ ତାନାଃ, ଏନା ଆଇଙ୍ଗ୍ କାଇଙ୍ଗ୍ ସାରିତେୟାଃ ।^୮ ଫେନ୍ଦ ଏନ୍ ଆନାରୁ ହରାତେ ଆଇୟାଃ ମନ୍ରେ ଚିମିନ୍ ରାକାମ୍ରେୟାଃ

ପାପକ ରିକାନାଙ୍କ ଉପକାଶୟାନା । ମେନ୍ଦ ଆନ୍ତୁ ବାଗିକେଦ୍‌ତେ ପାପରାଃ ଜେତାନ୍ ପେଡ଼େଃ ବାନଃଆ । ୯ ମିସା ଆଇଙ୍କ୍ ଆନ୍ତୁକେ କା ସାରିକେଦ୍‌ତେ ଜୀନିଦ୍ ତାଇକେନାଇଙ୍କ୍, ମେନ୍ଦ ଆନ୍ତୁ ହିଲୁଃୟାନ୍ତି ପାପ୍ ବଲୟାନା ଆତଃ ଆଇଁୟାଃ ଗନଏଃ ହବାୟାନା । ୧୦ ଅକ ଆନ୍ତୁ ଜୀଦାନ୍ ଏମେ ନାଗେନ୍ତେ ତାଇକେନା, ଏନା ଆଇଁୟାଃ ଆମ୍ବିକ୍ ଗନଏଃ ଆଉକେଦାଏ । ୧୧ ଆନ୍ତୁରେୟାଃ ସୁଯୋଗ୍ ଇଦିକେଦ୍‌ତେ ପାପ୍ ଆଇଙ୍କ୍‌କେ ବେଦାକେଦିୟା ଆତଃ ଗଏଃକେଦିୟାଏ ।

୧୨ ଆନ୍ତୁ ପାବିତାର୍‌ଗିଆ, ଏନାରେୟାଃ ସବେନ୍ ଆନ୍ତୁ ପାବିତାର୍‌ଗିଆ, ଠାଉକାନ୍‌ଗିୟା ଆତଃ ବୁଗିନ୍‌ଗିୟା । ୧୩ ତାବ୍‌ଦ୍ ଅକ୍‌ନାଃ ବୁଗିନ୍ ତାନାଃ, ଏନା ନାଗେନ୍ତେ ଚିନାଃ ଆଇଁୟାଃ ଗନଏଃ ହବାଅଃଆ ? କାହାଗି, ଏନ୍‌କାଦ୍ ଚିଉଲାଇଅ କା ହବାଅଃଆ ? ଏନା ପାପୁଗି ରିକା କାଦାଏ । ବୁଗିନ୍ ଆନ୍ତୁ ମାନାତିଙ୍କ୍‌କେଦ୍ ହରାତେ ପାପ୍ ଆଇଁୟାଃ ଗନଏଃ ଆଉକେଦାଏ । ଏନାତେ ପାପୁରାଃ ସାରୁତି ସଭାବ୍ ଉଦୁବ୍‌ୟାନା, ଆତଃ ଆନ୍ତୁ ହରାତେ ପାପ୍ ପୁରାଃ ବରଞ୍ଜାନ୍‌ତେୟାଃ ତାନାଃ ମେନ୍ତେ ଉଦୁବ୍‌ୟାନା ।

ଆବୁଆଃ ମନ୍‌ରେ ଆଡ଼ାଃଉଡ଼ୁ

୧୪ ଆବୁ ସାରିତାନାବୁ, ଆନ୍ତୁ ଆମ୍ବିକ୍ ତାନାଃ, ମେନ୍ଦ ଆଇଙ୍କ୍ ଆମ୍ବିକ୍ ହଡ୍ ନାହାଁଲିଙ୍କ୍ । ଆଇଙ୍କ୍ ପାପୁତାଃରେ ଦାସି ଲେକାଇଙ୍କ୍ ଆଖିରିଙ୍କ୍‌କାନା । ୧୫ ଆଇଙ୍କ୍ ଚିନାଃ ରିକାତାନ୍‌ତେୟାଃ କାଇଙ୍କ୍ ଆର୍‌କାର୍‌ଉରୁମେ ତାନା । ଆଇଙ୍କ୍ ଅକ୍‌ନାଃ କାମି ସାନାଙ୍କ୍‌ତାନ୍‌ତେୟାଃ କାଇଙ୍କ୍ କାମିତାନା ମେନ୍ଦ୍ ଅକ୍‌ନାଃ ହିଲାଇଙ୍କ୍‌ତାନ୍‌ତେୟାଃ କାମିତାନା । ୧୬ ଅକଆଃ ରିକାତାନା, ଏନା ଆଇଁୟାଃ ଇଛା ସାନାଙ୍କ୍ ବିରୁଧ୍‌ରେ ରିକା ତାନାଇଙ୍କ୍, ଏନାମେନ୍ତେ ଆନ୍ତୁ ବୁଗିନାଃ ମେନ୍ତେ ଆର୍‌କାରେତାନା । ୧୭ ଏନାତେ ଏନ୍ କାମି ଆଇଙ୍କ୍ କାଇଙ୍କ୍ ରିକାତାନା ମେନ୍ଦ୍ ଆଇଁୟାଃ ମନ୍ ଭିତାର୍‌ରେ ତାଇନ୍‌ତାନ୍ ପାପ୍ ଏନାକେ ରିକାତାନା । ୧୮ ଆଇଙ୍କ୍ ସାରିତାନାଇଙ୍କ୍, ଆଇଁୟାଃ ହଡ଼ମ୍‌ରେ ଜେତାନ୍ ବୁଗିନାଃ ବାନଃଆ, ଚିଆଃତି ବୁଗିନ୍ କାମି ରିକା ନାଗେନ୍ତେ ଆଇଁୟାଃ ଇଛାସାନାଙ୍କ୍ ତାଇନ୍‌ରେୟ ଏନା

କାଈଁ କାମି ଦାଡ଼ିତାନା । ୧୯ ଏନାମେନ୍ତେ ଅକ ବୁଗିନ୍ କାମି ରିକା ନାଗେନ୍ତେ ଆଇଁୟାଃ ଇଛାସାନାଙ୍ଗ୍ ମେନାଃ, ଏନା କା କାମିକେଦ୍‌ତେ, ଆଇଁୟାଃ ଇଛାସାନାଙ୍ଗ୍ ବିରୁଧ୍‌ରେୟାଃ ଏଡ଼କାନ୍ କାମିକଗିଇଙ୍ଗ୍ ରିକାତାନା । ୨୦ ଆଇଁୟାଃ ଇଛାସାନାଙ୍ଗ୍ ବିରୁଧ୍‌ରେ ଅକ କାମିକଇଙ୍ଗ୍ ରିକାତାନା, ସାର୍‌ଡ଼ିଗି ଏନ୍ କାମିକଦ୍ ଆଇଙ୍ଗ୍ କାଈଙ୍ଗ୍ କାମିତାନା, ଆଇଙ୍ଗ୍‌ରେ ତାଇନ୍‌କାନ୍ ପାପ୍ ନେ କାମିକଏ ରିକାତାନା ।

୨୧ ଏନ୍ ଲେକାଗି ଆଇଙ୍ଗ୍ ନେ ଆନ୍‌ରୁରେ ନାମାକାଦାଈଙ୍ଗ୍, ଆଇଙ୍ଗ୍ ବୁଗିନାଃ କାମିନାଙ୍ଗ୍ ସାନାଙ୍ଗ୍‌ତାନ୍ ଇମ୍‌ତା, ଏଡ଼କାନ୍ କାମି ଏସ୍‌କାର୍ କାମିୟାଃଇଙ୍ଗ୍ । ୨୨ ପାର୍‌ମେଶ୍‌ବାର୍‌ଆଃ ଆନ୍‌ରୁ ମାନାତିଙ୍ଗ୍ ନାଗେନ୍ତେ ଆଇଁୟାଃ ସାନାଙ୍ଗ୍, ୨୩ ମେନ୍‌ଦ୍ ଆଇଁୟାଃ ମନ୍‌ରେ ନେ ଇଛାସାନାଙ୍ଗ୍ ବିରୁଧ୍‌ରେ ଆଇଁୟାଃ ହଡ଼ମ୍‌କେ ଆକ୍‌ତେୟାର୍‌ରେତାନ୍ ଆନ୍‌ରୁ ସବେନ୍ ଇମ୍‌ତା ଲାପାଡ଼ାଇତାନାଏ । ଆଇଁୟାଃ ହଡ଼ମ୍‌ରେ କାମିୟାଃତାନ୍ ଏନ୍ ପାପ୍ କାମିକ ଆଇଙ୍ଗ୍‌କେ ତଲ୍‌କେଦ୍‌ତେ ଦହକାଦିୟାଁ । ୨୪ ହାଏ, ଆଇଙ୍ଗ୍ ଚିମିନ୍ କା ସୁକୁତାନ୍ ହଡ଼ତାନିଙ୍ଗ୍, ଗନଏଃ ଗାଡ଼ାତେ ଇଦିତାନ୍ ନେ ହଡ଼ମ୍‌ରେୟାଃ କାମିଏତେ ଆଇଙ୍ଗ୍‌କେ ଅକଏ ବାସ୍ତାଅୟାଁଏ ? ୨୫ ପାର୍‌ମେଶ୍‌ବାର୍‌ଆଃ ଧାନ୍ୟାବାଦ୍ ହବାଅଃକା, ପ୍ରାଭୁ ଯିଶୁ ଖ୍ରୀଷ୍ଟ୍‌ଆଃ ହରାତେ ନେ ସବେନାଃ ହବାକାନା । ଏନାତେ, ନେଆଁ ହବାଅଃତାନା ଆଇଁୟାଃ ଦାସା । ଆଇଙ୍ଗ୍ ପାର୍‌ମେଶ୍‌ବାର୍‌ଆଃ ଆନ୍‌ରୁକେ ଏସ୍‌କାର୍ ଆଇଁୟାଃ ମନ୍‌ରେ ମାନାତିଙ୍ଗ୍ ଦାଡ଼ିୟାଈଙ୍ଗ୍ । ମେନ୍‌ଦ୍ ଆଇଁୟାଃ ମାନଖା ସଭାବ୍ ଆଇଙ୍ଗ୍‌କେ ପାପ୍‌ରେୟାଃ ଦାସି ହବାଅଃ ନାଗେନ୍ତେ ଆରୁଇଙ୍ଗ୍‌ତାନା ।

୮

ଆମ୍ବାରେୟାଃ ଜୀଦାନ୍

୧ ନାହାଃ ଅକନ୍‌କ ଖ୍ରୀଷ୍ଟ୍ ଯିଶୁଲ୍‌ଃ ମେସାକେଦ୍‌ତେ ଜୀଦାନ୍ ବିତାଅଆଃକ, ଇନ୍‌କୁ ଆଡ଼ଃ ସାଜାଇ କାକ ନାମେୟା । ୨ ପାବିତାର୍ ଆମ୍ବା ଅକ ଆନ୍‌ରୁ ହରାତେ ଆରୁକେ ଖ୍ରୀଷ୍ଟ୍ ଯିଶୁଲ୍‌ଃ ମେସାକେଦ୍‌ତେ ଅକ ଜୀଦାନ୍ ଏମାକାଦ୍‌ରୁଆଏ, ଏନା ହରାତେ ଆରୁ ପାପ୍ ଆଡ଼ଃ ଗନଏଃରେୟାଃ ଆନ୍‌ରୁହେତେ ରାଡ଼ାକାନାରୁ । ୩ ମାନଖାରାଃ ସଭାବ୍‌ରେ ପେଡ଼େଃ ବାନଃ ହରାତେ ମୁଗିା ନାବୀ ଏମାକାଦ୍ ଆନ୍‌ରୁକେ ମାନାତିଙ୍ଗ୍ କାଏ ଦାଡ଼ିକେନା, ଏନାକେ ପାର୍‌ମେଶ୍‌ବାର୍

ରିକାକେଦାଏ । ମାନଙ୍କା ଜୀଦାନରେ ପାପକେ ଜିୟନେ ନାଗେନ୍ତେ
 ଇନିଃ ଆୟାଃ ହନ୍କେ ପାପି ମାନଙ୍କା ଲେକାଏ କୁଲକିୟା ଆତଃ ଖ୍ରୀଷ୍ଟ
 ଯୀଶୁ ପାପରେୟାଃ ପେଡ଼େଃକେ ଜିୟନକେଦା । ୪ ଏନାମେନ୍ତେ
 ନାହାଃ ଆବୁ ମାନଙ୍କା ସଭାବରେୟାଃ ଆକ୍ତେୟାରରେ କା
 ତାଇନକେଦତେ ପାବିତାର୍ ଆମ୍ବାରେୟାଃ ହରାତେବୁ ସେସେନ୍ତାନା
 ଆତଃ ନେଆଁ ହରାତେ ଆବୁ ଆନରୁରେୟାଃ ଧାର୍ମାନ୍ ହାଟିବୁ
 ପୁରାକାଦା । ୫ ଅକନ୍ ହଡକ ମାନଙ୍କା ସଭାବ ଲେକା ଜୀଦାନକ
 ବିତାଅଆଃ, ଇନ୍କୁଆଃ ମନ୍ ଉଡ଼ୁକ, ଏନ୍ ସଭାବ ଲେକାଗି
 କାମିଇଚିକଆ । ମେନ୍ଦ ଅକନ୍ ହଡକ ପାବିତାର୍ ଆମ୍ବାରାଃ କାଜି
 ଲେକା କାମିୟାଃକ, ଇନ୍କୁଆଃ ମନ୍ରାଃ ଉଡ଼ୁ ପାବିତାର୍ ଆମ୍ବାରାଃ
 ସାନାଙ୍ଗ ଲେକା ତାଇନାଃ । ୬ ଚିୟାଃଚି ମନ୍, ମାନଙ୍କା ସଭାବରେୟାଃ
 ଆକ୍ତେୟାରରେ ତାଇନଃରେଦ, ଏନାରେୟାଃ ନାଲା ଗନଏଃ
 ନାମଃଆ, ଆତଃ ପାବିତାର୍ ଆମ୍ବାରେୟାଃ ଆକ୍ତେୟାରରେ
 ତାଇନଃରେଦ ଏନାରେୟାଃ ନାଲା ଜୀଦାନ୍ ଆତଃ ଜୀଉସୁକୁ
 ନାମଃଆ । ୭ ଆତଃ ମନ୍, ମାନଙ୍କା ସଭାବରେୟାଃ ଆକ୍ତେୟାରରେ
 ତାଇନଃ ହରାତେ ହଡ ପାରମେଶ୍ଵାର୍ଆଃ ବାଇରି ହବାଅଃଆଏ,
 ଚିୟାଃଚି ଇନିଃ ପାରମେଶ୍ଵାର୍ଆଃ ଆନ୍ରୁ କାଏ ମାନାତିୟାଃ ଆତଃ
 ଇନିଃ ଏନାକେ କାଏ ମାନାତିଙ୍ ଦାଡ଼ିୟା । ୮ ଅକନ୍ ହଡକ ମାନଙ୍କା
 ସଭାବ ଲେକାତେ କାମିୟାଃକ, ଇନ୍କୁ ପାରମେଶ୍ଵାର୍କେ କାକ
 ସୁକୁଇଚି ଦାଡ଼ିୟା ।

୯ ପାରମେଶ୍ଵାର୍ଆଃ ପାବିତାର୍ ଆମ୍ବା ସାର୍ତିଗି ଆପେରେ
 ମେନାଇରେଦ, ଆପେ ମାନଙ୍କା ସଭାବ ଲେକାତେ ଜୀଦାନ୍ କାପେ
 ବିତାଅ ତାନା, ମେନ୍ଦ ଜୀଦାନରେ ପାବିତାର୍ ଆମ୍ବାରାଃ ଆନାରୁପେ
 ମାନାତିଙ୍ଗ ତାନା । ଖ୍ରୀଷ୍ଟଆଃ ଆମ୍ବା ଜେତାଏତାଃରେ ବାଙ୍ଗାୟା,
 ଇନିଃ ଚିଉଲାଅ ଆୟାଃ ହଡ କାଏ ହବା ଦାଡ଼ିୟଃଆ । ୧୦ ମେନ୍ଦ
 ଖ୍ରୀଷ୍ଟ ଆପେରେ ମେନାଇରେଦ, ଆପେୟାଃ ହଡମ୍ ପାପ୍ ନାଗେନ୍ତେ
 ଜିୟନଃତେ ସେନଃତାନରେୟ, ପାବିତାର୍ ଆମ୍ବା ଆପେକେ ଜୀଦାନ୍
 ଏମାପେୟାଏ, ଚିୟାଃଚି ଆପେ ପାରମେଶ୍ଵାର୍ଆଃ ଆୟାରରେ
 ଧାର୍ମାନ୍ ଲେକାପେ ହବାକାନା । ୧୧ ✠ୟୀଶୁକେ ଗନଏଃହେତେ
 ଜୀଉ ବିରିଦାକାଇ ପାରମେଶ୍ଵାର୍ଆଃ ଆମ୍ବା ଆପେରେ ମେନାଃରେଦ,

ଗନଏକଏତେ ଖ୍ରୀଷ୍ଟ ଯୀଶୁକେ ଜୀଉବିରିଦକାଇ ପାର୍ମେଶ୍ୱାର, ଆପେତାଠରେ ତାଇନିଠତାନ୍ ଆୟାଃ ଆପ୍ତନାଃ ଆମ୍ବା ହରାତେ ଆପେୟାଃ ଗଜଃ ହଡ଼ମକେହରି ଜୀଦାନ୍ ଏମେୟାଏ ।

୧୨ ଏନାତେ, ହେ ହାଗା ମିଶିକ, ଆବୁ ରିଶୀକାନାବୁ, ମେନ୍ଦ ଆବୁଆଃ କାମି ହବାଅଃତାନା, ମାନଝା ସଭାବ୍ ଲେକାତେ ଜୀଦାନ୍ କାରୁ ବିତାଅୟା । ୧୩ ଚିୟାଃତି ଆପେ ମାନଝା ସଭାବ୍ ଲେକାତେ ଜୀଦାନ୍ ବିତାଅଲେରେ ଆପେୟାଃ ଗନଏଃ ହବାଅଃଆ, ମେନ୍ଦ ପାବିତାର୍ ଆମ୍ବରେୟାଃ ଦେଙ୍ଗାତେ ଆପେୟାଃ ପାପ୍ରେୟାଃ କାମିକ ବାଗିକେଦତେ ଆତଃ ପାପ୍ କାମି କାପେ ରିକାଏରେଦ ଆପେ ଜୀହୁଦଃଆପେ । ୧୪ ଅକନ୍ ହଡ଼କ ପାର୍ମେଶ୍ୱାର୍ଆଃ ଆମ୍ବାତେ ସୁତୁଃଈଦିୟଃଆକ, ଇନ୍କୁ ପାର୍ମେଶ୍ୱାର୍ଆଃ ହନ୍କ ତାନ୍କ । ୧୫ ଚିୟାଃତି ପାର୍ମେଶ୍ୱାର୍ ଏମାକାଦ୍ ଏନ୍ ଆମ୍ବା ଆପେକେ ଦାସିହେତେ ରାଡ଼ାକାଦ୍ପେୟା, ଆପେକେ ଆତଃ ବର କା ଲାଗାତିଙ୍ଗ୍ୟାୟାଃ । ମେନ୍ଦ ପାବିତାର୍ ଆମ୍ବା ଆପେକେ ପାର୍ମେଶ୍ୱାର୍ଆଃ ହନ୍ ହବାଅଃ ନାଗେନ୍ତେ ସୁଯୋଗ୍ ଏମାକାଦ୍ପେୟାଏ । ଆୟାଃ ପେଡ଼େଃ ଆଟ୍ଟକାର୍କେଦତେ ଆବୁ ନାହାଁଃ ପାର୍ମେଶ୍ୱାର୍କେ “ଆବା” ମେନ୍ତେବୁ କାଜି ଦାଡ଼ିତାନା । ୧୬ ପାର୍ମେଶ୍ୱାର୍ଆଃ ଆମ୍ବା ଆଇଃକ୍ତି ଆବୁଆଃ ମନ୍ସୁରୁଦ୍ଲଃ ମେସାକେଦତେ ଆବୁକେ ପାର୍ମେଶ୍ୱାର୍ଆଃ ହନ୍ତାନ୍ଦେ ମେନ୍ତେ ଉଦୁବେତାନା । ୧୭ ଆବୁ ପାର୍ମେଶ୍ୱାର୍ଆଃ ହନ୍ତାନ୍ଦୁ ମେନ୍ତେ, ଆୟାଃ ହଡ଼କଆଃ ନାଗେନ୍ତେ ଦହକାନ୍ ଆଗିଷ୍ଟରେ ଆବୁ ହିସାବୁ ନାମେୟା । ଆତଃ ଖ୍ରୀଷ୍ଟ ନାଗେନ୍ତେ ପାର୍ମେଶ୍ୱାର୍ ଅକ୍ନାଃ ଦହକାଦାଏ, ଏନାରେୟାଗି ଆବୁ ହିସାବୁ ନାମେୟା । ଆବୁ ଯୀଶୁଆଃ ଦୁକୁରେ ହିସାବୁ ନାମାକାଦ୍ରେଦ, ଆୟାଃ ମାନାରାଙ୍ଗ୍ରେୟାଗି ହିସାବୁ ନାମେୟା ।

ହିନିଜୁଃ ଦିପିଲିରେୟାଃ ମାନାରାଙ୍ଗ୍

୧୮ ଆବୁ ଅକ ମାନାରାଙ୍ଗ୍ରେୟାଃ ହିନିଜୁଃ ଦିପିଲିରେ ବଲଆବୁ, ଏନାରେୟାଃ ଜକାରେ ନାହାଁଃରେୟାଃ ଦୁକୁହାସୁ ଜେଡ଼ନାଃ ନାହାଁଲୀଃ । ଏନ୍ ଦିପିଲିରେ ପାର୍ମେଶ୍ୱାର୍ ଆୟାଃ ହନ୍କକେ ଉଦୁବାକଆ

☆ ୮:୧୫ ୮:୧୫ ମାର୍ଚ୍ଚ ୧୪:୩୬; ଗାଲାତିୟ ୪:୬.

। ୧୯ ସବେନ୍ ବାଇୟାକାନ୍‌ତେୟାଃକ ପୁରାଃ ଆସ୍ତାଏତାନ୍‌ଲଃ ପାର୍‌ମେଶ୍ଵାର୍‌ଆଃ ହନ୍‌କଆଃ ଉନ୍‌ଦୁବ୍ ଦିପିଲିକେ ନେଲ୍ ହରାଏତାନା । ୨୦ ଚିୟାଃଚି ପାର୍‌ମେଶ୍ଵାର୍ ବାଇୟାକାଦ୍‌ତେୟାଃ ଆୟାଃ ହରାତେ ସାର୍‌ପାଅୟାନ୍‌ଲଃ ଏନାରେୟାଃ ଉଦ୍‌ବେଶ୍ ଆଦ୍‌ୟାନା, ଏନ୍‌ରେୟ ଏନାରେୟାଃ ଆସ୍ତା ମେନାଃ ୨୧ ଯେ, ମୁସିଙ୍ଗ୍ ହୁଲାଙ୍ଗ୍ ପାର୍‌ମେଶ୍ଵାର୍‌ଆଃ ହନ୍‌କଆଃ ମାନାରାଙ୍ଗ୍‌ରେ ହିସା ହବାକେଦ୍‌ତେ, ବାଇୟାକାନ୍‌ତେୟାଃ ଜିୟନଃରେୟାଃ ଦାସିହେତେ ରାଡ୍‌ଆଃଆ । ୨୨ ଚିଆଃଚି ଆବୁ ସାରିତାନାବୁ, ନାହ୍‌ଆଃ ଜାକେଦ୍ ସବେନ୍ ବାଇୟାକାନ୍‌ତେୟାଃ ହନ୍ ଜାନାମିଃ ଇମ୍‌ତାରେୟାଃ ଦୁକୁ ନାମେ ଲେକା ଦୁକୁଃତାନ୍‌ଲଃ ରାଆଃଗେରାଙ୍ଗ୍‌ଆଃ ତାନା । ୨୩ ☆ବାଇୟାକାନ୍‌ତେୟାଃ ଏସକାର୍ କାଏ ରାଆଃଗେରାଙ୍ଗ୍ ତାନା, ମେନ୍‌ଦ ଆବୁହଗି ଏନ୍‌ଲେକା ରାଆଃଗେରାଙ୍ଗ୍ ତାନ୍‌ଲଃ ମେନାବୁଆ । ପାର୍‌ମେଶ୍ଵାର୍‌ଆଃ ପାହିଲା ଦାନ୍ ଲେକା ପାବିତାର୍ ଆମ୍‌କେବୁ ନାମ୍‌କିୟା । ଏନ୍‌ରେୟ ପାର୍‌ମେଶ୍ଵାର୍‌ଆଃ ହନ୍‌କ ବାଇୟାଃକାବୁ ଆଡ଼ଃ ପୁରା ରାଡ୍‌ଆଃ ନାମେକାବୁ ମେନ୍ତେ ଆବୁହଗି ତାଙ୍ଗିତାନାବୁ । ୨୪ ଚିୟାଃଚି ଆସ୍ତା ଦହ ହରାତେଗି ଆବୁ ବାଞ୍ଛାଅ ନାମାଃବୁ । ମେନ୍‌ଦ ଅକ୍‌ନାଃ ନେଲଃତାନା, ଏନା ନାଗେନ୍ତେ ଆସ୍ତା ଦହଃତେୟାଃ ସାର୍‌ଚି ଆସ୍ତା ନାହ୍‌ଲାଃ । ଜେତାଏ ଚିନାଃ ନେଲଃତାନ୍ ବିଷାଏ ନାଗେନ୍ତେ ଆସ୍ତାଏଆ ? ୨୫ ମେନ୍‌ଦ ଆବୁ କା ନେଲଃତାନ୍ ବିଷାଏ ନାଗେନ୍ତେବୁ ଆସ୍ତାଏ ରେଦ, ଆବୁକେ ଧିରାଜ୍ ସାବ୍‌କେଦ୍‌ତେ ତାଙ୍ଗି ଲାଗାତିଙ୍ଗ୍‌ୟାଃ ।

୨୬ ଏନ୍‌ଲେକାଗି ଆବୁ ନାରାଦୁରାଗିୟାବୁ ମେନ୍‌ଦ ପାବିତାର୍ ଆମ୍‌ ଆବୁକେ ଦେଙ୍ଗାଏଃ । ଚିଲ୍‌କା ବିନ୍ତି ଚିକା ଲାଗାତିଙ୍ଗ୍‌ୟାଃ, ଏନା ଆବୁ କାବୁ ସାରିୟାଃ । ଏନାମେନ୍ତେ ପାବିତାର୍ ଆମ୍‌ ଆବୁଆଃ କା କାଜିୟାଃତାନ୍ କାଜିରେ ଆବୁ ନାଗେନ୍ତେ ପାର୍‌ମେଶ୍ଵାର୍‌ତାଃରେ ବିନ୍ତି ତାନା । ୨୭ ପାର୍‌ମେଶ୍ଵାର୍‌ଦ୍‌ ଆବୁଆଃ ମନ୍‌ସୁରୁଦ୍‌କେ ସାରିୟାଃଏ, ଚିୟାଃଚି ଇନିଃଦ୍ ସବେନାଃ ସାରିନିଃ ତାନିଃ ଆଡ଼ଃ ପାବିତାର୍ ଆମ୍‌ ପାର୍‌ମେଶ୍ଵାର୍‌ଆଃ ସାନାଙ୍ଗ୍ ଲେକାତେ ଆୟାଃ ହଡ଼କ ନାଗେନ୍ତେ ବିନ୍ତି ତାନା ।

୨୮ ଆବୁ ସାରିତାନାବୁ ଯେ, ଅକନ୍‌କ ପାର୍‌ମେଶ୍ଵାର୍‌ଆଃ ଇଛା ସାନାଙ୍ଗ୍‌କେ ପୁରାଏ ନାଗେନ୍ତେକ କେଡ୍‌କାନା ଆଡ଼ଃ

☆ ୮:୨୩ ୮:୨୩ ୨ କରିନ୍ତ୍ରିୟ ୫:୨-୪.

ପାର୍ମେଶ୍ଵାରକେ ଦୁଲ୍ଲାଡ଼ାଃକ, ଇନ୍କୁ ନାଗେନ୍ତେ ସବେନାଃ
 ବୁଗିନ୍ଗି ହବାଅଃଆ । ୨୯ ଅକନକକେ ପାର୍ମେଶ୍ଵାର ସିଦାରେଗି
 ସାଲାକାଦକଆ, ଇନ୍କୁକେ ଆୟାଃ ହନ୍ଆଃ ଲେକା ହବାଅଃ
 ନାଗେନ୍ତେ ସାଲାକାଦକଆ, ଏନାତେ ପାର୍ମେଶ୍ଵାରଆଃ ହନ୍ ପୁରାଃ
 ହାଗା ମିଶିକଏତେ ମୁଡ଼କୁଲ୍ ହନ୍ ହବାଅଃଆଏ । ୩୦ ଆଡ଼ଃ ଅକନକ
 ନେ'ଲେକା ସାଲାକେଦତେ କେଡ଼ାକାନାକ, ଇନ୍କୁ ପାର୍ମେଶ୍ଵାରଆଃ
 ଆୟାରରେ ଧାରମାନ ଲେକା ହବାକେଦତେ ଇନିଃ ଆୟାଃ
 ମାନାରାଙ୍ଗକେ ଇନ୍କୁଡ଼ାଃରେ ଉଦୁବକାଦା ।

ପାର୍ମେଶ୍ଵାରଆଃ ଦୁଲ୍ଲାଡ଼

୩୧ ଏନାତେ, ନେ ସବେନ୍ ବିଷାଏରେ ଆଡ଼ଃ ଚିନାଃରୁ କାଜିୟା
 ? ପାର୍ମେଶ୍ଵାର ଆରୁଲଃ ମେନାଇରେଦ ଅକଏ ଆରୁଆଃ
 ବିରୁଧରେ ହବା ଦାଡ଼ିୟଃଆ ? ୩୨ ପାର୍ମେଶ୍ଵାର ଆରୁଆଃ
 ବିରୁଧରେ କାଏ ହବାଅଃଆ, ଚିୟାଃଚି ଇନିଃ ଆୟାଃ ଆପନାଃ
 ହନ୍କେହଗି କା ବାଞ୍ଚାଅକେଦତେ ଆରୁ ନାଗେନ୍ତେ ଦାନ ଏମକିୟାଏ
 । ଏନ୍ରେଦ, ଇନିଃ ଚିନାଃ ଆରୁକେ ସବେନ୍ ବିଷାଏ କାଏ
 ଏମାରୁଆ ? ୩୩ ପାର୍ମେଶ୍ଵାରଆଃ ସାଲାକାନ ହଡ଼କଆଃ ବିରୁଧରେ
 ଅକଏ ଚିଟା ଦାଡ଼ିକଆଏ ? ଇନ୍କୁକେ ବେଗାର ଗୁହ୍ନା ମେନ୍ତେ
 ପାର୍ମେଶ୍ଵାର ଆଇଃକଗି କାଜିକାଦା । ୩୪ ତାବଦ ଅକଏ ଇନ୍କୁକେ
 ସାଜାଇ ଏମ୍ ଦାଡ଼ିୟାଏ ? ଯୀଶୁ ଖ୍ରୀଷ୍ଟ ଚିତ୍ତଲହ ଏନ୍କା କାଏ
 ରିକାୟା, ଚିୟାଃଚି ଇନିଃ ଗନଏଃହେତେ ଜୀଉବିରିଦକେଦତେ
 ପାର୍ମେଶ୍ଵାରଆଃ ଜମସାଃରେ ଦୁବାକାନା । ଇନିଃହ ଆରୁ ନାଗେନ୍ତେ
 ପାର୍ମେଶ୍ଵାରତାଃରେ ବିକ୍ରିତାନା । ୩୫ ତାବଦ ଅକଏ ଆରୁକେ
 ଖ୍ରୀଷ୍ଟଆଃ ଦୁଲ୍ଲାଡ଼ହେତେ ବିନ୍ଗାଅ ଦାଡ଼ିୟା ? ଦୁକୁ, ହାସ୍ତ, ସାସାତି,
 ରିଙ୍ଗା, ନାରାଦୁରା, ବରଝାନରେ, ଆଡ଼ଃ ଗନଏଃ ଚିନାଃ ବିନ୍ଗାଅ
 ଦାଡ଼ିୟାଏ ? ୩୬ ଧାରାମ୍ପୁଥିରେ ଅଲ୍ଲାକାନା,

“ଆପେ ନାଗେନ୍ତେ ଆଲେ ସବେନ୍ ହୁଲ୍ଲାଙ୍ଗ ଗନଏଃରେୟାଃ
 ଆୟାରରେ ମେନାଲେୟା,

ଆଲେ ମାଆଃ ନାଗେନ୍ତେ ଇଦିୟଃତାନ ମିଣ୍ଡି ଲେକାଲେ
 ହବାକାନା ।”

୩୭ ଏନ୍ରେୟ, ଅକଏ ଆରୁକେ ଦୁଲ୍ଲାଡ଼, ତାନାଏ, ଇନିୟାଃ
 ଦେଙ୍ଗାତେ ଆରୁ ନେ ସବେନାଃରେ ଜିତାଅ କାନାରୁ । ୩୮ ଆଇଙ୍ଗ

ସାର୍ବତ୍ରିକ୍ ସାରିତାନା ଯେ ଆୟାଃ ଦୁଲ୍ଲାଡ୍ ହରାତେ ଆବୁ
 ଚିତ୍ତଲ୍ଲାହ୍ କାବୁ ବିନ୍‌ଗାଅଃଆ । ଗନଏଃ ଚାଏ ଜୀଦାନ୍, ଦୁଢ଼କ
 ଚାଏ ସିର୍ମା ରାଇଜ୍‌ରେୟାଃ ଜେତାନ୍ ପେଡେଃ ଚାଏ ଆକ୍‌ଡେୟାର୍
 ନାମାକାଦ୍‌ଡେୟାଃ, ନାହାଃ ଚାଏ ହିଜ୍‌ଜୁଃ ଦିପିଲି, ୩୯ ଅତେ
 ଚେତାନ୍‌ରେ ଚାଏ ଅତେ ଲାତାର୍‌ରେ ଜେତାନ୍ ବିଷାଏ ଆଡଃ
 ସବେନ୍ ବାଇୟାକାନ୍‌ଡେୟାଃରେ ନେ ଲେକାନ୍ ଜେତାନ୍ ବିଷାଏ
 ବାନଃଆ, ଅକ୍‌ନାଃଚି ପ୍ରାଭୁ ଯୀଶୁ ଖ୍ରୀଷ୍ଟୁଆଃ ହରାତେ ଉନ୍ନୁଦ୍‌ବକାନ୍
 ପାର୍‌ଫେଶ୍‌ବାର୍‌ଆଃ ଏନ୍ ଦୁଲ୍ଲାଡ୍‌ହେତେ ଆବୁକେ ବିନ୍‌ଗାଅ ଦାଡ଼ିୟା ।



ପାର୍‌ଫେଶ୍‌ବାର୍‌ ଆଡଃ ଆୟାଃ ହଡ଼କ

୧ ଆଇଜ୍ ସାର୍‌ତ୍ରିକ୍ କାଜିତାନା, ଆଇଜ୍ ଖ୍ରୀଷ୍ଟୁଆଃ ହବାକାନ୍
 ହରାତେ କାଇଜ୍ ବେଦାତାନା । ଆଇୟାଃ ବିବେକ୍ ପାବିତାର୍
 ଆମ୍‌ରାଃ ଆକ୍‌ଡେୟାର୍‌ତେ ଗାଞ୍ଜାଏ ଏଫେତାନା । ୨ ଆଇୟାଃ
 ପୁରାଃଗି ଦୁକୁ ଫେନାଃ, ଚିମିନ୍‌ଗି କା ଟୁଣ୍ଡୁ ହାସୁକ ଆଇୟାଃ
 ମନ୍‌ସୁରୁଦ୍‌ରେ ଫେନାଃ । ୩ ଚିଆଃଚି ଅକନ୍‌କ ହଡ଼୍‌ଫଲେକାତେ
 ଆଇୟାଃ ଆପ୍‌ନାଃ ତାନ୍‌କୁ, ନେ'ଲେକାଚି ଆଇୟାଃ ହାଗା
 ମିଗିକ ନାଗେନ୍ତେ ଆଇଜ୍‌ଗି ଖ୍ରୀଷ୍ଟୁଆଃଏତେ ହିଗାଡ଼କେଦ୍‌ତେ
 ପାର୍‌ଫେଶ୍‌ବାର୍‌ଆଃ ହରାତେ ସାର୍‌ପାଅଃ ନାଜ୍ ସାନାଜ୍‌କେଦାଇଜ୍ ।
 ୪ ଚିୟାଃଚି ଇନ୍‌କୁଦ୍ ଇସ୍ରାଏଲ୍‌ରେନ୍ ହଡ଼କତାନ୍‌କ । ପାର୍‌ଫେଶ୍‌ବାର୍‌
 ଇନ୍‌କୁକେ ଆୟାଃ ଆପ୍‌ନାଃ ହନ୍ ଲେକା ବାଇକେଦ୍‌ତେ
 ଇନ୍‌କୁତାଃରେ ଆପ୍‌ନାଃ ମାନାରାଜ୍ ଉଦ୍‌ବକାଦ୍ ତାଇକେନାଏ,
 ଇନ୍‌କୁଲଃ ଆୟାଃ ରାଜିନାମା ତଲ୍‌କେଦ୍‌ତେ ଇନ୍‌କୁକେ ଆନ୍‌ଟୁ
 ଏମାକାଦ୍‌କ ତାଇକେନାଏ, ଇନ୍‌କୁ ସାର୍‌ତ୍ରିକି ସେଞ୍ଜାଃକ, ଆଡଃ
 ପାର୍‌ଫେଶ୍‌ବାର୍‌ତାଃଏତେ ବାନାର୍‌ସାକ ନାମାକାଦା । ୫ ଇନ୍‌କୁ
 ଆବୁଆଃ ପୁରାଃ ନୁଡ଼ଫଃତାନ୍ ଯିହୁଦୀ ପୁରଃ ହଡ଼କଆଃ କିଲିରେନ୍
 ତାନ୍‌କ ଆଡଃ ଖ୍ରୀଷ୍ଟୁ ଇନ୍‌କୁଆଃ କିଲିରେନ୍‌ଗି ତାନିଃ । ସବେନାଃ
 ରାଇଜେତାନ୍ ପାର୍‌ଫେଶ୍‌ବାର୍‌ଆଃ ସାହାରାଅ ଜାନାଅ ଜାନାଅ
 ହବାଅଃକା, ଆମେନ୍ ।

୬ ପାର୍‌ଫେଶ୍‌ବାର୍‌ଆଃ ବାନାର୍‌ସା କା ପୁରାକାନା ମେନ୍ତେଦ୍
 ଆଇଜ୍ କାଇଜ୍ କାଜିତାନା, ଚିୟାଃଚି ସବେନ୍ ଇସ୍ରାଏଲ୍‌କଦ୍

ପାର୍ମେଶ୍ଵରୀଆଃ ହୃଦକ ନାହାଁଲାକ । ୭ ଚାଏ ଆରାହାମ୍‌ଆଃ କିଲିରେନ୍ ସବେନ୍‌କ ପାର୍ମେଶ୍ଵରୀଆଃ ହନ୍‌କ ନାହାଁଲାକ । ପାର୍ମେଶ୍ଵର ଆରାହାମ୍‌କେ କାଜିକାଇ ତାଇକେନା, “ଆମାଃ ଅକନ୍ କିଲିକ ବିଷାଏରେ ଆଇଙ୍ଗ୍ ବାନାର୍‌ସା ଏମାକାଦ୍ ତାଇକେନାଇଙ୍ଗ୍, ଇନ୍‌କୁ ଇସାକ୍‌ଆଃ ହରାତେ ହିଜୁଃଆକ ।” ୮ ନେଆଁରାଃ ମୁଣ୍ଡି ହବାଅଃତାନା, ହଡ୍ ହନ୍‌କ ଜାନାମ୍‌ଏତେ ଏସ୍‌କାର୍ ପାର୍ମେଶ୍ଵରୀଆଃ ହନ୍‌କ କାକ ହବାଅଃଆ । ପାର୍ମେଶ୍ଵରୀଆଃ ବାନାର୍‌ସାଃ ଲେକାତେ ଜାନାମାକାନ୍ ହନ୍‌କ ପାର୍ମେଶ୍ଵରୀଆଃ ନେପେଲ୍‌ରେ ସାର୍‌ତି ହନ୍‌କ ମେନ୍ତେକ କାଜିୟ୍‌ଆ । ୯ ଚିୟାଃତି ପାର୍ମେଶ୍ଵର ନେ ବାନାର୍‌ସା ଏମାକାଦ୍ ତାଇକେନାଏ, “ଠାଉକାନ୍ ଦିପିଲି ହିଜୁଃରେ ଆଇଙ୍ଗ୍ ହିଜୁଃରୁହାଡ଼ାଇଙ୍ଗ୍ ଇମ୍‌ତା ସାରା ଏଙ୍ଗା ହବାକାନ୍‌ଗିଆଃଏ ।”

୧୦ ଇମ୍‌ନାଙ୍ଗ୍ ଏସ୍‌କାର୍ କାହାଗି, ଆରୁଆଃ ପୁରଖା ହଡ୍ ଇସାକ୍‌ତାଃଏତେ ରିବ୍‌କାରାଃ ବାରିଆ ହନ୍ ହବାକାନ୍ ତାଇକେନାକିନ୍ । ୧୧ ଇନ୍‌କିନ୍ ଜାନାମ୍ ସିଦାରେ ଆତଃ ଇନ୍‌କିନ୍ ବୁଗିନ୍ ଚାଏ ଏଡ୍‌କାନ୍ ଜେଡ୍‌ନାଃ କାକିନ୍ ରିକାକାଦ୍ ତାଇକେନ୍ ସିଦାରେ ପାର୍ମେଶ୍ଵର ନେଆଁଏ କାଜିକାଦ୍ ତାଇକେନା । ଏନାତେ ଇନ୍‌କିନାଃ କାମି ହରାତେ ଏସ୍‌କାର୍ କାହାଗି ମେନ୍‌ଦ ପାର୍ମେଶ୍ଵରୀଆଃ କେନେଡ଼ା ହରାତେ ଇନ୍‌କିନ୍ ସାଲାୟାନ୍‌କିନ୍ । ୧୨ ନେ ବାରାନ୍‌କିନାଃ ଭିତାର୍‌ରେ ମିହୁଡ୍ ପାର୍ମେଶ୍ଵରୀଆଃ ଉଦେଶ୍ ରିକା ନାଗେନ୍ତେ ସାଲାୟାନ୍‌ନା । ରିବ୍‌କାକେ ପାର୍ମେଶ୍ଵର କାଜିକିୟାଏ, “ମାରାଙ୍ଗ୍ ହନ୍ ହୁଡିଙ୍ଗ୍ ହନ୍‌ଆଃ ସେଞ୍ଜାନିଃ ହବାଅଃଆଏ ।” ୧୩ ଧାରାମ୍‌ପୁଥ୍ କାଜି ଲେକାତେ, “ଆଇଙ୍ଗ୍ ଯାକୁବ୍‌କେ ଦୁଲାଡ୍‌କିୟାଈଙ୍ଗ୍ ମେନ୍‌ଦ ଏଷୌକେ ହିଲାଙ୍ଗ୍‌କିୟାଈଙ୍ଗ୍ ।”

୧୪ ଏନ୍‌ରେଦ ଚିନାଃରୁ କାଜିୟା, ପାର୍ମେଶ୍ଵର ଚିନାଃ ନ୍ୟାୟ କାଏ ରିକାଃତି ? କାହାଗି, ଏନ୍‌କାଦ୍ ଆଲକା ହବାଅଃକା । ୧୫ ଚିୟାଃତି ଇନିଃଦ୍ ମୁଣାକେ କାଜିକାଇ ତାଇକେନା, “ଆଇଁୟାଃ ଇଛାସାନାଙ୍ଗ୍‌ଲେକା ଆଇଙ୍ଗ୍ ଅକଏକେ ସାଲାଃଇଙ୍ଗ୍ ଇନିଃକେ ସାୟାଦ୍ ଏମାଃଇଙ୍ଗ୍, ଆତଃ ଅକଏକେ ସାନାଙ୍ଗ୍‌ଇଙ୍ଗ୍ ଇନିଃକେ ଦାୟା ରିକାଃଇଙ୍ଗ୍ ।” ୧୬ ଏନାମେନ୍ତେ ସବେନ୍ ବିଷାଏ ପାର୍ମେଶ୍ଵରୀଆଃ ଲିନିବୁଇ ହରାତେ ପୁରାଅଃଆ । ମାନଞ୍ଜାରାଃ ସାନାଙ୍ଗ୍ ଚାଏ କାମି ଚେତାନ୍‌ରେ କାହାଗି । ୧୭ ଧାରାମ୍‌ପୁଥ୍‌ରେ ଅଲକାନ୍ ଲେକାତେ,

ପାର୍ମେଶ୍ଵର ମିସାର ଦିଶୁମ୍ଭରେନ୍ ଫାରୋ ରାଜାକେ କାଜିକାଇ ତାଇକେନା, “ଆମାଃ ହରାତେ ଆଇୟାଃ ପେଡ଼େଃ ଉଦୁବେ ନାଗେନ୍ତେ ଆଡ଼ଃ ଗଟା ଅତେଦିଶୁମ୍ଭରେ ଆଇୟାଃ ନୁଡୁମ୍ଭରାଃ ମାନାରାଜ୍ ଉଦୁବେ ନାଗେନ୍ତେ ଆଇଜ୍ ଆମ୍ଭକେ ରାଜା ବାଇୟାକାଦ୍ ମେଆଇଜ୍ ।”^{୧୮} ଏନାମେନ୍ତେ, ପାର୍ମେଶ୍ଵର ଆୟାଃ ଇଛାସାନାଜ୍ ଲେକାତେ ଇନିଃ ଅକଏକେ ଦାୟାକଆଏ ଆଡ଼ଃ ଅକଏକେ କେଟେଦ୍ ମନ୍ ହବାଅଃ ନାଗେନ୍ତେ ବାଗିତାକଆ ।

ପାର୍ମେଶ୍ଵରଆଃ ଖୁସ୍ ଆଡ଼ଃ ଲିନିବୁଇ

^{୧୯} ଆପେକଏତେ ଜେତାଏ ଆଇଜ୍‌କେ କାଜି ଦାଡ଼ିୟାଏ, “ତାବ୍‌ଦ ପାର୍ମେଶ୍ଵର ତିନାଃ ମେନ୍ତେ ଜେତାଏକେ ଚିଟାଇୟା ? ଜେତାଏ ତିନାଃ ପାର୍ମେଶ୍ଵରଆଃ ବିରୁଧ୍‌ରେ ଜେଡ଼ନାଃ ରିକା ଦାଡ଼ିୟାଏ ?”^{୨୦} ମେନ୍‌ଦ୍ ହେ ହାଗା ମିଶିକ, ପାର୍ମେଶ୍ଵରଆଃ କାଜିରେ କାଜିକଟଜ୍‌ନିଃ ଆମ୍ ଅକଏ ତାନ୍‌ମେ ? “ଆଇଜ୍‌କେ ନେଲେକା ତିନାଃମେନ୍ତେମ୍ ବାଇକିଦିୟା ?” ମେନ୍ତେ ହାସାରେୟାଃ ଚାଟୁ, କୁମ୍ଭାରକେ କାଏ କୁଲି ଦାଡ଼ିୟା ।^{୨୧} ହାସାକେ ଆପ୍‌ନାଃ ସାନାଜ୍ ଲେକା ସିପୁଦକେଦ୍‌ତେ ଚାଟୁ ବାଇ ନାଗେନ୍ତେ କୁମ୍ଭାରରାଃ ପୁରା ଆକଡେୟାର୍ ମେନାଃ । ଏନ୍ ମିଦ୍ ସାମାନ୍ ଡିଶ୍‌ହା ହାସାଏତେ ଇନିଃ ବାର୍ ରାକାମରାଃ ଚାଟୁ ବାଇ ଦାଡ଼ିୟାଏ, ମିଆଁଦ୍ ବିଶେଷ୍ ହୁଲାଇକରେ ଆଡ଼ଃମିଆଁଦ୍ ସବେନ୍ ହୁଲାଇରେୟାଃ କାମିରେ ବାଉରାଅ ନାଗେନ୍ତେ ବାଇୟାକାନା ।

^{୨୨} ଆଡ଼ଃ ପାର୍ମେଶ୍ଵରହ୍ ଏନ୍‌ଲେକାଗି ରିକାକାଦା । ଇନିଃ ଆୟାଃ ଖୁସ୍‌କେ ଆଡ଼ଃ ପେଡ଼େଃକେ ଉଦୁବ୍ ସାନାଜ୍ ତାଇକେନାଏ । ମେନ୍‌ଦ୍ ଅକନ୍‌କ ଆୟାଃ ଖୁସ୍‌ଅଃ ଲେକା ହବାକେଦ୍‌ତେ ଜିୟନଃ ଲାଗାଡିୟାଃ ତାଇକେନାକ, ଇନ୍‌କୁ ନାଗେନ୍ତେ ପାର୍ମେଶ୍ଵର ପୁରାଃଗି ଧୁରାଜ୍ ସାବ୍‌କେଦ୍‌ତେ ସାହାଡିଜ୍ କେଦା ।^{୨୩} ଆଡ଼ଃ ଇନିଃ ଆୟାଃ ପୁରାଃ ମାନାରାଜ୍ ଉଦୁବ୍ ନାଗେନ୍ତେ ଆବୁକେ ବିଶେଷ୍‌କେଦ୍‌ତେ ଆୟାଃ ସାୟାଦ୍‌ରେୟାଃ ଆଶିଷ୍ ନାମେ ନାଗେନ୍ତେ ସିଦାରେଗି ଆବୁକେ ବାଇୟାକାଦ୍‌ବୁଆ ।^{୨୪} ଇନିଃ ଯିହୁଦୀକଏତେ ଏସ୍‌କାର୍ କାହାଗି ମେନ୍‌ଦ୍ ଗ୍ରୀକ୍ ହଡ଼କଏତେ ହଗି ଆବୁକେ କେଡାକାଦ୍‌ବୁଆ ।^{୨୫} ନେ ବିଷାଏରେ ପାର୍ମେଶ୍ଵର ହୋଗେୟ ପୁଅରେ କାଜିକାଦା,

“ଅକନ୍ୟ ଆଇଁୟାଃ ହଡ଼ କାକ ତାଇକେନା,
 ଇନ୍‌କୁକେ ଆଇଁୟାଃ ହଡ଼ ଲେକା କେଡ଼ାକଆଇଙ୍ଗ,
 ଅକନ୍ ହଡ଼କକେ ଆଇଙ୍ଗ କାଇଙ୍ଗ ଦୁଲାଡ଼କାଦକ ତାଇକେନା,
 ଇନ୍‌କୁକେ ଆଇଁୟାଃ ଦୁଲାଡ଼କ୍ ମେନ୍ତେଇଙ୍ଗ କେଡ଼ାକଆ ।
 ୨୭ ଆଡ଼ଃ ‘ଆପେ ଆଇଁୟାଃ ହଡ଼ ନାହାଁଲାପେ,’ ମେନ୍ତେ ଅକ
 ଠାୟାଦ୍‌ରେ ଇନ୍‌କୁକେ କାଜିକାନ୍ ତାଇକେନା,
 ଏନ୍ତାଃରେ ଇନ୍‌କୁ ଜାନିଦ୍ ପାର୍‌ମେଶ୍‌ଆଃ ହନ୍‌କ ମେନ୍ତେ
 କାଜିୟାଆକ ।”

୨୭ ଆଡ଼ଃ ଇସ୍ରାଏଲ୍ ହଡ଼କଆଃ ବିଷାଏରେ ଯିଶାୟ ନାବୀ
 କାଜିକାଦା, “ଇସ୍ରାଏଲ୍ ହଡ଼କ ଦରେୟାରେନ୍ ଗିତିଲ୍ ଲେକା
 ତାଇନଃରେୟ, ଇନ୍‌କୁଏତେ କାଟିଃଲେକା ହଡ଼କ ବାଞ୍ଚାଅକ
 ନାମେୟା । ୨୮ ତିୟାଃତି ପ୍ରାଭୁ ଜାଲ୍‌ଦିଗି ଅତେଦିଶ୍‌ମ୍‌ରେ ପୁରା ନ୍ୟାୟ
 ବିଚାର୍ ରିକାଏୟାଏ ।” ୨୯ ଯିଶାୟ ନାବୀ ସିଦାରେଗି କାଜିକାଦା,
 “ସବେନାଃଏତେ ପେଡ଼େୟାନ୍ ପ୍ରାଭୁ ଆବୁଆଃ ଚିମିନ୍ କିଲିକକେ କାଏ
 ବାଞ୍ଚାଅ କାକରେଦ, ଆବୁଆଃ ଦାସା ସୋଦମ୍ ଆଡ଼ଃ ଗମ୍‌ରାରେନ୍
 ହଡ଼କ ଲେକା ହବାକାନ୍‌ଡେୟାଃ ।”

ଇସ୍ରାଏଲ୍ ନାଗେନ୍ତେ ପାଉଲୁସ୍‌ଆଃ ବିକ୍ରି

୩୦ ଏନାମେନ୍ତେ ସାଅଁସାର୍ ହଡ଼କ ବିଷାଏରେ ନେଆଁ କାଜି
 ଦାଡ଼ିୟାବୁ, ଇନ୍‌କୁ ଧାର୍‌ମାନ୍ ହବାଅ ନାଗେନ୍ତେ କାକ ସାନାଙ୍ଗ୍
 ତାଇକେନା, ମେନ୍‌ଦ ଆକଆଃ ବିଶ୍‌ୟ ହରାତେ ଇନ୍‌କୁ
 ଧାର୍‌ମାନ୍ ମେନ୍ତେକ କାଜିୟାତାନା । ୩୧ ମେନ୍‌ଦ ଇସ୍ରାଏଲ୍
 ହଡ଼କ ଯିହୁଦୀକଆଃ ଆନ୍‌ରୁ ହରାତେ ଧାର୍‌ମାନ୍ ହବାଅ
 ନାଙ୍ଗ୍ ସାନାଙ୍ଗ୍‌କେଦ୍‌ତେ ହାରାଅକାନାକ । ୩୨ ନେଆଁରାଃ କାଜି
 ହବାଅତାନା, ଇନ୍‌କୁ ବିଶ୍‌ୟ ଚେତାନ୍‌ରେ କା ଆସ୍ରାକେଦ୍‌ତେ
 ଆକଆଃ ଆପ୍‌ନାଃ କାମି ଚେତାନ୍‌ରେ ଆସ୍ରାଏ ତାଇକେନାକ,
 ଏନାମେନ୍ତେ ଇନ୍‌କୁ “ତହଦଃ ଦିରିରେ” ତହଦ୍‌ୟାନାକ ।
 ୩୩ ଧାରାମ୍‌ପୁଅରେ ଅଲ୍‌କାକାନ୍ ଲେକା,

“ନେଲେପେ, ଆଇଙ୍ଗ୍ ସିୟୋନ୍‌ରେ ମିଆଁଦ୍ ତହଦଃ ଲେକାନ୍ ଦିରି
 ଆଡ଼ଃ ମିଆଁଦ୍ ସେରେଙ୍ଗ୍ ବାଇୟାକାଦାଇଙ୍ଗ୍,
 ଏନାରେ ଇନ୍‌କୁକେଇଙ୍ଗ୍ ଉୟାଃଇଚିକଆ ।

ମେନ୍ଦ ଦ ଜେତାଏ ଇନିଃତାଃରେ ବିଶ୍ୱାସେନିଃ କାଏ ଗିହୁଗଃଆ ।”

୧୦

୧ ହେ ହାଗା ମିଗିକ, ଆଇଁୟାଃ ଆପ୍ନାଃ ହଡକ ଜୀଉବାଞ୍ଚାଅ ନାମେକାକ, ମେନ୍ତେ ଆଇଁୟାଃ ମନ୍ସୁରୁଦ୍ରେ ସାନାଙ୍ଗତାନାଇଙ୍ଗ ଆଡ଼ଃ ଆଇଙ୍ଗ ପାର୍ମେଶ୍ୱାର୍ତାଃରେ ସବେନ୍ ଇମ୍ତାଇଙ୍ଗ ବିକ୍ରିତାନା । ୨ ପାର୍ମେଶ୍ୱାର୍ତାଃ ବିଷାଏରେ ଇନ୍କୁଆଃ ପୁରାଃଗି ଚିହ୍ନଲାନ ମେନାଃ, ଏନା ଆଇଙ୍ଗ ଇନ୍କୁଆଃ ସାଃଏତେ ଗାଞ୍ଜା ଏମ୍ତାନାଇଙ୍ଗ, ମେନ୍ଦ ଇନ୍କୁଆଃ ଚିହ୍ନଲତେୟାଃ ସାର୍ତି ସେଣ୍ଡିନ୍ ଲେକାତେ ନାହାଁଲାଃ । ୩ ପାର୍ମେଶ୍ୱାର୍ ହଡକକେ ଚିଲ୍କା ଆୟାଃଲଃ ଧାର୍ମାନ୍ ବାଇକଆଏ, ଏନା ଇନ୍କୁ କାକ ସାରିକାଦ୍ ତାଇକେନା ଆଡ଼ଃ ଇନ୍କୁ ଧାର୍ମାନ୍ ହବାଅଃ ନାଗେନ୍ତେ ଆକଆଃ ଆପ୍ନାଃ ଇଛାସାନାଙ୍ଗ ଲେକା ରିକାକେଦାକ, ଏନାତେ ଇନ୍କୁ ଆପାନ୍କେ ପାର୍ମେଶ୍ୱାର୍ତାଃରେ କା ଜିମାକେଦ୍ତେ ପାର୍ମେଶ୍ୱାର୍ତାଃ ଏନ୍ ହରାକେ ବାଗିୟାକାଦାକ । ୪ ଖ୍ରୀଷ୍ଟି ଆନ୍ତରୁରେନ୍ ଟୁଣ୍ଡ ଡ୍ରାନିଃ, ଏନାତେ ସବେନ୍କ ଇନିଃତାଃରେ ଏସ୍କାର୍ ବିଶ୍ୱାସ୍ତେରେ ପାର୍ମେଶ୍ୱାର୍ତାଃ ନେପେଲ୍ରେ ଧାର୍ମାନ୍ ମେନ୍ତେକ କାଜିୟାଃ ।

ସବେନ୍କଆଃ ନାଗେନ୍ତେ ଜୀଉବାଞ୍ଚାଅ

୫ ଆନ୍ତୁ ମାନାତିଙ୍ଗ ହରାତେ ପାର୍ମେଶ୍ୱାର୍ତାଃ ଧାର୍ମାନ୍ ହବାଅଃ ନାଗେନ୍ତେ ମୁଣା ଅଲ୍ଲାକାଦା, “ଅକନ୍କ ପାର୍ମେଶ୍ୱାର୍ତାଃ ଆନ୍ତୁକ ମାନାତିୟାଃ, ଇନ୍କୁ ବାଞ୍ଚାଅଃଆକ ।” ୬ ମେନ୍ଦ ବିଶ୍ୱାସ୍ ହରାତେ ଧାର୍ମାନ୍ ହବାଅଃ ବିଷାଏରେ ଧାରାମ୍ପୁଥିରେ ଅଲ୍ଲାନା, “ଖ୍ରୀଷ୍ଟକେ ଆଡ଼୍ଗୁ ନାଗେନ୍ତେ ଅକଏ ସିର୍ମାତେ ରାକାବା ? ମେନ୍ତେ ଆପେ ଆପେୟାଃ ମନ୍ରେ ଆଲ୍ପେ କୁପୁଲିନାଃ ।” ୭ ତାଏ, “ଖ୍ରୀଷ୍ଟକେ ଗନଏଃହେତେ ବିରିଦ୍ ଆଉ ନାଙ୍ଗ୍ ଅକଏ ହୁଆଙ୍ଗାଡାତେ ସେନା ?” ନେ କାଜିୟାଗି ଆପେ ଆଲ୍ପେ କୁପୁଲିନାଃ । ୮ ଚିୟାଃଚି ଧାରାମ୍ପୁଥି ଲେକାତେ, “ପାର୍ମେଶ୍ୱାର୍ତାଃ କାଜି ଆପେତାଃରେ, ଆପେୟାଃ ମତାରେ ଆଡ଼ଃ ମନ୍ସୁରୁଦ୍ରେ ମେନାଃ ।” ଏନ୍ ବିଶ୍ୱାସ୍ରେୟାଃ କାଜିଗି ଆଲେ ଉଦ୍ଭବେତାନାଲେ । ୯ ଆପେ ଯାଶ୍ଟକେ ଆପେୟାଃ ମତାତେ ପ୍ରାଭୁ ମେନ୍ତେପେ ମାନାତିଙ୍ଗରେଦ୍ ଆଡ଼ଃ ପାର୍ମେଶ୍ୱାର୍ ଇନିଃକେ ଗଜାକାନ୍କଏତେ

ଜୀଉବିବିଦ୍‌କିୟାଏ ମେନ୍ତେ ମନ୍‌ସୁରୁଦ୍‌ରେପେ ବିଶ୍ୱାସେ ରେଦ, ଆପେ ଜୀଉ ବାସ୍ତାଅପେ ନାମେୟା । ୧୦ ତିଆଃତି ଆବୁ ମନ୍‌ସୁରୁଦ୍‌ରେ ବିଶ୍ୱାସକେଦ୍ ହରାତେ ପାର୍‌ମେଶ୍ୱାର୍‌ଆଃ ଆୟାରରେ ଧାରମାନ୍ ମେନ୍ତେବୁ କାଜିନାଃ ଆତଃ ମଚାତେ ମାନାତିଙ୍‌କେଦ୍ ହରାତେ ଜୀଉବାସ୍ତାଅବୁ ନାମ୍‌ଦାଡ଼ିୟା । ୧୧ ଧାରାମ୍‌ପୁଅ ଲେକାତେ, “ଜେତାଏ ଇନିଃତାଃରେ ବିଶ୍ୱାସେନିଃ କାଏ ଗିହୁଗଃଆ । ୧୨ ତିଆଃତି ଯିହୁଦୀ ହଡ଼ ଆତଃ ଗ୍ରୀକ୍ ହଡ଼କ ପାର୍‌ମେଶ୍ୱାର୍‌ଆଃ ଆୟାରରେ ସବେନ୍‌କ ମିଦ୍‌ଗିୟାକ । ପାର୍‌ମେଶ୍ୱାର୍ ଏସ୍‌କାର୍ ସବେନ୍‌କଆଃ ପ୍ରାଭୁ ତାନିଃ, ଅକନ୍‌କ ଆଇଃକତାଃରେ ଦେଙ୍ଗା ବିକ୍ତି ରିକାଃକ ଇନ୍‌କୁକେ ଇନିଃ ପୁରାଃଗି ଆଶିଷ୍‌କଆ ।” ୧୩ ତିଆଃତି ଜେତାଏ ପ୍ରାଭୁଆଃ ନୁତୁମ୍‌ତେ ବିକ୍ତିୟାଏ, ଇନିଃ ଜୀଉବାସ୍ତା ନାମେୟା ।

୧୪ ମେନ୍‌ଦ ଇନିଃତାଃରେ କା ବିଶ୍ୱାସକେଦ୍‌ତେ ଇନ୍‌କୁ ଚିଲ୍‌କାତେ ଇନିଃକେ ବିକ୍ତିୟାକ ? ଆତଃ ଆୟାଃ ବିଷାଏରେ ସୁକୁକାଜି କା ଆୟୁମ୍‌କେଦ୍‌ତେ ଇନ୍‌କୁ ଚିଲ୍‌କାତେ ବିଶ୍ୱାସ୍ ଦାଡ଼ିୟାକ ? ଆତଃ ସୁକୁକାଜିକେ ବେଗାର୍ ଉଦୁବ୍‌କେଦ୍‌ତେ ଇନ୍‌କୁ ଚିଲ୍‌କାତେକ ଆୟୁମେୟା ? ୧୫ ଆତଃ କାଜି ଉଦୁବ୍ ନାଗେନ୍ତେ ମିହୁଡ଼କେ କା କୁଲିରେ ଇନିଃ ଚିଲ୍‌କାତେ ପାର୍‌ଚାରରେୟା ? ନେ ବିଷାଏରେ ଧାରାମ୍‌ପୁଅରେ ଅଲ୍‌କାନା, “ସୁକୁକାଜି ଉଦୁବ୍‌ତାନ୍‌କଆଃ ହିନିଦୁଃ ଚିମିନ୍ ରୁଗିନ୍‌ଗିୟା ?” ୧୬ ମେନ୍‌ଦ ସବେନ୍‌କ ଏନ୍ ସୁକୁକାଜିକେ କାକ ମାନାତିଙ୍‌କାଦା । ଏନାମେନ୍ତେ ଯିଗାୟ ନାବୀ ଅଲ୍‌କାଦା, “ପ୍ରାଭୁ, ଆଲେୟାଃ ସୁକୁକାଜି ଆୟୁମ୍‌କେଦ୍‌ତେ ଅକଏ ବିଶ୍ୱାସକାଦା ?” ୧୭ ସୁକୁକାଜି ଆୟୁମ୍ ହରାତେ ବିଶ୍ୱାସ୍ ହିଦୁଃଆ ଆତଃ ଖ୍ରୀଷ୍ଟିଆଃ କାଜି ଉଦୁବ୍‌ତେୟାଃଗି ଏନ୍ ସୁକୁକାଜି ତାନାଃ । ୧୮ ମେନ୍‌ଦ ଆଇଙ୍ଗ୍ କୁଲି ତାନାଇଙ୍ଗ୍, ଇନ୍‌କୁ ଚିନାଃ ଏନ୍ କାଜିକେ କାକ ଆୟୁମାକାଦା ? ସାର୍‌ତିଗି ଆୟୁମାକାଦାକ, ଚିୟାଃତି ଧାରାମ୍‌ପୁଅରେ ଅଲ୍‌କାନା, “ଇନ୍‌କୁଆଃ ଲାବ୍‌ଜା ଗଟା ଅତେଦିଶ୍ୱମ୍ ନିତିରକାନା, ଇନ୍‌କୁଆଃ ନିତିରଅଃ କାଜିକ ଅତେଦିଶ୍ୱମ୍‌ରେୟାଃ ଚୁଣ୍ଡୁଜାକେଦ୍ ଆୟୁମାକାନା ।” ୧୯ ଆତଃମିସା ଆଇଙ୍ଗ୍ କୁଲି ତାନାଇଙ୍ଗ୍, ଇସ୍ରାଏଲ୍ ହଡ଼କ ଚିନାଃ ଏନାକେ କାକ ଆବ୍‌କାର୍‌ଉରୁମ୍‌କେଦା ? ସାର୍‌ତିଗି ଆବ୍‌କାର୍‌ଉରୁମ୍‌କେଦାକ, ସିଦାରେଗି ମୁଗାରାଃ ଦିପିଲିରେ

ପାର୍ମେଶ୍ୱର କାଜିକେଦାଏ, “ଆଇଙ୍ଗ୍ ଆଲେୟାଃ ହଡକକେ ହିସଙ୍ଗାଈଚିକ ନାଗେନ୍ତେ ମିଆଁଦ୍ ଡଣ୍ଡ ହଡକକେଇଙ୍ଗ୍ ବେଭାରିୟା, ଏନ୍ଲେକା ମିଆଁଦ୍ ଡଣ୍ଡ ହଡ ହରାତେ ଇନ୍କୁକେଇଙ୍ଗ୍ ଖୁସ୍‌ଇଚିକଆ ।”^{୨୦} ଯିଶାୟ ନାବୀ ଆଡ଼ଃଗି ପେଡେଃଡେତେ କାଜିକାଦା, “ଆଇଙ୍ଗ୍‌କେ କା ଦାଣ୍ଡାତାନ୍ ହଡକ, ଆଇଙ୍ଗ୍‌କେ ନାମ୍‌କେଦିୟାକ, ଅକନ୍‌କ ଆଇଙ୍ଗ୍‌କେ କାକ କୁଲିଙ୍ଗ୍‌ତାଇକେନା, ଆଇଙ୍ଗ୍ ଇନ୍‌କୁତାଃରେଇଙ୍ଗ୍ ଉଦୁବେନ୍‌ୟାନା ।”^{୨୧} ମେନ୍‌ଦ ପାର୍ମେଶ୍ୱର ଇସ୍ରାଏଲ୍ ହଡକଆଃ ବିଷାଏରେ କାଜିୟାଏ, “କାଜି କା ମାନାତିଙ୍ଗ୍‌ତାନ୍ ହଡକ ନାଗେନ୍ତେ ସବେନ୍ ଇମ୍‌ତା ତିଃଇ ଜିଲିଙ୍ଗ୍‌କେଦ୍‌ତେ ଆଇଙ୍ଗ୍ ଦାରମ୍‌କତାନା ।”

୧୧

ଇସ୍ରାଏଲ୍ ହଡକଆଃ ତେତାନ୍‌ରେ ପାର୍ମେଶ୍ୱରଆଃ ଲିନିବୁଇ

^୧ ✧ଆଇଙ୍ଗ୍ ଆଡ଼ଃଗିଇଙ୍ଗ୍ କୁଲି ଦାଡ଼ିୟା, ତାବ୍‌ଦ ଚିନାଃ ପାର୍ମେଶ୍ୱର ଆୟାଃ ଆପ୍‌ନାଃ ହଡକକେ ବାଗି କାଦ୍‌କଆ ? କାହା ଏନ୍‌କାଦ କା ହବାଅଃଆ । ଆଇଙ୍ଗ୍‌ଗି ମିଆଁଦ୍ ଇସ୍ରାଏଲ୍‌ରେନ୍ ହଡ ତାନିଙ୍ଗ୍, ଆବ୍ରାହାମ୍‌ଆଃ ଆଡ଼ଃ ବେଞ୍ଜାମିନ୍‌ଆଃ କିଲିରେନ୍ ତାନିଙ୍ଗ୍ ।^୨ ପାର୍ମେଶ୍ୱର ମୁନୁହେତେ ସାଲାକାଦ୍ ଆୟାଃ ହଡକକେ ତିଉଲାହ କାଏ ବାଗିକାଦ୍‌କଆ । ଏଲିୟ ଚିଲ୍‌କା ପାର୍ମେଶ୍ୱରତାଃରେ ଇସ୍ରାଏଲ୍ ହଡକଆଃ ବିରୁଧ୍‌ରେ ତିଙ୍ଗ୍‌କେଦ୍‌ତେ କାଜିକେଦା : ଏନା ଆପେ ଧାରାମ୍‌ପୁଥ୍‌ରେ ଅଲ୍‌କାନ୍‌ତେୟାଃ ସାରିକାଦାପେ,^୩ “ପ୍ରାଭୁ, ଏନ୍ ହଡକ ଆମାଃ ନାବୀକକେ ଗଜାକାଦ୍‌କଆକ, ଆମାଃ ଦାଣ୍ଡା ରାକାବ୍ ବେଦିକକେ ଉର୍‌ଧାସୁଡ଼୍‌କାଦାକ, ଆଡ଼ଃ ଆଇଙ୍ଗ୍ ଏସ୍‌କାର୍ ମିହୁଡ଼୍‌ଗି ବାଞ୍ଚାଅକାନାଇଙ୍ଗ୍, ଇନ୍‌କୁ ଆଇଁୟାଃ ଜୀଉ ଇଦି ନାଗେନ୍ତେକ ସାନାଙ୍ଗ୍‌ତାନା ।”^୪ ମେନ୍‌ଦ ପାର୍ମେଶ୍ୱର ଏଲିୟକେ ଚିନାଃ କାଜିରୁହାଡ଼କିୟାଏ ? “ଅକନ୍ ହଡକ, ହସଡ଼ ବାଲ୍ ମାହାପୁରୁକେ କାକ ସେଞ୍ଜା, ଏନ୍‌ଲେକାନ୍ ୭,୦୦୦ ହଡକକେ ଆଇଙ୍ଗ୍ ଆଇୟାଃ ନାଗେନ୍ତେଇଙ୍ଗ୍ ଦହକାଦ୍‌କଆ ।”^୫ ଏନ୍ ଲେକାଗି ନାହାଁଃଦ ହବାକାନା, ପାର୍ମେଶ୍ୱର ଆୟାଃ ସାୟାଦ୍‌ତେ ଅକ ହଡକକେ ସାଲାକାଦ୍‌କ ତାଇକେନା, ଇନ୍‌କୁଏତେ ଚିମିନ୍ ହଡକ

✧ ୧୧:୧ ୧୧:୧ ଫିଲିପ୍‌ସ ୩:୫.

ସାରେଜାକାନା ।^୭ ପାର୍ମେଶ୍ୱାର ଆୟାଃ ସାୟାଦ୍ ହରାତେ ଇନ୍‌କୁକେ ସାଲାକାଦକଆ । ପାର୍ମେଶ୍ୱାର ଇନ୍‌କୁଆଃ ବୁଗିନ୍ କାମି ନାଗେନ୍ତେ ସାଲାକାଦକ ତାଇକେନ୍‌ରେଦ, ଇନିୟାଃ ସାୟାଦ୍ ସାର୍ତି ସାୟାଦ୍ କା ହବାଅଃତେୟାଃ ।

^୭ ତାବଦ୍ ତିନାଃ ହବାୟାନା ? ଇସ୍ରାଏଲ୍ ହଡକ ଅକନାଃ ଦାଣି ତାଇକେନାକ, ଏନା କାକ ନାମ୍‌କେଦା । ପାର୍ମେଶ୍ୱାର୍ ସାଲାକାଦ୍ ତାଇକେନ୍ ମିଆଁଦ୍ ହୁଡିଙ୍ ଝୁଣ୍ଟ୍ ଏସକାର୍ ଏନାକେ ଦାଣି ନାମ୍‌କେଦା । ଏଟାଃକ ଜେତାଏ ପାର୍ମେଶ୍ୱାର୍‌ଆଃ କେନେଡାରେ ମନ୍ କାକ ଏମ୍‌କେଦା । 「ଧାରାମ୍‌ପୁଥୁରେ ଅଲ୍‌କାନ୍ ଲେକା, “ପାର୍ମେଶ୍ୱାର୍ ତିସିଙ୍ ଜାକେଦ୍ ଇନ୍‌କୁଆଃ ମନ୍ ଆଡଃ ମନ୍‌ସୁରୁଦକେ କେଟେଦ୍ କାଦା, ଏନାତେ ଇନ୍‌କୁ କାକ ନେଲ୍ ଦାଡିତାନା ଚାଏ କାକ ଆୟୁମ୍ ଦାଡିତାନ୍ ।”^୯ ଇନ୍‌କୁଆଃ ବିଷାଏରେ ଦାଉଦ୍ ଆଡଃଗି ଅଲ୍‌କାଦା, “ଇନ୍‌କୁ ରିଜରାଙ୍ ରିକାଏ ଇମ୍‌ତା

ଫାଁସରେ ଉୟୁଗଃକାକ ଆଡଃ ସାଜାଇ ନାମେକାକ ।

^{୧୦} ଇନ୍‌କୁଆଃ ମେଦ୍ ଜାପିଦଃକା ଜେ'ଲେକାଟି ଇନ୍‌କୁ ଜେଡନାଃ ଆଲକାକ ନେଲ୍ ଦାଡିକା, ଆଡଃ ସବେନ୍ ଇମ୍‌ତା ଦୁକୁହାସୁ ନାମ୍‌କେଦ୍‌ତେ ଇନ୍‌କୁଆଃ ମାୟାଙ୍ ଲିକ୍‌ଜଃକା ।”

^{୧୧} ତାବଦ୍, ଆଇଙ୍ କୁଲି ସାନାଙ୍‌ତାନାଇଙ୍, ଯିହୁଦୀ ହଡକ ତହଦ୍‌ୟାନ୍ ହରାତେ ତିନାଃ ଜିୟନ୍‌ୟାନାକ ? କାହାଗି, ଇନ୍‌କୁ ପାପକେଦ୍ ହରାତେ, ଇନ୍‌କୁକେ ହିସ୍‌ଜାଈଟିକ ନାଗେନ୍ତେ ସାଅଁସାର୍ ହଡକକେ ଜୀଉ ବାସ୍ତାଅରେୟାଃ ଆକ୍‌ତେୟାର୍ ନାମ୍‌ୟାନା ।

^{୧୨} ଯିହୁଦୀ ହଡକଆଃ ପାପ, ଅତେଦିଶୁମ୍‌ରେନ୍ ଏଟାଃ ସବେନ୍‌କ ନାଗେନ୍ତେ ପୁରାଃଗି ଆଶିଷ୍ ଆଉଝାକାଦାଏ । ଯିହୁଦୀ ହଡକଆଃ ଆମ୍‌କରେୟାଃ ନାରାଦୁରା ହରାତେ ସାଅଁସାର୍ ହଡକ ପୁରାଃଗି ଆଶିଷ୍‌କ ନାମାକାଦା । ଏନାତେ ସବେନ୍ ଯିହୁଦୀ ହଡକ ବାସ୍ତାଅ ଦାଡିୟଃରେଦ, ଏନ୍ ହରାତେ ଆଡଃଗିମିନ୍ ଆଦ୍‌କା ଆଶିଷ୍ କାକ ନାମେତେୟାଃ ।

ସାଅଁସାର୍ ହଡକଆଃ ଜୀଉବାସ୍ତାଅ

^{୧୩} ସାଅଁସାର୍ ହଡକକେ ଆଇଙ୍ କାଜିକତାନାଇଙ୍, ଆପେ ନାଗେନ୍ତେ ଆଇଙ୍ କୁଲ୍‌କାନ୍ ତେଲ୍‌ ଲେକାଇଙ୍ କାମିତାନା,

ଏନାମେନ୍ତେ ଆଇଙ୍ଗ୍ ଆପାନ୍‌କେ ମାରାଙ୍ଗ୍ ମେନ୍ତେଇଙ୍ଗ୍ କାଜିନ୍‌ତାନା । ୧୪ ନେଆଁ ହରାତେ ଆଇଙ୍ଗ୍ ଆପ୍‌ନାଃ ହଡ଼କକେ ଖୁସ୍‌ଇଚି ରିକା ଦାଡ଼ିରେଦ, ହବାସାକାଅଆଃ ଇନ୍‌କୁଏତେ ଚିମିନ୍ ହଡ଼କକେ ବାଞ୍ଛାଅ ଦାଡ଼ିୟାଇଙ୍ଗ୍ । ୧୫ ଚିୟାଃଚି ଇନ୍‌କୁକେ ଗେନା ଆତମାକାନ୍ ହରାତେ ଅତେଦିଶ୍ଟୁମରେୟାଃ ମେନେସା ହବାୟାନା ଚାଏ ପାର୍‌ମେଶ୍ଵାର୍‌ଆଃ ସବେନ୍ ବାଇରି ହଡ଼କଆଃ ବାଦ୍‌ଲାଅ ହବାୟାନା ଆତଃ ଆୟାଃ ଗାତିକ ହବାକାନା । ଏନାତେ ପାର୍‌ମେଶ୍ଵାର୍ ସବେନ୍ ଯିହୁଦୀ ହଡ଼କକେ ଆତଃମିସା ତେଲ୍‌ଦାରମ୍‌କରେଦ, ଏନାରେୟାଃ ନାଲ୍‌ ଚିନାଃ ହବାଅଃଆ ? ଏନାଦ ଏଗାଃ ହଡ଼କ ନାଗେନ୍ତେ ଗନ୍‌ଏଃହେତେ ଜୀଦାନ୍ ନାମେ ଲେକା ହବାଅଃ ତାନାଃ । ୧୬ ହଲଙ୍ଗ୍‌ହେତେ ମିଦ୍‌କେଚାଃ ପାର୍‌ମେଶ୍ଵାର୍ ନାଙ୍ଗ୍ ପାବିତାର୍‌କାନ୍‌ରେଦ, ପୁରା ହଲଙ୍ଗ୍ ପାବିତାର୍‌କାନା ମେନ୍ତେ ଆଟ୍‌କାର୍‌ଉରୁମ୍ ଲାଗାତିଙ୍ଗ୍‌ୟାଃ । ମିଆଁଦ୍ ଦାରୁରେୟାଃ ରେହେଦ୍ ପାବିତାର୍‌କାନ୍‌ରେଦ, ଏନାରେୟାଃ କତକ ହଗି ପାବିତାର୍‌କାନା ମେନ୍ତେ ଆଟ୍‌କାର୍‌ଉରୁମ୍ ଲାଗାତିଙ୍ଗ୍‌ୟାଃ । ୧୭ ବାଖ୍‌ଡ଼ିରେ ଯାତାନ୍ ଇଦିତାନ୍ ମିଆଁଦ୍ ଜାଇତୁନ୍ ଦାରୁରାଃ ଚିମିନ୍ କତକକେ ମାଆଃକେଦ୍‌ତେ ଏନ୍ତାଃରେ ବିରୁରେୟାଃ ଜାଲ୍‌ପାଇ ଦାରୁରାଃ କତକକେ କାଲ୍‌ମିକାନା । ନାହାଁଃ, ଏନା ଜାଲ୍‌ପାଇ ଦାରୁରାଃ ବୁଟାରେୟାଃ ହିସା ହବାକାନା । ଏନ୍‌ଲେକାଗି, ସାଅଁସାର୍ ହଡ଼କ ଏନ୍ ବିର୍ ଜାଲ୍‌ପାଇ ଦାରୁ ଲେକାନ୍‌କ ତାନ୍‌କ । ଆପେ ସବେନ୍‌କ ନାହାଁଃ ଯିହୁଦୀ ହଡ଼କଆଃ କେଟେଦ୍ ଆମ୍‌ିକ୍ ଜୀଦାନ୍‌ରେୟାଃ ହିସାପେ ହବାକାନା ୧୮ ଏନାମେନ୍ତେ, ଆପେ ମାଆଃକାନ୍ କତକକେ ଆଲ୍‌ପେ ଗେନା ଆତମେୟାଁ । ଆପେ ଚିନାଃ ମେନ୍ତେ ଆପାନ୍‌କେ ମାରାଙ୍ଗ୍ ମେନ୍ତେପେ କାଜିନ୍‌ତାନା ? ଆପେଦ କତକ ଏସ୍‌କାର୍ ତାନ୍‌ପେ, ଦାରୁରେୟାଃ ରେହେଦ୍‌କେ ଆପେ କାପେ ଦେଙ୍ଗା ତାନା, ମେନ୍‌ଦ ରେହେଦ୍ ଆପେକେ ହାରାଇଦିୟାଃରେ ଦେଙ୍ଗାପେ ତାନା ।

୧୯ ଏନାମେନ୍ତେ ଆପେ କାଜିୟାପେ, “ହେଗି, ମେନ୍‌ଦ ଆଇଙ୍ଗ୍‌କେ ଠାୟାଦ୍ ଏମ୍ ନାଗେନ୍ତେଗି ଏନ୍ କତକକେ ମାଆଃ ଆତମ୍‌କାନ୍ ତାଇକେନା ।” ୨୦ ଏନା ସାର୍‌ତିଗି ତାନାଃ, ଇନ୍‌କୁ କା ବିଶ୍ଵାସ୍‌କେଦ୍ ହରାତେ ଆତମ୍‌ୟାନାକ । ଆପେ ବିଶ୍ଵାସ୍ ହରାତେ ଏସ୍‌କାର୍ ଏନ୍ ଠାୟାଦ୍ ଆକ୍‌ତେୟାର୍ କାଦାପେ । ମେନ୍‌ଦ

ଆପାନ୍‌କେ ମାରାଙ୍ଗ୍ ମେନ୍ତେ କା କାଜିକେଦ୍‌ତେ ବରୟେପେ । ୨୧ ପାର୍‌ମେଶ୍ୱାର୍ କା ବିଶ୍ୱାସ୍‌ତାନ୍ ଯିହୁଦୀ ହଡ଼କକେୟ୍ କାଏ ବାଚାଅକେଦ୍‌କଆ, ଅକନ୍‌କଟି ଦାରୁରେନ୍ କତକ ଲେକା ତାନ୍‌କୁ, ତାବ୍‌ଦ ଆପେ କା ବିଶ୍ୱାସ୍‌ତାନ୍‌କକେ ଚିନାଃ ଇନିଃ ବାଚାଅପେୟାଏ ? ୨୨ ପାର୍‌ମେଶ୍ୱାର୍‌ଆଃ ଚିଲ୍‌କା ଦାୟାନ୍‌ନିଃ ଆତଃ କେଟେଦ୍‌ନିଃ ତାନିଃ ଏନାରୁ ନେଲେୟା । ଅକନ୍‌କ ଉୟୁଗାକାନା ଇନ୍‌କୁ ନାଗେନ୍ତେ ଇନିଃ କେଟେଦ୍‌ନିଃ ତାନିଃ, ମେନ୍‌ଦ ଅକନ୍‌କ ଇନିୟାଃ ଦାୟାରେ ଆସ୍ତାଏତାନ୍ ମେନାକଆ ଇନ୍‌କୁ ନାଗେନ୍ତେ ଇନିୟାଃ ସାୟାଦ୍ ପୁରାଃଗି ମେନାଃ ଆତଃ ଇନିୟାଃ ଦାୟାକେ ବାଗିରେଦ୍ ଆପେ ହଗି ଇନିଃତାଃଏତେ ବିନ୍‌ଗାଅକାନାପେ । ୨୩ ମେନ୍‌ଦ ଯିହୁଦୀ ହଡ଼କ ଆକଆଃ କା ବିଶ୍ୱାସ୍‌ତାନ୍‌ତେୟାଃକେ ସାଙ୍ଗିନେ ରେଦକ, ଇନ୍‌କୁ ଆକଆଃ ଆପ୍‌ନାଃ ଠାୟାଦ୍‌ରେ ଆତଃମିସାକ ତିଙ୍ଗୁନାଃ । ନେଆଁ ରିକାନାଗେନ୍ତେ ପାର୍‌ମେଶ୍ୱାର୍ ପେଡେୟାନ୍‌ନିଃ ତାନିଃ । ୨୪ ସାଅଁସାର୍ ହଡ଼କ ବିର୍‌ରେୟାଃ ଜାଇତୁନ୍ ଦାରୁରେନ୍ କତକ ଲେକାଃକ । ଏନାକେ ମାଆଃ କେଦ୍‌ତେ ବାଖ୍‌ଡିରେ ରୟାକାନ୍ ଜାଲ୍‌ପାଇ ଦାରୁଲ୍‌ଃ ଜଡେନ୍‌କେଦ୍‌ତେ କାଲ୍‌ମିକାନା । ଯିହୁଦୀ ହଡ଼କ ବାଖ୍‌ଡିରେ ରୟାକାନ୍ ଜାଲ୍‌ପାଇ ଦାରୁ ଲେକାଃକ । ନେ ଦାରୁରେୟାଃ ମାଆଃକାନ୍ କତକକେ ଆତଃମିସା ଦାରୁଲ୍‌ଃ ଜଡେନ୍‌କେଦ୍‌ତେ କାଲ୍‌ମି ନାଙ୍ଗ୍ ପାର୍‌ମେଶ୍ୱାର୍‌କେ ପୁରାଃ ସାହାଜ୍‌ଗିଆ ।

ସବେନ୍‌କ ନାଗେନ୍ତେ ପାର୍‌ମେଶ୍ୱାର୍‌ଆଃ ଲିନିବୁଇ

୨୫ ହେ ହାଗା ମିଶିକ, ଆଇଙ୍ଗ୍ ମିଆଁଦ୍ ଉକୁଆକାନ୍ ସାର୍‌ତି କାଜିକେ ଆପେତାଃରେଇଙ୍ଗ୍ ଉଦୁବ୍‌ତାନା । ଏନା ଆୟୁମ୍‌କେଦ୍‌ତେ ଆପେ ଆପାନ୍‌କେ ଆତଃ ସେଣ୍‌ାନ୍ ମେନ୍ତେ କାପେ ଆଟ୍‌କାରେୟା, ଇସ୍ତାଏଲ୍ ହଡ଼କଆଃ କା ମାନାତିଙ୍ଗ୍‌ତେୟାଃ ଚୁଣ୍ଟୁ ଜାକେଦ୍ କା ତାଇନାଃ । ସାଅଁସାର୍ ହଡ଼କ ସବେନ୍‌କ ପାର୍‌ମେଶ୍ୱାର୍‌ତାଃତେ ହିଜୁଃ ଜାକେଦ୍ ଯିହୁଦୀ ହଡ଼କ ଏନଲେକାଗିକ ତାଇନା । ୨୬ ଆତଃ ନେ'ଲେକାତେ ଗଟା ଇସ୍ତାଏଲ୍‌ରେନ୍ ହଡ଼କ ଜୀଉବାସ୍ତାଅକ ନାମେୟା, ଚିୟାଃତି ଧାରାମ୍‌ପୁଅ୍‌ରେ ନେ'ଲେକା ଅଲାକାନା,

“ସିୟୋନ୍‌ଏତେ ଜୀଉବାସ୍ତାଏ ଏମ୍‌ନିଃ ହିଜୁଃଆଏ,

ଆତ୍ମା ଇନିଃ ଯାକୁଆଃ କିଲିକତାଃଏତେ ସବେନ୍
ଏଡକାନ୍ତେୟାଃକଏ ସାଜିନେଆ ।

୨୭ ଆଇଙ୍ଗ୍ ଇନ୍କୁଆଃ ପାପକ ସାଜିନେ

ଇମ୍ତା ଇନ୍କୁଲଃ ନେ ରାଜିନାମାଃ ବାଇୟା ।”

୨୮ ଆପେୟାଃ ବୁଗିନାଃ ନାଗେନ୍ତେ ଯିହୁଦୀ ହଡକ ସୁକୁକାଜିକେ
ବାଗିକେଦ୍ତେ ପାର୍ମେଶ୍ଵାର୍ଆଃ ବାଇରିକ ହବାକାନା । ମେନ୍ଦ
ପାର୍ମେଶ୍ଵାର୍ଆଃ ହରାତେ ସାଲାୟାନ୍ଲଃ ଇନ୍କୁଆଃ ପୁର୍ଖା
ହାଡାମକଆଃ ହରାତେ ଇନ୍କୁ ପାର୍ମେଶ୍ଵାର୍ଆଃ ଦୁଲାଡ୍ ଗାତିକ
ହବାକାନା । ୨୯ ଚିଆଃଚି ପାର୍ମେଶ୍ଵାର୍ ଅକନ୍କକେ ସାଲାକାଦକଆ
ଆତ୍ମା ଆଗିଷକାଦକଆ, ଇନ୍କୁକେ ଆୟାଃ ଦାନ୍ ଏମ୍ ନାଗେନ୍ତେ
ମନ୍ରେ ଉହାଟ୍କାଦ୍ତେୟାଃ ଚିତଲାହ କା ବାଦ୍ଲାଅଃଆ ।
୩୦ ସାଅଁସାର୍ ହଡକ ସିଦା ପାର୍ମେଶ୍ଵାର୍ଆଃ କା ମାନାତିଙ୍ଗ୍ ହଡକ
ତାଇକେନା, ମେନ୍ଦ ନାହାଁଃ ଯିହୁଦୀ ହଡକଆଃ କା ମାନାତିଙ୍ଗ୍
ହରାତେ ସାଅଁସାର୍ ହଡକ ପାର୍ମେଶ୍ଵାର୍ଆଃ ଦାୟାକ ନାମାକାଦା
। ୩୧ ଚିୟାଃଚି ସାଅଁସାର୍ ହଡକହଗି ଦାୟାକ ନାମାକାଦା, ଯିହୁଦୀ
ହଡକ ପାର୍ମେଶ୍ଵାର୍ତାଃଏତେ ସାଜିନ୍କାନ୍ରେୟ, ମୁସିଙ୍ଗ୍ ହୁଲାଙ୍ଗ୍
ଇନ୍କୁ ରୁହାଡକେଦ୍ତେ ଦାୟାକ ନାମେୟା । ୩୨ ପାର୍ମେଶ୍ଵାର୍
ସବେନ୍କକେ କାଜି କା ମାନାତିଙ୍ଗ୍ ନାଗେନ୍ତେ ବାଗିୟାକାଦକଆ,
ଜେ'ଲେକାଚି ଇନିଃ ସବେନ୍କକେ ଦାୟାକଆ ।

ପାର୍ମେଶ୍ଵାର୍ଆଃ ମାନାରାଙ୍ଗ୍

୩୩ ପାର୍ମେଶ୍ଵାର୍ ଚିମିନ୍ ପୁରାଃଗି ମାରାଙ୍ଗ୍ ତାନିଃ, ଇନିୟାଃ
ବୁଜି ଆତ୍ମା ସେଣ୍ଟାରେୟାଃ ବୁଣ୍ଟୁ ବାନଃଆ । ଅକଏ ଇନିୟାଃ
ବିଚାରକେ ଆଟ୍କାର୍ଡରୁମ୍ ଦାଡ଼ିୟା ? ଅକଏ ଇନିୟାଃ ହରାକେ
ଆଟ୍କାର୍ଡରୁମ୍ ଦାଡ଼ିୟା ? ୩୪ ଧାରାମ୍ପୁଅରେ ଅଲାକାନା,

“ଅକଏ ପାର୍ମେଶ୍ଵାର୍ଆଃ ମନ୍କେ ସାରିଦାଡ଼ିୟା ?

ଅକଏ ଇନିଃକେ ଇତୁ ଏମ୍ଦାଡ଼ିୟା ?”

୩୫ ଅକଏ ଚିନାଃ ପାର୍ମେଶ୍ଵାର୍କେ ଜେଡନାଃ ଏମ୍ ଦାଡ଼ିକିୟାଏ ଯେ,
ପାର୍ମେଶ୍ଵାର୍କେ ଏନାରେୟାଃ ବାଦ୍ଲାରେ ଏମ୍ ଲାଗାତିଙ୍ଗ୍
ହବାଅଃତାନା ?

୩୭ ✨ସବେନ୍ ବିଷାଏ ପାର୍ମେଶ୍ୱାର୍ତେ ବାଇୟାକାନା, ସବେନାଃ
ଇନିୟାଃ ହରାତେ ଆତଃ ଇନିଃ ମାନାରାଙ୍ଗ ନାଗେନ୍ତେ ହବାକାନା ।
ଜାନାଅ ଜାନାଅ ପାର୍ମେଶ୍ୱାର୍ତାଃ ମାନାରାଙ୍ଗ ହବାଅଃକା । ଆମେନ୍
।

୧୨

ପାର୍ମେଶ୍ୱାର୍ତକେ ସେଞ୍ଜାରେୟାଃ ଜୀଦାନ୍

୧ ଏନାମେନ୍ତେ, ହେ ହାଗା ମିଗିକ, ଆବୁ ନାଗେନ୍ତେ
ପାର୍ମେଶ୍ୱାର୍ତାଃ ପୁରାଃ ଲିନିବୁଇ ହବାକାନ୍ ହରାତେ, ଆଇଙ୍ଗ୍
ଆପେକେଇଙ୍ଗ୍ ବିନ୍ତ୍ରପେ ତାନା, ପାର୍ମେଶ୍ୱାର୍ତାଃରେ ଆପେ
ଆପ୍ତନାଃ ହଡ଼ମକେ ପାବିତାର୍ ଜାନିଦ୍ ଦାଣ୍ଟେଁ ଲେକା ରାକାବେପେ
। ଇନିୟାଃ ସେଞ୍ଜାରେ ଆପାନ୍କେ ଜିମାକେଦ୍ତେ ଇନିୟାଃ
ସୁକୁଇରିୟାଃ ଲେକା ହବାଅଃପେ । ଏନାଗି ପାର୍ମେଶ୍ୱାର୍ତାଃ ସାର୍ତ୍ତି
ସେଞ୍ଜା ତାନା । ୨ ନେ ଅତେଦିଶ୍ୱମ୍ରେ ଆପେ ନେ ପାରିୟାରେନ୍
ହଡ଼କ ଲେକା ଆଲ୍ପେ ହବାଅଃଆ । ପାର୍ମେଶ୍ୱାର୍ ଆପେୟାଃ
ମନ୍କେ ବାଦଲ୍ୟାକେଦ୍ତେ ପୁରାଗି ଆପେୟାଃ ମନ୍ତ୍ତିତାର୍ତ୍ତରେୟାଃ
ଉଡ଼ଃକ ନାଞ୍ଜାଲେକା ହବାଅଃକା । ଏନାରେ, ପାର୍ମେଶ୍ୱାର୍ତାଃ
ଇଛାସାନାଙ୍ଗ୍ ତିନାଃ ତାନାଃ, ଆୟାଃ ଆୟାର୍ରେ ଅକ କାଜିକ
ବୁଗିନାଃ ତାନାଃ, ଆଇଃକକେ ସୁକୁଆନ୍ ଆତଃ ପକ୍ତାଃଅତେୟାଃ
ତାନାଃ, ଏନା ଆପେ ଆଟ୍ଟକାର୍ତ୍ତରୁମ୍ ଦାଡ଼ିୟାଃପେ ।

୩ ପାର୍ମେଶ୍ୱାର୍ ଆଇଙ୍ଗ୍କେ ବିଶେଷ୍ ସାୟାଦ୍ ଏମାକାଦିଙ୍ଗ୍
ହରାତେ ଆପେ ସବେନକକେଇଙ୍ଗ୍ କାଜିପେତାନା, ଆପେ ଆପାନାଃ
ବିଷାଏରେ ଜେ'ଲେକା ଉଡ଼ଃ ଲାଗାଡିଙ୍ଗ୍ୟାଃ ଏନାଏତେ ପୁରାଃ
ଆଦକା ମାରାଙ୍ଗ୍ ଲେକା ଆଲ୍ପେ ଆଟ୍ଟକାରେନକା, ମେନ୍ଦ୍
ପାର୍ମେଶ୍ୱାର୍ ଆପେକେ ଏମାକାଦ୍ପେ ବିଶ୍ୱାସ୍ ଲେକାଗି ଆପ୍ତନାଃ
ବିଚାର୍ ରିକାଏପେ । ୪ ✨ଆବୁଆଃ ହଡ଼ମରେ ପୁରାଃଗି ହିସାକ
ମେନାଃ ଆତଃ ସବେନାଃରେୟାଃ କାମିକ ମିଦରାକାମ୍ଗି ବାନଃଆ
। ୫ ଏନ୍ଲେକାଗି ଆବୁ ପୁରାଃଗି ମେନାବୁଆ, ମେନ୍ଦ୍ ସବେନକ
ଶ୍ରୀଷ୍ଟଲଃ ମେସାକାନ୍ ହରାତେ, ଆବୁ ମିଆଦ୍ ହଡ଼ମ୍ ତାନ୍ବୁ ଆତଃ
ହଡ଼ମରେ ସବେନ୍ ହିସା ମେନାଃ ଲେକାଗି ମିହୁଡ୍ ଆତଃମିହୁଡ୍ଲଃ

✨ ୧୧:୩୭ ୧୧:୩୭ ୧ କରିନ୍ଥ୍ରିୟା ୮:୬. ✨ ୧୨:୪ ୧୨:୪ ୧ କରିନ୍ଥ୍ରିୟା ୧୨:୧୨.

ଜଡ଼େନକାନାବୁ । ^୬ ☆ଏନାମେନ୍ତେ ଆବୁ ନାଙ୍ଗ ପାରମେଶ୍ୱାର୍ଥାଃ ସାୟାଦ୍ ଲେକାତେ ଆୟାଃତାଃଏତେ ନାମାକାଦ୍ ଏଟାଃ ଏଟାଃ ଦାନକକେ ଆବୁକେ ବୁଗିଲେକା ବେଭାର ଲାଗାତିଙ୍ଗୟାଃ । ଆବୁ ପାରମେଶ୍ୱାର୍ଥାଃ ବାଚାନକେ ଉଦୁବ୍ ନାଗେନ୍ତେ ବାର୍ଦାନବୁ ନାମାକାଦରେଦ, ଆବୁଆଃ ପକତା ବିଶ୍ୱାସ୍ ହରାତେ ଏନ୍ କାମିକେ ରିକା ଲାଗାତିଙ୍ଗୟାଃ । ^୭ ସେଝା ନାଗେନ୍ତେ ଏନ୍ ବାର୍ଦାନବୁ ନାମାକାଦରେଦ, ଆବୁକେ ସେଝା ଲାଗାତିଙ୍ଗୟାଃ; ଇନିତୁ ଏମ୍ ନାଗେନ୍ତେ ବାର୍ଦାନବୁ ନାମାକାଦରେଦ, ଇନିତୁ ଏମ୍ ଲାଗାତିଙ୍ଗୟାଃ; 「 ଜେତାଏ ଏଟାଃକକେ ଜୀଉରାଡେଃ ଏମ୍ରେୟାଃ ବାର୍ଦାନ ନାମାକାଦରେଦ, ଏନା ଇନିଃକେ ରିକା ଲାଗାତିଙ୍ଗୟାଃ; ଦାନ ଏମ୍ ନାଗେନ୍ତେ ବାର୍ଦାନ ନାମାକାଦ୍ ହଡ଼ ଲେବେଃ ମନ୍ତେ ଦାନ୍ ଏମେକାଏ । ଏଟାଃନିୟାଃ କାମିରେ ଯାତାନ୍ ଇଦିରେୟାଃ ଆକ୍ତେୟାର ନାମାକାଦରେଦ, ଆଇଃକକେଗି କେଟେଦ୍ କାମି ରିକା ଲାଗାତିଙ୍ଗୟାଃ; ଦାୟା ରିକାତାନ୍ ହଡ଼ ରାସ୍କାତେ ଦାୟା ରିକାଏକାଏ ।

^୮ ଦୁଲାଡ଼୍, ସାର୍ତି ହବାଅଃ ଲାଗାତିଙ୍ଗୟାଃ । ଏଡ଼କାନାଃତେୟାଃକେ ହିଲାଙ୍ଗ୍‌ୟେ, ବୁଗିନ୍ତେୟାଃକେ ସାବେପେ । ^{୧୦} ଶ୍ରୀଷ୍ଟ୍ ବିଶ୍ୱାସୀ ହାଗା ମିଶିକ ଲେକା ମିହୁଡ଼୍, ଆତଃମିହୁଡ଼୍‌କେ ଦୁଲାଡ଼ିପେ ଆତଃ ମିହୁଡ଼୍, ଆତଃମିହୁଡ଼୍‌କେ ମାଇନିପେ । ^{୧୧} କେଟେଦ୍ କାମି କାମିପେ ଆଲ୍‌ପେ ଢିଲାଅଃଆ ଆତଃ ମନ୍‌ସୁରୁଦରେ ପୁରାଃ ଭାକ୍ତିତେ ପ୍ରାଭୁକେ ସେଝାଇପେ । ^{୧୨} ପୁରାଃ ଆସ୍ରାଏତାନଲଃ ରାସ୍‌କାରେ ତାଇନ୍‌ପେ । ଦୁକୁହାସୁ ଇମ୍‌ତା ଧୂରାଜ୍ ସାବ୍‌କେଦ୍‌ତେ ତାଇନ୍‌ପେ ଆତଃ ସବେନ୍ ଇମ୍‌ତା ବିନ୍ତିରେ ତାଇନ୍‌ପେ । ^{୧୩} ପାରମେଶ୍ୱାର୍ଥାଃ ହଡ଼କ ଜାଞ୍ଜିଅଃତାନ୍ ଇମ୍‌ତା ହାନାଟିଙ୍ଗ୍ ରିକାଏପେ ଆତଃ ଆପେ ଅଡ଼ାଃତେ ହିଜୁଃତାନ୍ କା ନେଲ୍‌ଉରୁମ୍ ହଡ଼କକେ ପେଡ଼ାକନାଙ୍ଗ୍ ସେକାଡ଼ାକାନ୍‌ପେ ।

^{୧୪} ☆ଆପେକେ ଅକନ୍ ହଡ଼କ ସିଗିଦ୍‌ପେୟାକ, ଇନ୍‌କୁଆଃ ଆଶିଷ୍ଟ୍ ନାମଃ ନାଗେନ୍ତେ ପାରମେଶ୍ୱାର୍ତାଃରେ ବିନ୍ତିପେ । ଇନ୍‌କୁକେ ଆଶିଷ୍ଟକପେ, ଆଲ୍‌ପେ ସାର୍‌ପାଅକଥା । ^{୧୫} ରାସ୍‌କାରେ ତାଇନ୍‌ତାନ୍ ହଡ଼କଲଃ ରାସ୍‌କାଅଃପେ, ଆତଃ ରାଆଃଏତାନ୍ ହଡ଼କଲଃ

☆ ୧୨:୭ ୧୨:୭ ୧ କରିନ୍ତିୟ ୧୨:୪-୧୧. ☆ ୧୨:୧୪ ୧୨:୧୪ ମାଥୁଃ ୫:୪୪; ଲୁକ ୭:୨୮.

ରାଆଏଏପେ । ୧୭ ଆପେ ସବେନ୍‌କଲଃ ମିଦ୍ ମନ୍‌ତେଗି ତାଇନ୍‌ପେ, ଆପେ ଆପାନ୍‌କେ ମାରାଙ୍ଗ୍ ମେନ୍ତେ ଆଲ୍‌ପେ କାଜିନ୍, ଆମିକ୍‌ରେ ଆତଃ ସାଂସାର୍‌ରେୟାଃ ସବେନ୍‌ ଲେକାନ୍ ନାରାଦୁରାରେ ତାଇନ୍‌ତାନ୍ ହଡ଼କଲଃ ଗାତିରେ ତାଇନ୍‌ପେ । ଆପାନ୍‌କେ ସେଣ୍‌ନ୍ ମେନ୍ତେ ଆଲ୍‌ପେ କାଜିନ୍ ।

୧୭ ଏଡ଼କାନ୍ ବାଦ୍‌ଲାରେ ଏଡ଼କାନ୍ କାମି ଆଲ୍‌ପେ ରିକାଏୟା; ସବେନ୍‌ ହଡ଼କଆଃ ଆୟାର୍‌ରେ ଅକ୍‌ନାଃ ବୁଗିନାଃ ତାନାଃ ଏନାଗି ରିକାଏପେ । ୧୮ ଆପେ ସବେନ୍‌ ହଡ଼କଲଃ ସୁକୁରେ ତାଇନଃ ନାଗେନ୍ତେ ହବାସାକାଅଃ ଲେକା ସବେନାଃ ରିକାଏପେ । ୧୯ ହେ ଦୁଲାଡ଼କ୍, ଆପେ ଆପେଗି ଜେତାଏୟାଃ ବାଦ୍‌ଲା ଆଲ୍‌ପେ ଇଦିୟା, ମେନ୍‌ଦ୍ ପାର୍‌ମେଶ୍ୱାର୍‌ଆଃ ଖୁସ୍‌ରେ ସାଜାଇ ହବାଅଃ ନାଗେନ୍ତେ ଇନିଃକେ ବାଗି ତାଇପେ । ଚିୟାଃତି ଧାରାମ୍‌ପୁଅରେ ଅଲ୍‌କାନା, “ପ୍ରାଭୁ କାଜିତାନାଏ, ସାଜାଇ ଏମ୍‌ତେୟାଃ ଆଇୟାଃ କାମିତାନାଃ, ଆଇଙ୍ଗ୍ ଆୟାଃ କାମି ଲେକାଗି ନାଲାଇଙ୍ଗ୍ ଏମାଲ୍‌ୟା ।” ୨୦ ଆତଃଗି “ଆପେୟାଃ ବାଇରି ରେଙ୍ଗେଃତାନ୍‌ରେଦ୍ ଜଜମାଃ ଏମାଲ୍‌ପେ, ଇନିଃ ତେତାଙ୍ଗ୍‌ତାନ୍‌ରେଦ୍ ନୁଁଏ ନାଙ୍ଗ୍ ଦାଆଃ ଏମାଲ୍‌ପେ; ନେ'ଲେକା ରିକାଇ ରେଦ୍ ଇନିଃ ଗିହୁଗଃଆଏ ।” ୨୧ ଏଡ଼କାନ୍ ହରାତେ ଆଲ୍‌ପେ ହାରାଅଃଆ, ସବେନ୍‌ ଏଡ଼କାନ୍ କାଜିକେ ବୁଗିନ୍ କାମିତେ ଜିତାଏପେ ।

୧୩

ରାଇଜ୍ ଚାଲାଅତାନ୍‌କଆଃ କାଜି ମାନାତିଙ୍ଗ୍‌ପେ

୧ ସବେନ୍‌କକେ ରାଇଜ୍ ଚାଲାଅତାନ୍‌କଆଃ କାଜି ମାନାତିଙ୍ଗ୍ ଲାଗାତିୟାଃ, ଚିୟାଃତି ପାର୍‌ମେଶ୍ୱାର୍‌ଆଃ ବେଗାର୍ ଆରୁତେ ଜେତାଏ ରାଇଜେ ନାଗେନ୍ତେ ଆକ୍‌ତେୟାର୍ କାଏ ନାମେୟା, ଆତଃ ଆକ୍‌ତେୟାର୍ ନାମାକାଦ୍ ହଡ଼କ ପାର୍‌ମେଶ୍ୱାର୍‌ଆଃ ହରାତେ ନାମାକାଦାକ । ୨ ଏନାମେନ୍ତେ ଜେତାଏ ଆକ୍‌ତେୟାର୍ ନାମାକାଦ୍ ହଡ଼କେ କାଏ ମାଇନାଃ, ଇନିଃ ପାର୍‌ମେଶ୍ୱାର୍‌ତେ ଠାହାରାଅକାଦ୍ ଆନ୍‌ରୁକେ କାଏ ମାନାତିଙ୍ଗ୍ ତାନା । ନେ'ଲେକା ରିକାଏତାନ୍ ହଡ଼ ଆଇଃକ୍‌ଗି ସାଜାଇ ଆଉଝେୟାଏ । ୩ ଅକ୍ ହଡ଼କ ବୁଗିନ୍ କାମି ରିକାଃକ, ଇନ୍‌କୁ ଆକ୍‌ତେୟାର୍ ନାମାକାଦ୍‌କକେ ଆତଃ

ଆକଥାଃ ହାକିମ୍‌କକେ ବର କା ଲାଗାତିଙ୍ଗ୍‌ୟାଃ, ମେନ୍‌ଦ ଏଡ୍‌କାନ୍ କାମିତାନ୍ ହଡ୍‌କକେ ବର ଲାଗାତିଙ୍ଗ୍‌ୟାଃ । ବେଗାର୍ ବରତେ ତାଇନ୍ ସାନାଙ୍ଗ୍‌ତାନ୍ ରେଦପେ ହାକିମ୍‌କଥାଃ ଆୟାର୍‌ରେ ବୁଗିନ୍ କାମିକ ରିକାଏପେ । ଏନ୍‌ରେଦ ଇନ୍‌କୁ ଆପେକେ ମାଇନ୍‌ପେୟାକ । ୪ ଚିୟାଃଟି ଇନ୍‌କୁ ଆପେୟାଃ ବୁଗିନ୍ କାମି ରିକାଏ ନାଗେନ୍ତେ ପାର୍‌ମେଶ୍ୱାର୍‌ଆଃ ସାଲାକାନ୍ ଦାସିତାନ୍‌କ । ମେନ୍‌ଦ ଆପେ ଏଡ୍‌କାନ୍ କାମି ରିକାଏ ରେଦ ଇନ୍‌କୁକେ ବରକୁପେ, ଚିୟାଃଟି ସାଜାଇ ଏମ୍ ନାଗେନ୍ତେ ଇନ୍‌କୁଆଃ ପେଡ୍‌ଃ ମେନାଃ । ଏଡ୍‌କାନ୍ କାମିତାନ୍ ହଡ୍‌କକେ ସାଜାଇ ଏମ୍ ନାଗେନ୍ତେ ଇନ୍‌କୁ ପାର୍‌ମେଶ୍ୱାର୍‌ଆଃ ହୁକୁମ୍‌କ ମାନାତିୟାଃ । ୫ ଏନାମେନ୍ତେ ଆପେକେ ରାଇଜ୍ ଚାଲାଅତାନ୍‌କଥାଃ କାଜି ମାନାତିଙ୍ଗ୍ ଲାଗାତିଙ୍ଗ୍‌ୟାଃ, ପାର୍‌ମେଶ୍ୱାର୍‌ଆଃ ସାଜାଇ ନାମେରେୟାଃ ବରତେ କାହାଗି, ମେନ୍‌ଦ ଆପ୍‌ନାଃ ବିବେକ୍‌ରେ ନେଆଁ ବୁଗିନାଃ ତାନାଃ ମେନ୍ତେ ସାରିତାନ୍ ହରାତେ ଆପେକେ ରିକା ଲାଗାତିଙ୍ଗ୍‌ୟାଃ ।

୬ ଏନାମେନ୍ତେ ଆପେ କାର୍‌ହଁ ଏମ୍‌ତାନାପେ, ଚିୟାଃଟି ରାଇଜ୍ ଚାଲାଅତାନ୍‌କ ଆକଥାଃ ପୁରା କାମି କାମିତାନ୍ ଇମ୍‌ତା ପାର୍‌ମେଶ୍ୱାର୍‌ଆଃ ଦାସିକ ଲେକା କାମିତାନାକ । ୭ ଏନାମେନ୍ତେ ଇନ୍‌କୁଆଃ ଲାଗାତିଙ୍ଗ୍‌ତେୟାଃକ ଏମାକପେ, ଅକ୍‌ନାଃ କାର୍ ଏମ୍ ଲାଗାତିଙ୍ଗ୍‌ୟାଃ ଏନା ସବେନାଃ ଏମାକପେ, ବର ଲାଗାତିଙ୍ଗ୍‌ରେ ବରକପେ ଆଡ଼ଃ ସୁସାର୍ ଲାଗାତିଙ୍ଗ୍‌ରେ ସୁସାର୍‌କପେ ।

ମିହୁଡ୍‌ ଆଡ଼ଃମିହୁଡ୍‌ଲଃ ଦୁପୁଲାଡ୍‌

୮ ମିହୁଡ୍‌ ଆଡ଼ଃମିହୁଡ୍‌କେ ଦୁଲାଡ୍‌ ବାଗିକେଦତେ ଆଡ଼ଃ ଏଟାଃ ଜେତାନ୍ ବିଷାଏରେ ଜେତାଏୟାଃ ଆଲ୍‌ପେ ରିଶୀନାଃ । ଜେତାଏ ଏଟାଃନିଃକେ ଦୁଲାଡ଼ାଃଏ ଇନିଃ ଆନ୍‌ରୁକେ ମାନାତିଙ୍ଗ୍‌କାଦା । ୯ “ଆଲ୍‌ପେ ଆପାଙ୍ଗ୍‌ରାଃ, ହଡ୍‌ ଆଲ୍‌ପେ ଗଗାଏୟାଃ, ଆଲ୍‌ପେ କୁମ୍‌ଡୁଆଃ, ଏଟାଃନିଆଃ ଜିନିଷ୍‌କେ ଆଲ୍‌ପେ ହାୟାଅଥା,” ନେ'ଲେକାନ୍ ସବେନ୍ ଆନ୍‌ରୁ ମିଆଁଦ୍ ଆନ୍‌ରୁରେ ମେସାକାନା, “ଆମାଃ ହପ୍‌ରଜାପାଃରେନିଃକେ ଆପାନାଃ ଲେକା ଦୁଲାଡ୍‌ମେ

☆ ୧୩:୭ ୧୩:୭ ମାଥୁର ୨୨:୨୧; ମାର୍କ ୧୨:୧୭; ଲୁକ ୨୦:୨୫.

୧୦ ଆମ୍ ଦିହୁଡ଼କେ ଦୁଲ୍ଲାଡ଼ିତାନ୍ ରେଦ, ଇନିୟାଃ ଏଡ଼କାନାଃ ଚିତ୍ତଲ୍ଲାହ ଆଲ୍ଲମ୍ ରିକାଏୟା, ଏନାତେ ଦୁଲ୍ଲାଡ଼ତେଗି ସବେନ୍ ଆନ୍ତୁ ପୁରାଅଃତାନା ।

୧୧ ନାହ୍ନାଃ ଆପେ ନେ ସବେନାଃକେ ରିକା ଲାଗାଡ଼ିଙ୍ଗ୍‌ୟାଃ, ଚିଆଃଚି ଦୁଡ଼ମ୍‌ଏତେ ଏୟନଃରାଃ ଦିପିଲି ସେଟେରାକାନା । ଆବୁଆଃ ବିଶ୍ୱାସ୍ ହବାୟାନ୍ ହୁଲ୍ଲାଙ୍ଗ୍‌ତାଃଏତେ ନାହ୍ନାଃ ଜୀଉବାଞ୍ଚାଅ ନାମେରେୟାଃ ଦିପିଲି ପୁରାଃଗି ନାଡ଼େଜାକାନା । ୧୨ ନୁବାଃ ସେନଃୟାନ୍‌ଗିୟା, ମାର୍ସାଲ୍ଲ ହିଜୁଃ ସେଟେରଃତାନା । ଏଲା, ନୁବାଃରେୟାଃ ଏଡ଼କାନ୍ କାମିକ ବାଗିକେଦତେ ମାସ୍ମାଲ୍ରେ ହବାଅଃତାନ୍ ବୁଗିନ୍ କାମି ରିକା ନାଗେନ୍ତେ ସେକାଡ଼ାକାନ୍‌ଗିବୁ ତାଇନାଃ । ୧୩ ଦିଶୁମ୍‌ରେୟାଃ ରିଜରାଙ୍ଗ୍ ଆତଃ ଇଲିଆରଖ୍ରେ ବୁଲଃତାନ୍, ହଡ଼ମ୍‌ରେୟାଃ ଏଡ଼କାନ୍ ସାନାଙ୍ଗ୍ ଚାଏ ଏଡ଼କାନ୍ ଚାଇଲ୍ ଚାଲାନ୍, ଲାପାଡ଼ାଇ ଆତଃ ହିସ୍‌ଙ୍ଗାରେ କା ତାଇନ୍‌କେଦତେ ଏଲା, ଆବୁ ବୁଗିନ୍ ଆତଃ ମାର୍ସାଲ୍ରେନ୍ ହଡ଼କ ଲେକା ବୁଗିନ୍ ଚାଇଲ୍ ଚାଲାନ୍‌ରେବୁ ତାଇନାଃ । ୧୪ ମେନ୍‌ଦ ପ୍ରାଭୁ ଯୀଶୁ ଖ୍ରୀଷ୍ଟ୍‌ଆଃ ଗୁନ୍ ଲେକା ଚାଇଲ୍ ଚାଲାନ୍ ରିକାଏପେ, ପାପ୍ ଆତଃ ହଡ଼ମ୍‌ରାଃ ଏଡ଼କାନ୍ ସାନାଙ୍ଗ୍‌କେ ପୁରାଏ ନାଗେନ୍ତେ ଆଲ୍ଲପେ ଉଡ଼୍ଝୟା ।

୧୪

ଏଟାଃନିଃକେ ଆଲ୍ଲପେ ବିଚାରାଃ

୧ *ବିଶ୍ୱାସ୍‌ରେ ତାଇନ୍‌ତାନ୍ ନାରାଦୁରାକକେ ଦାରମ୍‌କପେ, ମେନ୍‌ଦ ଇନ୍‌କୁଆଃ ଆକଆଃ ଆପନାଃ ବିଶ୍ୱାସ୍ କାଜିରେ ଆଲ୍ଲପେ କାପ୍‌ଜିଆଃ । ୨ ଚିମିନ୍ ହଡ଼କ ସବେନାଃ ଜମ୍‌ରେୟ ହବାଅଃଆ ମେନ୍ତେ ବିଶ୍ୱାସ୍‌ଆଃକ, ମେନ୍‌ଦ ବିଶ୍ୱାସ୍‌ରେ ନାରାଦୁରା ହଡ଼ ଏସ୍‌କାର୍ ଆଡ଼ାଃସାକାମ୍ ଜମ୍‌ମାଃଏ । ୩ ସବେନ୍ ଲେକାନ୍ ଜମ୍‌ମେୟାଃ ଜମ୍‌ତାନ୍ ହଡ଼କ, ଆଡ଼ାଃସାକାମ୍ ଜମ୍‌ତାନ୍ ହଡ଼କକେ ଆଲ୍ଲକାକ ଲାୟାକକା, ଆତଃ ଆଡ଼ାଃସାକାମ୍ ଜମ୍‌ତାନ୍ ହଡ଼କ, ସବେନ୍ ଲେକାନ୍ ଜମ୍‌ମେୟାଃ ଜମ୍‌ତାନ୍ ହଡ଼କକେ ଆଲ୍ଲକାକ ବିଚାରକକା, ଚିଆଃଚି ପାର୍‌ମେଶ୍ୱାର୍ ଇନ୍‌କୁକେହଗି ଗ୍ରାହାଣ୍‌କାଦକଆ । ୪ ଏଟାଃନିୟାଃ ଦାସିକକେ ବିଚାର୍ ନାଗେନ୍ତେ ଆପେ ଅକଏ ତାନ୍‌ପେ ? ଇନ୍‌କୁ ବୁଗିନାଃ ରିକାକାଦାକ

☆ ୧୪:୧ ୧୪:୧ କଲସିୟ ୨:୧୭.

ଚାଏ ଏଡକାନାଃ ରିକାକାଦାକ ଏନା ଆକଆଃ ଗୁସିୟାଁ ଏସକାର୍ ବିଚାରେୟାଏ । ଇନ୍କୁ ଗ୍ରାହାଣଃଆକ ଚିଆଃଚି ପ୍ରାଭୁ ଇନ୍କୁକେ ଗ୍ରାହାଣକାଦକଆ ।

୫ ଚିମିନ୍ ହଡକ ଏଚାଃ ହୁଲାଙ୍ଗକଏତେ ବିଶେଷ୍ ହୁଲାଙ୍ଗକେ ପୁରାଃଗିକ ମାଇନାଃ, ଆଡଃ ଚିମିନ୍ ହଡକ ସବେନ୍ ହୁଲାଙ୍ଗକେ ସାମାନ୍‌ଗିକ ମାଇନାଃ । ମେନ୍‌ଦ ଆବୁ ଆପ୍‌ନାଃ ବିଶ୍ୱାସ୍ ଲେକାତେ ମନ୍‌ରେ ଉଡ଼ୁତାନଲଃ ତିଙ୍ଗୁକେଚେଦ୍‌ଗିରୁ ତାଇନାଃ । ୬ ଅକନ୍ ହଡକ ମିଆଁଦ୍ ଦିନ୍‌କେ ବିଶେଷ୍ ଦିନ୍ ମେନ୍ତେ ଉଡ଼ୁତାନାକ, ଇନ୍କୁ ଏନାକେ ପ୍ରାଭୁଆଃ ମାଇନଃ ନାଗେନ୍ତେ ରିକାଏକାକ, ଆଡଃ ଅକନ୍ ହଡକ ସବେନ୍ ଲେକାନ୍ ଜମେୟାଁଃ ଜମ୍‌ତାନାକ, ଇନ୍କୁ ପାରମେଶ୍ୱାରକେ ଧାନ୍ୟାବାଦ୍ ଏମ୍‌ତାନଲଃ ଜମେକାକ, ଏନା ହରାତେ ପାରମେଶ୍ୱାର୍ ମାଇନଃଆଏ । ଅକନ୍ ହଡକ ସବେନ୍ ଲେକାନ୍ ଜମେୟାଁଃ କାକ ଜମ୍‌ତାନା, ଇନ୍କୁ ପାରମେଶ୍ୱାର୍‌ଆଃ ମାଇନଃ ନାଗେନ୍ତେ ରିକାଏକାକ ଆଡଃ ପାରମେଶ୍ୱାରକେ ଧାନ୍ୟାବାଦ୍ ଏମାଇକାକ । ୭ ଆବୁକଏତେ ଜେତାଏ ଆପ୍‌ନାଃ ନାଗେନ୍ତେ କାଏ ବାଞ୍ଛାଅଃଆ ଚାଏ ଆପ୍‌ନାଃ ନାଗେନ୍ତେ ଏସକାର୍ ଜୀଉ କାଏ ଏମେୟା । ୮ ଆବୁ ବାଞ୍ଛାଅଃତାନ୍ ରେଦ୍ ପ୍ରାଭୁଆଃ ନାଗେନ୍ତେ ବାଞ୍ଛାଅଃତାନା, ଆଡଃ ଜୀଉ ଏମ୍‌ତାନ୍‌ରେଦ୍ ପ୍ରାଭୁଆଃ ନାଗେନ୍ତେ ଜୀଉ ଏମ୍‌ତାନାବୁ । ଏନାମେନ୍ତେ ଜୀନିଦ୍ ଆଡଃ ଗନଏଃରେ ଆବୁ ପ୍ରାଭୁଆଃତାନ୍‌ବୁ । ୯ ଚିୟାଃଚି ଖ୍ରୀଷ୍ଟ୍ ଗଏଃକେଦ୍‌ତେ ଜୀଉବିରିଦ୍‌ୟାନ୍ ହରାତେ ଜୀହୁଦଃତାନ୍‌କଆଃ ଆଡଃ ଗଜାକାନ୍‌କଆଃ ପ୍ରାଭୁ ହବାକାନାଏ । ୧୦ ☆ତାବ୍‌ଦ୍ ଆପେ ଚିନାଃ ନାଙ୍ଗ୍ ଆଡଃସାକାମ୍ ଜମ୍‌ତାନ୍ ହାଗାକକେ ବିଚାରକତାନାପେ ? ଆଡଃ ସବେନ୍ ଲେକାନ୍ ଜମେୟାଁଃ ଜମ୍‌ତାନ୍ ବିଶ୍ୱାସୀକକେ ଚିନାଃମେନ୍ତେପେ ହିଲାଙ୍ଗକତାନା ? ଆବୁ ସବେନ୍‌କକେ ପାରମେଶ୍ୱାର୍‌ଆଃ ବିଚାର୍ ଠାୟାଦ୍‌ରେ ବିଚାର୍ ନାଗେନ୍ତେ ତିଙ୍ଗୁନ୍ ଲାଗାତିଙ୍ଗ୍‌ୟାଁଃ । ୧୧ ଚିୟାଃଚି ଧାରାମ୍‌ପୁଥ୍‌ରେ ଅଲ୍‌କାନା,

“ପ୍ରାଭୁ କାଜିତାନାଏ, ଆଇଙ୍ଗ୍‌ଦ୍ ଜୀନିଦ୍ ପାରମେଶ୍ୱାର୍ ତାନିଙ୍ଗ୍,
ସବେନ୍‌କ ଆଇଁୟାଃ ଆୟାର୍‌ରେକ ଇକ୍‌ଡ୍‌ବୁମଆ,

☆ ୧୪:୧୦ ୧୪:୧୦ ୨ କରିନ୍ତିୟ ୫:୧୦.

ଆଡ଼ଃ ଆଇଙ୍ଗ୍ ପାର୍ମେଶ୍ଵାର୍ ତାନିଙ୍ଗ୍ ମେନ୍ତେ ସବେନ୍‌କ କାଜିୟା ।”

୧୨ ଆବୁ ସବେନ୍‌କକେ ପାର୍ମେଶ୍ଵାର୍‌ଆଃ ଆୟାର୍‌ରେ ଆପ୍‌ନାଃ ହିସାବ୍ ଏମଃ ଲାଗାତିଙ୍ଗ୍‌ୟାଃ ।

ଜେତାଏୟାଃ ତହଦଃନିଃ ଆଲ୍‌ପେ ହବାଅଃଆ

୧୩ ଏନାତେ ମିହୁଡ୍ ଆଡଃମିହୁଡ୍‌ଆଃ ବିଚାର୍ ଆଲ୍‌ପେ ରିକାଏୟା, ନେ'ଲେକାହରି ଆଲ୍‌ପେ ରିକାଏ, ଅକ ହରାତେ ତି ଏଟାଃମିହୁଡ୍ ହାଗା ତହଦ୍‌କେଦ୍‌ତେ ପାପ୍‌ରେ ଉୟ୍‌ଗଃଆ । ୧୪ ଆଇଙ୍ଗ୍ ପ୍ରାଭୁ ଯୀଶୁଲଃ ମେନେସାରେ ତାଇନ୍ ହରାତେ ସାରିତାନାଇଙ୍ଗ୍ ଯେ, ସାର୍‌ତିଗି ଜେତାନ୍ ଜମେୟାଃ ଆପାନ୍‌ତେଗି କା ସଡ଼ରାଅଃଆ, ମେନ୍‌ଦ୍ ଜେତାଏ ହଡ୍ ଜେତାନ୍ ଜମେୟାଃକେ ସଡ଼ରାକାନା ମେନ୍ତେ ବିଶ୍ଵାସେରେଦ୍ ଏନ୍ ଜମେୟାଃ ଇନିୟାଃ ନାଗେନ୍ତେ ସଡ଼ରାଅଃଆ । ୧୫ ଆପେ ଜେତାନ୍ ଜମେୟାଃ ଜମ୍ ହରାତେ ଆପେୟାଃ ହାଗା ଚାଏ ମିଶିଆଃ ମନ୍‌ରେ ଦୁକୁପେ ଏମାଇତାନ୍‌ରେଦ୍, ଆପେ ଦୁଲାଡ୍‌ତେ କାପେ ସେସେନ୍‌ତାନା । ଅକ ହାଗା ଚାଏ ମିଶି ନାଗେନ୍ତେ ଖ୍ରୀଷ୍ଟ୍ ଜୀଉ ଏମ୍‌କେଦାଏ, ନେ ଜମେୟାଃ ନାଗେନ୍ତେ ଇନିୟାଃ ଜିୟନଃ ଆଲ୍‌ପେ ରିକାଏୟା । ୧୬ ଆପେ ଅକ୍‌ନାଃକେ ବୁଗିନ୍ ମେନ୍ତେପେ ଆଟ୍‌କାରେତାନା, ଏନ୍ ହରାତେ ଆପେୟାଃ ନୁଡୁମ୍ ଆଲ୍‌କା ଏଡ୍‌କାନଃକା । ୧୭ ତିଆଃତି ପାର୍ମେଶ୍ଵାର୍‌ଆଃ ରାଇଜ୍‌ଦ୍ ବିଶେଷ୍ଟକେଦ୍‌ତେ ଜଜମ୍ ନୁଁ ନାହାଁଲାଃ, ମେନ୍‌ଦ୍ ଏନା ପାବିତାର୍ ଆମ୍‌ରାଃ ହରାତେ ଏମାକାନ୍ ଧାର୍‌ମାନ୍, ଜୀଉସୁକୁ ଆଡଃ ରାସ୍‌କାନ୍‌ତେୟାଃ ତାନାଃ । ୧୮ ଜେତାଏ ନେ'ଲେକା ଖ୍ରୀଷ୍ଟ୍‌ଆଃ ସେଝା ରିକାଏ, ଇନିଃ ପାର୍ମେଶ୍ଵାର୍‌କେ ସୁକୁଇତିୟା ଆଡଃ ହଡ୍‌କଆଃ ଆୟାର୍‌ରେ ମାଇନ୍ ନାମେନିଃ ହବାଅଃଆଏ ।

୧୯ ଏନାମେନ୍ତେ ହିଜୁଃପେ, ଜୀଉସୁକୁ ଏମେତାନ୍ କାମିକକେ ଆବୁ କେଟେଜେ ନାଗେନ୍ତେବୁ କାମିୟା ଆଡଃ ମିହୁଡ୍ ଆଡଃମିହୁଡ୍‌କେ ଦେଙ୍ଗାତାନ୍ କାମିକବୁ କାମିୟା । ୨୦ ପାର୍ମେଶ୍ଵାର୍ ଅକଆଃ ରିକାକାଦାଏ ଏନାକେ ଜଜମାଃ ହରାତେ ଆଲ୍‌ପେ ଜିୟନେଆ । ସବେନ୍ ଲେକାନ୍ ଜମେୟାଃ ଫାର୍‌ତିଗିୟା ଆଡଃ ଜମ୍ ଦାଡ୍‌ିଅଃଆ, ମେନ୍‌ଦ୍ ଜେତାନ୍ ଜମେୟାଃ ହରାତେ ଆପେ ଜେତାଏୟାଃ ନାଙ୍ଗ୍

ତହଦ୍‌ଇଚିୟଃ ରେଦ ଏନ୍ ଜମେୟାଃ ଆଲପେ ଜମେୟା ।
 ୨୧ ଆପେ ହାକୁ ଚାଏ ମାସ୍ ଜମ୍‌ରେ ଆତଃ ଇଲିଆରୁଶ୍‌ରେ ବୁଲଃ
 ହରାତେ ଆପେୟାଃ ହାଗା ଚାଏ ମିଶି ବିଶ୍ୱାସ୍‌ରେ ତହଦଃରେଦ,
 ଏନ୍ ସବେନାଃଏତେ ସାଈନଃତେୟାଃ ବୁଗିନାଃ ତାନାଃ ।
 ୨୨ ନେ ବିଷାଏରେ ଆପେୟାଃ ଆପ୍‌ନାଃ ବିଶ୍ୱାସ୍‌ ପାର୍‌ମେଶ୍ୱାର୍‌
 ଏସ୍‌କାର୍‌ ସାରିକାଏ । ଅକନ୍ ହଡ୍‌ ବୁଗିନାଃ ତାନାଃ ମେନ୍ତେ
 ଆଟ୍‌କାର୍‌ଉରୁମ୍‌ତାନ୍‌ଲଃ ଜେତାନ୍ କାମି କାମିୟାଏ, ଆତଃ ଏନା
 ନାଗେନ୍ତେ ତାୟମ୍‌ତେ ଆପାନ୍‌କେ କାଏ ଚିଟାନ୍‌ନିଃ ସୁକୁତାନ୍‌ଗିଆଏ
 । ୨୩ ମେନ୍‌ଦ ଅକ ଜମେୟାଃ ଜମ୍ ନାଜ୍ ବୁଗିନାଃ ଚାଏ କା ବୁଗିନାଃ,
 ନେ କାଜି ମନ୍‌ରେ ଆଡ଼ାଃଉଡ଼ୁକେଦ୍‌ତେ ଜମେରେଦ, ଇନିଃ
 ପାର୍‌ମେଶ୍ୱାର୍‌ଆଃ ଆୟାର୍‌ରେ ସାଜାଇ ନାମେୟାଏ, ଚିଆଃଚି ଏନା
 ଆୟାଃ ବିଶ୍ୱାସ୍‌ ଲେକାତେ ନାହାଁଲାଃ । ବିଶ୍ୱାସ୍‌ ଚେତାନ୍‌ରେ ଅକ୍‌ନାଃ
 କା ଠାହାରାଅକାନା ଏନା ପାପ୍‌ ତାନାଃ ।

୧୫

ଏଟାଃନିଃକେ ସୁକୁଇଚିପେ ଆପାନ୍‌କେଦ କାହାଗି

୧ ଆବୁ ଆବୁଆଃ ବିଶ୍ୱାସ୍‌ରେ କେଟେୟାନ୍‌ଗି ମେନାବୁଆ,
 ଏନାତେ ଆବୁ ବିଶ୍ୱାସ୍‌ରେ ନାରାଦୁରା ମେନାକ ହଡ୍‌କକେ ଦେଙ୍ଗା
 ଲାଗାତିଙ୍ଗ୍‌ୟାଃ । ଆବୁ ଆପାନ୍‌କେ ଏସ୍‌କାର୍‌ ସୁକୁରେ ତାଇନଃ
 କା ଲାଗାତିଙ୍ଗ୍‌ୟାଃ । ୨ ମେନ୍‌ଦ ଆବୁ ଏଟାଃ ହଡ୍‌କଆଃ ବୁଗିନ୍
 ନାଗେନ୍ତେ ଆତଃ ଇନ୍‌କୁଆଃ ବିଶ୍ୱାସ୍‌କେ କେଟେଜେ ନାଗେନ୍ତେ
 ଇନ୍‌କୁକେ ସୁକୁରେ ଦହ ଲାଗାତିଙ୍ଗ୍‌ୟାଃ । ୩ ଖ୍ରୀଷ୍ଟ୍ ଆୟାଃ ଆପ୍‌ନାଃ
 ସୁକୁ ନାଗେନ୍ତେ ଜେଡ୍‌ନାଃ କାଏ କାମି ତାଇକେନା, ମେନ୍‌ଦ
 ଧାରାମ୍‌ପୁଥିରେ ଅଲକାନା, “ଇନ୍‌କୁ ଆମ୍‌କେ ଲାୟାକେଦ୍‌ମେୟାକ,
 ଏନା ଆଇଙ୍ଗ୍ ସାହାତିଙ୍ଗ୍‌ତାନା ।” ୪ ଧାରାମ୍‌ପୁଥିରେୟାଃ
 ସବେନ୍ ଇନିତୁ ଆବୁଆଃ ବୁଗିନାଃ ନାଗେନ୍ତେ ତାନାଃ, ଆସ୍ତାରେ
 ତିଙ୍ଗ୍‌କେଟେୟାଃ ନାଗେନ୍ତେ ଧାରାମ୍‌ପୁଥି ଆବୁକେ ଧୂରାଜ୍ ଆତଃ
 ଜୀଉରାଡ଼େଃ ଏମାଃଏ । ୫ ଖ୍ରୀଷ୍ଟ୍ ଯୀଶୁଆଃ ନାମ୍‌ନାରେୟାଃ
 ଅତଙ୍ଗ୍‌ତାନ୍‌କ ହବାଅଃ ନାଗେନ୍ତେ ଆପେ ସବେନ୍‌କଆଃ ମନ୍ ଆତଃ
 ଉଡ଼ୁ ଏନ୍ ଲେକାଗି ହବାଅଃ ନାଗେନ୍ତେ ଧୂରାଜ୍ ଆତଃ ଜୀଉରାଡ଼େଃ

ଏମାରୁତାନ୍ ପାର୍ମେଶ୍ୱାର୍ ଆପେକେ ଦେଖାପେକାଏ । ୭ ଆପେ ସବେନ୍ କ ନିସାତେ ନିଦ୍ ଲାବ୍ ଜାଲଃ ଆପୁ ପାର୍ମେଶ୍ୱାର୍ ଆତଃ ଆରୁଆଃ ପ୍ରାଭୁ ଯୀଶୁ ଖ୍ରୀଷ୍ଟୁଆଃ ମାନାରାଜ୍ ରିକାଏପେ ।

ଯିହୁଦୀ ହଡକ ଆତଃ ସାଅଁସାର୍ ହଡକ ନାଗେନ୍ତେ ସୁକୁକାଜି

୭ ଏନାମେନ୍ତେ ଖ୍ରୀଷ୍ଟୁ ଜେ'ଲେକା ଆପେକେ ଦାରମ୍ କାଦ୍ ପେୟା, ପାର୍ମେଶ୍ୱାର୍ ଆଃ ମାଇନାନ୍ ନାଗେନ୍ତେ ଆପେୟ ଏନ୍ ଲେକାଗି ନିହୁଡ୍, ଆତଃ ନିହୁଡକକେ ଦାରମ୍ କପେ । ୮ ତିଆଃତି ଖ୍ରୀଷ୍ଟୁଆଃ ସୁସାର୍ରେୟାଃ ଜୀଦାନ୍ ଖାଡନାଅକାନ୍ ଯିହୁଦୀ ହଡକ ନାଜ୍ ତାଇକେନା । ଇନ୍ କୁକେ ଇନିଃ ଦେଖାଅକ ନାଜ୍ ସାନାଜ୍ ତାଇକେନାଏ ଯେ ପାର୍ମେଶ୍ୱାର୍ ପାତିୟାର୍ରେ ଲେକାନ୍ନିଃ ତାନିଃ । ଯିହୁଦୀ ହଡକଆଃ ପୁରଖା ହାଡାମ୍ କକେ ଏମାକାଦକ ଆୟାଃ ବାନାର୍ ସା ସବେନାଃକେ ଖ୍ରୀଷ୍ଟୁ ମାନାତିୟେଆଏ । ୯ ଆତଃ ସାଅଁସାର୍ ହଡକ ପାର୍ମେଶ୍ୱାର୍ ଆଃ ଲିନିବୁଇ ନାଗେନ୍ତେ ଇନିୟାଃ ମାନାରାଜ୍ ରିକା ଦାଡିୟାଃକ । ଧାରାମ୍ ପୁଅଁରେ ଅଲକାନ୍,

“ଏନାମେନ୍ତେ ଆଇଜ୍ ସାଅଁସାର୍ ହଡକଆଃ ଆଲାରେ ଆମାଃ ମାନାରାଜ୍ ରିକାୟାଜ୍,

ସବେନ୍ ଇମ୍ତା ଆମାଃ ମାନାରାଜ୍ ଦୁରାଜ୍ ଯେଁଇଜ୍ ।”

୧୦ ଆତଃତି ଧାରାମ୍ ପୁଅଁରେ ଅଲକାନା,

“ସାଅଁସାର୍ ହଡକ ପାର୍ମେଶ୍ୱାର୍ ଆଃ ହଡକଲଃ ରାସ୍ କାଅଃକାକ ।”

୧୧ ଆତଃତି,

“ସବେନ୍ ସାଅଁସାର୍ ହଡକ ପ୍ରାଭୁଆଃ ମାନାରାଜ୍ ରିକାଏକାକ ।

ଆତଃ ସବେନ୍ ହଡକ ଇନିୟାଃ ମାନାରାଜ୍ ରିକାଏକାକ ।”

୧୨ ଆତଃତି, ଯିଶାୟ କାଜିକାଦା,

“ଯିଶିଆଃ କିଲିରେନ୍ ନିହୁଡ୍ ଉନ୍ନୁଦୁବଃଆଏ,

ଇନିଃ ସାଅଁସାର୍ ହଡକକେ ରାଇଜକଆ

ଆତଃ ଇନ୍ କୁ ଇନିଃତାଃରେକ ଆସ୍ରାଏୟା ।”

୧୩ ପାର୍ମେଶ୍ୱାର୍ ସବେନ୍ ଆସ୍ରାରେନ୍ ଭାଣ୍ଡାର୍ ହବାଅଃକାଏ, ଆପେ ଇନିଃତାଃରେ ବିଶ୍ୱାସ୍ ତାନ୍ ହରାତେ ସବେନ୍ ରାସ୍ କା ଆତଃ ଜୀଉସୁକୁରେ ଇନିଃ ଆପେକେ ପେରେଃପେକା, ଜେ'ଲେକାତି ଆପେ

ପାବିତାର ଆତ୍ମାରାଃ ପେଡ଼େଃତେ ଆପେୟାଃ ଆସ୍ତା ହାରାଇଦିୟଃଆ
 ।

ସାଅଁସାର୍ ହଡ଼କତାଃରେ ପାଉଲୁସ୍‌ଆଃ କାମି

୧୪ ହେ ହାଗା ମିଶିକ, ଆଇଙ୍ଗ ବିଶ୍ୱାସ୍ ତାନାଇଙ୍ଗ୍ ଯେ ଆପେ ସବେନ୍‌କ ପୁରାଃ ବୁଗିନାଃତେ, ଆଡ଼ଃ ସବେନ୍ ସେଣ୍‌ନତେ ପେରେଜାକାନାପେ, ଆଡ଼ଃ ଆପେ ମିହୁଡ଼୍ ଆଡ଼ଃମିହୁଡ଼୍‌କେ ଇଡୁ ଦାଡ଼ିୟାଃପେ । ୧୫ ଏନ୍‌ରେୟ ଆଡ଼ଃମିସା ପାହାମ୍‌ରୁହାଡ଼େ ନାଗେନ୍ତେ ଆଇଙ୍ଗ୍ ଚିମିନ୍ ବିଷାଏକ ନେ ଚିଟାଉରେ ଅଲାଇକାଦ୍ ତାଇକେନାଇଙ୍ଗ୍, ପାର୍‌ମେଶ୍ୱାର୍‌ଆଃ ସାୟାଦ୍ ହରାତେ ଆଇଙ୍ଗ୍ ଜୀଉରେ କେଟେଦ୍ ନାମ୍‌କେଦ୍‌ତେ ନେ ସବେନାଃ ଆପେତାଃତେଇଙ୍ଗ୍ ଅଲ୍‌କେଦା । ୧୬ ଚିୟାଃତି ସାଅଁସାର୍ ହଡ଼କ ଜେ'ଲେକା ପାବିତାର୍ ଆମ୍‌ରାଃ ହରାତେ ପାବିତାର୍ କାମି ନାଙ୍ଗ୍ ଜିମାୟାନ୍‌ଲଃ ପାର୍‌ମେଶ୍ୱାର୍‌ଆଃ ଆୟାର୍‌ରେ ଦାନ୍ ରାକାବଃରେ ସୁକୁଆନ୍‌ଗିକ ହବାଅଃଆ, ଏନାମେନ୍ତେ ଆଇଙ୍ଗ୍ ଇନ୍‌କୁତାଃରେ ଖ୍ରୀଷ୍ଟ୍ ଯୀଶୁଆଃ ଦାସି ଲେକା ହବାକେଦ୍‌ତେ ପାର୍‌ମେଶ୍ୱାର୍‌ଆଃ ସୁକୁକାଜି ଉଦୁବ୍‌ରେ, ଆଇଙ୍ଗ୍ ଯାଜାକ୍ କାମି ଲେକାଇଙ୍ଗ୍ କାମିତାନା । ୧୭ ଖ୍ରୀଷ୍ଟ୍ ଯୀଶୁଲଃ ମେସାକେଦ୍‌ତେ ପାର୍‌ମେଶ୍ୱାର୍‌ଆଃ ନାଗେନ୍ତେ ନେ ସେଝାକାମି ରିକାତାନ୍ ହରାତେ ଆଇଙ୍ଗ୍ ଆପାନ୍‌କେ ମାରାଙ୍ଗ୍ ମେନ୍ତେଇଙ୍ଗ୍ କାଜିନ୍‌ତାନା । ୧୮ ସାଅଁସାର୍ ହଡ଼କ ପାର୍‌ମେଶ୍ୱାର୍‌ଆଃ କାଜି ଆୟୁମେକାକ ମେନ୍ତେ ଖ୍ରୀଷ୍ଟ୍ ଆଇଁୟାଃ ହରାତେ ତିନାଃଏ କାମିକାଦା, ଏନା ଏସ୍‌କାର୍ କାଜି ନାଗେନ୍ତେ ଆଇଙ୍ଗ୍ ଜୀଉରେ କେଟେଦ୍ ନାମାକାଦାଇଙ୍ଗ୍ । ୧୯ ଇନିଃ ବାଚାନ୍‌ତେ ଆଡ଼ଃ କାମିତେ ଆକ୍‌ଦାନ୍‌ଆ କାମିରାଃ ପେଡ଼େଃତେ ଆଡ଼ଃ ଆକ୍‌ଚାକାଅତେ, ଆଡ଼ଃ ପାର୍‌ମେଶ୍ୱାର୍‌ଆଃ ପାବିତାର୍ ଆମ୍‌ରାଃ ପେଡ଼େଃତେ ନେ ସବେନାଃଏ କାମିକାଦା । ଏନାତେ ଆଇଙ୍ଗ୍ ଯୀରୁଶାଲେମ୍‌ତାଃଏତେ ଇଲିରିକମ୍‌ତେ ହରାସେନ୍ ଇମ୍‌ତା ହରାରେ ଖ୍ରୀଷ୍ଟ୍‌ଆଃ ସୁକୁକାଜି ପୁରାଃଗିଇଙ୍ଗ୍ ଉଦୁବ୍‌କାଦା । ୨୦ ଅକ ଠାୟାଦ୍‌କରେନ୍ ହଡ଼କ ଖ୍ରୀଷ୍ଟ୍‌ଆଃ ସୁକୁକାଜିକେ କାକ ଆୟୁମାକାଦା, ଏନ୍ତାଃରେ ନେ ସୁକୁକାଜିକେ ଉଦୁବ୍ ନାଙ୍ଗ୍ ଆଇଙ୍ଗ୍ ସାନାଙ୍ଗ୍‌କେଦାଇଙ୍ଗ୍, ଚିଆଃତି ଏଟାଃ ହଡ଼କଆଃ ହରାତେ ଏନେଟେଦ୍‌କାନ୍ ନିହ୍ ଗାତାରେ

କାମିୟାକାନ୍ କାମିକେ ଆଇଙ୍ଗ୍ ଆଡ଼ଃମିସା କାମି ନାଙ୍ଗ୍ କାଇଙ୍ଗ୍ ସାନାଙ୍ଗ୍‌ତାନା । ୨୧ ଧାରାମ୍‌ପୁଅରେ ନେ'ଲେକା ଅଲାନାନା,
 “ଅକନ୍ ହଡ଼କକେ ଇନିୟାଃ ବିଷାଏରେ କା କାଜିକାନ୍ ତାଇକେନା,
 ଇନ୍‌କୁ ଇନିଃକେକ ନେଲିୟା
 ଆଡ଼ଃ ଅକନ୍ ହଡ଼କ ଇନିୟାଃ ବିଷାଏରେ କାକ ଆୟୁମାକାଦ୍
 ତାଇକେନା, ଇନ୍‌କୁ ଆୟୁମେଆକ ।”*

ରୋମ୍ ନାଗାରତେ ସେନଃନାଙ୍ଗ୍ ପାଉଲୁସଆଃ ଉହାବ୍

୨୨ ✠ଏନାମେନ୍ତେ ଆଇଙ୍ଗ୍‌କେ ଆପେତାଃତେ ସେନ୍ ନାଗେନ୍ତେ ପୁରାଃସାଃ କାଜିକଟଙ୍ଗ୍ ନାମାକାଦାଇଙ୍ଗ୍ । ୨୩ ମେନ୍‌ଦ ନେ ପାର୍‌ଗାନ୍‌କରେ ଆଇଁୟାଃ କାମିକ ପୁରାୟାନା ଆଡ଼ଃ ଆପେକେ ନେନେଲ୍ ନାଗେନ୍ତେ ପୁରାଃ ବାରାଷ୍‌ରେୟାଃ ଆସ୍ତା ନାହାଁଃଦ ପୁରାଅଃଆ । ୨୪ ଆଇଙ୍ଗ୍ ସ୍ତେନ୍‌ତେ ସେନଃ ହରାରେ ଆପେଲଃ ନେପେଲ୍‌କେଦ୍‌ତେଇଙ୍ଗ୍ ହିନ୍ତୁଃଆ ମେନ୍ତେଇଙ୍ଗ୍ ଉଡ଼ଃକାଦା । ଆପେତାଃରେ ଘାଡ଼ିକାଦ୍ ତାଇକ୍‌କେଦ୍‌ତେ ସ୍ତେନ୍‌ତେ ସେନଃ ନାଙ୍ଗ୍ ଦେଙ୍ଗାଈୟାଃପେ ମେନ୍ତେଇଙ୍ଗ୍ ଆସ୍ତାତାନା । ୨୫ ✠ମେନ୍‌ଦ ନାହାଁଃ ଆଇଙ୍ଗ୍ ପାର୍‌ମେଶ୍‌ବାର୍‌ଆଃ ହଡ଼କଆଃ ସୁସାର୍ ନାଗେନ୍ତେ ଯୀରୁଶାଲେମ୍‌ତେ ସେନଃ ନାଗେନ୍ତେଇଙ୍ଗ୍ ଅତଙ୍ଗ୍‌ଆଁକାନା । ୨୬ ଚିଆଃଚି ଯୀରୁଶାଲେମ୍‌ରେ ପାର୍‌ମେଶ୍‌ବାର୍‌ଆଃ ହଡ଼କ ଜାଞ୍ଜିଆକାନାକ, ଇନ୍‌କୁଆଃ ନାଙ୍ଗ୍ ଦାନ୍ ଏମ୍‌କେଦ୍‌ତେ ଦେଙ୍ଗାକ ନାଗେନ୍ତେ ମାକିଦନିଆ ଆଡ଼ଃ ଆଖାୟାରାଃ କାଲିସିୟାରେନ୍ ହଡ଼କ ଉହାବ୍‌କାଦାକ । ୨୭ ✠ନେଆଁଦ ଇନ୍‌କୁ ଆପ୍‌ନାଃ ଇଛାସାନାଙ୍ଗ୍‌ତେ ଉହାବ୍‌କାଦାକ, ମେନ୍‌ଦ ଇନ୍‌କୁ ସାଅଁସାର୍ ହଡ଼କଆଃ ଆୟାରରେ ହରି ରିଣୀକାନାକ, ଚିଆଃଚି ଯିହୁଦୀ ହଡ଼କ ଆକଆଃ ଆପ୍‌ନାଃ ଆମିକ୍‌ରେୟାଃ ଆଗିଷ୍‌ରେ ସାଅଁସାର୍ ହଡ଼କକେ ହିସା ଏମାକାଦ୍‌କ ହରାତେ, ସାଅଁସାର୍ ହଡ଼କ ଆପ୍‌ନାଃ ଟାକା ପାଏସାରେ ହିସା ଏମ୍‌କେଦ୍‌ତେ ଯିହୁଦୀ ହଡ଼କକେ ଦେଙ୍ଗା ଏମ୍ ଲାଗାଡିଙ୍ଗ୍‌ୟାଃ । ୨୮ ଯୀରୁଶାଲେମ୍‌ରେ ଏନ୍ ଦାନ୍‌କେ ଏମ୍‌କେଦ୍‌ତେ ଆଇଁୟାଃ କାମି ଚାବାକେଦ୍ ତାୟମ୍‌ତେ, ଆଇଙ୍ଗ୍ ସ୍ତେନ୍‌ତେ ସେନଃନାଙ୍ଗ୍

* ୧୫:୨୧ ୧୫:୨୧ ଯିଶାୟା ୫୩:୧୫ ✠ ୧୫:୨୨ ୧୫:୨୨ ରୋମି ୧:୧୩. ✠ ୧୫:୨୫ ୧୫:୨୫ ୧ କରିନ୍ଥ୍‌ୟ ୧୬:୧-୪. ✠ ୧୫:୨୭ ୧୫:୨୭ ୧ କରିନ୍ଥ୍‌ୟ ୯:୧୧.

ଅତଃ ଅଧିକାରୀ ଆତ୍ମା ସେନ୍ଦ୍ରରେ ଆପେଲିଃ ନେପେଲି କେଦତେଇଲ୍ ହିନ୍ଦୁଆ । ୨୯ ଆଇଲ୍ ସାରିକାଦାଇଲ୍, ଆଇଲ୍ ଶ୍ରୀଷ୍ଟିତାଃଏତେ ପୁରାଃ ଆଶିଷ୍ ଆଉକେଦତେ ଆପେତାଃତେଇଲ୍ ହିନ୍ଦୁଆ । ୩୦ ହେ ହାଗା ମିଶିକ, ପ୍ରାଭୁ ଯୀଶୁ ଶ୍ରୀଷ୍ଟିଆଃ ନୁତୁମ୍ତେ ଆତ୍ମା ପାବିତାର୍ ଆମ୍ବା ଏମାକାଦ୍ ଦୁଲ୍ଲାଡ୍ ହରାତେ ଆଇଲ୍ ଆପେକେଇଲ୍ ବିକ୍ରିପେ ତାନା, ଆଇଲ୍ ନାଗେନ୍ତେ ପାର୍ମେଶ୍ଵାର୍ତାଃରେ ପୁରାଃ ଇକ୍ଷାସାନାଲ୍ତେ ବିକ୍ରିପେ । ୩୧ ଆଇଲ୍ ଯିହୁଦା ପାର୍ମେଶ୍ଵାର୍ତାଃରେ କା ବିଶ୍ଵାସ୍ତାନ୍ ହତ୍ତକତାଃଏତେ ଜେ'ଲେକା ବାଞ୍ଛାଅକେଦତେ ତାଇନ୍ ଦାଡ଼ିୟାଲ୍ ଆତ୍ମା ଯୀରୁଶାଲେମ୍ରେ ତାଇନ୍ତାନ୍ ପାର୍ମେଶ୍ଵାର୍ତାଃ ହତ୍ତକ ଜେ'ଲେକା ଆଇଲ୍ କାମିକେ ସୁକୁଆକ ଏନାମେନ୍ତେ ବିକ୍ରିପେ । ୩୨ ପାର୍ମେଶ୍ଵାର୍ତାଃ ଇକ୍ଷାସାନାଲ୍ ହବାଅଃରେଦ, ଆଇଲ୍ ଆପେତାଃତେ ରାସ୍କାତେଇଲ୍ ହିନ୍ଦୁଆ ଆତ୍ମା ଆପେଲିଃ ଘାଡ଼ିକାଦ୍ ତାଇନ୍କେଦତେ ରାସ୍କାଲ୍ ନାମେୟା । ୩୩ ଆବୁକେ ଜୀଉସୁକୁ ଏମ୍ତାନ୍ ପାର୍ମେଶ୍ଵାର୍ ଆପେ ସବେନ୍କଲିଃ ତାଇନିଃକାଏ । ଆମେନ୍ ।

୧୭

ପାଉଲୁସ୍ ଆଃ ଜହାର୍ ତାଏ ଇଶୁସାଏ

୧ କେକ୍ଲେୟା ନାଗାର୍ରେୟାଃ କାଲିସିୟାରେନ୍ ମିହୁଡ୍ ସୁସାର୍ତାନ୍ ଆବୁଆଃ ମିଶି ଫେବିକେ ଆପେତାଃତେଇଲ୍ କୁଲିତାନା, ୨ ଇନିଃକେ ପାର୍ମେଶ୍ଵାର୍ତାଃ ହତ୍ତକ ଲେକା ପ୍ରାଭୁଆଃ ନୁତୁମ୍ତେ ଦାରମିପେ । ଇନିୟାଃ ଲାଗାଡ଼ିକ୍ତେୟାଃକ ଆପେତାଃଏତେ ଏମ୍କେଦତେ ଇନିଃକେ ଦେଙ୍ଗାଲପେ । ଇନିଃ ଆଇଲ୍କେ ଆତ୍ମା ଏତାଃ ପୁରାଃ ହତ୍ତକକେ ପୁରାଃଗି ଦେଙ୍ଗାକାଦ୍କଆ ।

୩ ✠ ଶ୍ରୀଷ୍ଟି ଯୀଶୁ ଆଃ ସେଝାରେ ଆଇଲ୍ ଲାଃଲିଃ ଗାଡ଼ିରେ କାମିତାନ୍ ପ୍ରିସ୍କିଲା ଆତ୍ମା ଆକ୍ଲିଲ୍ଲାକେ ଆଇଲ୍ ଜହାର୍ ଉଦୁବାକିନ୍ପେ । ୪ ଇନିକିନ୍ ଆଇଲ୍ ଜୀଉ ବାଞ୍ଛାଅ ନାଗେନ୍ତେ ଆକିନାଃ ଜୀଉକେ ଏମ୍ ନାଗେନ୍ତେ ସାନାଲ୍କାଦ୍ ତାଇକେନାକିନ୍ । ଆଇଲ୍ ଏସ୍କାର୍ କାହାଗି, ମେନ୍ଦ୍ ସବେନ୍ ସାଅଁସାର୍ ହତ୍ତକଆଃ କାଲିସିୟାରେନ୍

✠ ୧୬:୩ ୧୬:୩ ପ୍ରେରିଡ୍ ୧୮:୨.

ହତକ ଇନ୍ଦ୍ରିୟାଃ ଧ୍ୟାନବାଦ୍ ଏମ୍‌ତାନାକ ।^୫ ଇନ୍ଦ୍ରିୟାଃ ଅତୀତରେ ହୁଣ୍ଡିଅତାନ କାଲିସିୟାରେନ୍ ହତକକେୟଗି ଜହାର୍ ମେନ୍ତେଇଙ୍ଗ୍ କାଜିକତାନା । ଆଇଁୟାଃ ଦୁଲ୍ଲାଡ୍ ଗାତି ଏପାଇନେତୁସ୍‌କେ ଆଇଁୟାଃ ଜହାର୍ ଉଦୁବାଇପେ । ଏସିଆ ପାର୍ଗାନ୍‌ରେ ଇନ୍ଦ୍ରିୟ ହବାଅତାନାଏ ପାହିଲା ଶ୍ରୀଷ୍ଟ ବିଶ୍ୱାସୀ ।^୬ ଆପେ ନାଗେନ୍ତେ ପୁରାଃଗି କାମିକାଦ୍ ମାରିୟାମ୍‌କେ ଆଇଁୟାଃ ଜହାର୍ ଉଦୁବାଇପେ ।^୭ ଆନ୍ଦ୍ରିକସ୍ ଆତଃ ଯୁନିୟାକେ ଆଇଁୟାଃ ଜହାର୍ କାଜିୟାକିନ୍‌ପେ । ନେ ବାରାନ୍‌କିନ୍ ଯିହୁଦୀ ତାନକିନ୍ ଆତଃ ଆଇଁୟାଃଲଃ ଜେହେଲ୍‌ରେକିନ୍ ତାଇକେନା । ଆଇଁୟାଃଏତେ ସିଦାରେ ଇନ୍ଦ୍ରିୟ ଶ୍ରୀଷ୍ଟକେ ବିଶ୍ୱାସକାଇ ତାଇକେନାକିନ୍ ଆତଃ କୁଲ୍‌କାନ୍‌କ ଇନ୍ଦ୍ରିୟକେ ବୁଗିଲେକା ସାରିକାଦ୍‌କିନାକ ।

୮ ପ୍ରାଭୁତାଃରେ ଆଇଁୟାଃ ଦୁଲ୍ଲାଡ୍ ଗାତି ଆମ୍‌ସିୟାତୁସ୍‌କେ ଜହାର୍ ଉଦୁବାଇପେ ।^୯ ଶ୍ରୀଷ୍ଟିଆଃ ସେଝାରେ ଆଇଁୟାଃଲଃ ମିସାତେ କାମିତାନ୍ ଉର୍ବାନସ୍‌କେ ଆତଃ ଆଇଁୟାଃ ଦୁଲ୍ଲାଡ୍ ଗାତି ସ୍ତାଖ୍‌ୟକେ ହଗି ଜହାର୍ ଉଦୁବାକିନ୍‌ପେ ।^{୧୦} ଶ୍ରୀଷ୍ଟିଆଃ ସେଝାରେ ମାଇନ୍ ନାମେନିଃ, ଆପେଲସ୍‌କେ ଆଇଁୟାଃ ଜହାର୍ ଉଦୁବାଇପେ, ଆତଃ ଆରିସ୍ତୁକୁଲ୍‌ଆଃ ଅତୀତରେନ୍ ସବେନ୍‌କକେ ଆଇଁୟାଃ ଜହାର୍ ଉଦୁବାକପେ ।^{୧୧} ଆଇଁୟାଃ ଆପନାଃ ହତକ ଯିହୁଦୀ, ହେରୋଦିୟାରେନ୍ ହତକ ଆତଃ ନାକ୍‌ସ୍‌ଆଃ ଅତୀତରେନ୍ ପ୍ରାଭୁଆଃ ବିଶ୍ୱାସୀ ହାଗା ମିଶିକକେହଗି ଆଇଁୟାଃ ଜହାର୍ ଉଦୁବାକପେ ।

^{୧୨} ପ୍ରାଭୁଆଃ ସେଝାରେ ତାଇନତାନ୍ ତ୍ରିଫେନା ଆତଃ ତ୍ରିଫୋସା ଆତଃ ପ୍ରାଭୁଆଃ ନାଗେନ୍ତେ ପୁରାଃଗି କାମିତାନ୍ ଦୁଲ୍ଲାଡ୍ ପର୍ଗିସ୍, ନେ ସବେନ୍‌କକେ ଆଇଁୟାଃ ଜହାର୍ ଉଦୁବାକପେ ।^{୧୩} *ପ୍ରାଭୁଆଃ ସାଲାକାନ୍ ଦାସି ରୁଫସ୍ ଆତଃ ଇନ୍ଦ୍ରିୟାଃ ଏଙ୍ଗାତେକେ ଆଇଁୟାଃ ଜହାର୍ ଉଦୁବାକିନ୍‌ପେ, ଇନ୍ଦ୍ରିୟଗି ଆଇଁୟାଃ ଏଙ୍ଗା ଲେକାଃଏ ।^{୧୪} ଆସୁଲ୍‌ଡ୍, ଦ୍ୱେଗୋନ୍, ହର୍ମିସ୍, ପାତ୍ରବାସ୍, ହାର୍‌ମେସ୍ ଆତଃ ଇନ୍‌କୁଲଃ ତାଇନ୍‌ତାନ୍ ଏଟାଃ ସବେନ୍ ଶ୍ରୀଷ୍ଟିୟାନ୍ ହାଗାକକେ

☆ ୧୭:୧୩ ୧୭:୧୩ ମାର୍କ ୧୫:୨୧.

ଆତ୍ମା ମିଶିକକେ ଆଇଁୟାଃ ଜହାର ଉଦୁବାକପେ । ୧୫ ଫିଲ୍ଲଗ୍ ଆତ୍ମା ଜୁଲିୟା, ନିରୁସ୍ ଆତ୍ମା ଇନିୟାଃ ମିଶି, ଆତ୍ମା ଅଲ୍ଲୁମ୍ ଆତ୍ମା ଇନିକୁଲଃ ତାଇନ୍ତାନ୍ ସବେନ୍ ପାରମେଶ୍ଵାର୍ ଆଃ ହଡକକେ ଆଇଁୟାଃ ଜହାର ଉଦୁବାକପେ । ୧୬ ଖ୍ରୀଷ୍ଟ ଦୁଲ୍ଲାଡ୍ତେ ମିହୁଡ୍ ଆତ୍ମାମିହୁଡ୍ଲଃ ଜହାରଃପେ । ଖ୍ରୀଷ୍ଟ ଆଃ ସବେନ୍ କାଲିସିୟା ଆପେକେ ଜହାର ମେନ୍ତେକ କାଜିକୁଲ୍କାଦା ।

ପାଉଲୁସଆଃ ଚୁଣ୍ଡୁ ଇନିତୁ

୧୭ ହେ ହାଗା ମିଶିକ, ଆଇଙ୍ଗ୍ ଆପେକେଇଙ୍ଗ୍ ବିନ୍ତିପେ ତାନା, ଅକ ହଡକ ଆପେୟାଃ ବିଶ୍ଵାସକେ କାଜିକଟଙ୍ଗ୍ ନାଗେନ୍ତେକ ସାନାଙ୍ଗ୍ତାନା ଆତ୍ମା ତହଦଃ ଲେକାନ୍ କାମିକ ରିକାଏୟାଃ ଏନ୍ ଲେକାନ୍ ହଡକତାଃଏତେ ଚିର୍ଗାଲ୍ଲକାନ୍ ତାଇନ୍ତେ । ନେଲେକାନ୍ ହଡକ, ଆପେ ଅକ ଇନିତୁପେ ନାମାକାଦା, ଏନାରେୟାଃ ବିରୁଧ୍ରେକ ସେନାଃ । ଇନିକୁତାଃଏତେ ସାଜିନ୍ରେ ତାଇନ୍ତେ । ୧୮ ଚିୟାଃଚି ନେ ହଡକଦ ଆବୁଆଃ ଖ୍ରୀଷ୍ଟ ପ୍ରାଭୁକେ କାକ ସେଝାଃଆ, ମେନ୍ଦ ଇନିକୁ ଆକଆଃ ଆପ୍ନାଃ ସୁକୁ ନାଗେନ୍ତେକ କାମିୟାଃ । ଇନିକୁ ଲେବେୟାନ୍ କାଜିତେ ଆତ୍ମା ସୁଗାଡାନ୍ କାଜି ଜାଗାରକେଦ୍ତେ ହଡକଆଃ ମନ୍ଦକେ ବେଦାଃକ । ୧୯ ମେନ୍ଦ ସୁକୁକାଜି ନାଗେନ୍ତେ ଆପେୟାଃ ପାତିୟାରରଃ ଲେକାନ୍ କାଜିକେ ସବେନ୍ ହଡକ ସାରିକାଦାକ, ଏନାମେନ୍ତେ ଆଇଙ୍ଗ୍ ପୁରାଃଗିଇଙ୍ଗ୍ ରାସକାଅଃତାନା । ଆଇଙ୍ଗ୍ ସାନାଙ୍ଗ୍ତାନାଇଙ୍ଗ୍, ଆପେ ସବେନ୍କ ଚୁଗିନ୍ କାଜିକରେ ସେଣ୍ଟାନ୍ତେ ଆତ୍ମା ଏଡକାନ୍ କାଜିକଏତେ ସାଜିନ୍ତେ । ୨୦ ଏନ୍ରେଦ, ଜୀଉସୁକୁ ଏମ୍ତାନ୍ ପାରମେଶ୍ଵାର୍ ଜାଲ୍ଦିଗି ସାଏତାନ୍କେ ଆପେୟାଃ କାଟା ସୁବାରେ ରେସେଦିୟା । ଆବୁଆଃ ପ୍ରାଭୁ ଯୀଶୁଆଃ ସାୟାଦ୍ ଆପେଲଃ ହବାଅଃକା ।*

୨୧ ✠ଆଇଁୟାଃଲଃ କାମିତାନ୍ ତାମଥ୍ ଆତ୍ମା ଆବୁଆଃ ଯିହୁଦୀ ହାଗାକ, ଲୁକିୟ, ଯାସୋନ୍, ଆତ୍ମା ସୋସିପାତ୍ର ଆପେ ସବେନ୍କକେ ଜହାର ମେନ୍ତେକ କାଜିକୁଲ୍କାଦା ।

* ୧୭:୨୦ 16:20 ନେ ବାଚାନ୍ ଚିମିନ୍ ମାରି ଅନଲ୍ଲକରେ ବାନ୍ଧଆ ✠ ୧୭:୨୧ ୧୭:୨୧ ପ୍ରେରିଡ୍ ୧୭:୧.

୨୨ ଆଇଙ୍ଗ୍ ତଉଁୟସ୍, ପାଉଲୁସ୍‌ଆଃ ନାଗେନ୍ତେ ନେ ଚିଟାଉ ଅଲ୍‌କୁଲ୍‌କେଦ୍‌ତେ ପ୍ରାଭୁଆଃ ନୁତୁମ୍‌ରେ ଆପେକେଇଙ୍ଗ୍ ଜହାରପେତାନା ।

୨୩ ☆ଆଇଙ୍ଗ୍‌କେ ସୁସାରକାଦିଙ୍ଗ୍ ଗାୟସ୍, ଅକଏୟାଃ ଅଡ଼ାଃରେଚି କାଲିସିୟାରେନ୍ ପୁରା ହଡକ ହୁଣ୍ଟିୟଃତାନା ଆଡ଼ଃ ନେ ସାହାରରେନ୍ ଖାଜାନଚି ଏରାଷ୍ଟ୍ର ଆଡ଼ଃ କ୍ପାରତୁସ୍ ନୁତୁମ୍ ହାଗାହଗି ଆପେକେ ଜହାର ମେନ୍ତେ କାଜିକୁଲ୍‌କାଦା । ୨୪ ଆବୁଆଃ ପ୍ରାଭୁ ଯୀଶୁ ଖ୍ରୀଷ୍ଟ୍‌ଆଃ ସାୟାଦ୍ ଆପେ ସବେନ୍‌କଲଃ ହବାଅଃକା ।†

ବିକ୍ରି ଆଡ଼ଃ ମାନାରାଙ୍ଗ୍‌ଲଃ ଚିଟାଉରାଃ ଚୁଣ୍ଟୁ

୨୫ ହିନ୍ଦୁଃପେ, ପାରମେଶ୍ୱାର୍‌ଆଃ ମାନାରାଙ୍ଗ୍‌ରୁ ରିକାୟା, ଆଇଙ୍ଗ୍ ଉଦୁବେତାନ୍ ଯୀଶୁ ଖ୍ରୀଷ୍ଟ୍‌ଆଃ ବିଷାଏରେୟାଃ ସୁକୁକାଜି ଲେକାତେ ଆଡ଼ଃ ଜାନାଅ ଜାନାଅହେତେ ଉକୁଆକାନ୍ ସାନାରୁଚି ଲେକାତେ ଆପେ ଆପେୟାଃ ବିଶ୍ୱାସରେ ତିଙ୍ଗୁକେଟେୟାଃ ଲେକା ଇନିଃ ଆପେକେ ବାଇ ଦାଡ଼ିୟାପେୟା । ୨୬ ମେନ୍‌ଦ ଏନ୍ ଉକୁଆକାନ୍ ସାନାରୁଚି ସବେନାଃ ନାବୀକଆଃ ଅନଲ୍ ହରାତେ ଉଦୁବାକାନା, ଆଡ଼ଃ ଏନାଦ ନାହାଁଃ ଜାନାଅ ଜାନାଅରେନ୍ ପାରମେଶ୍ୱାର୍‌ଆଃ ହରାତେ ସବେନ୍ ହଡକ ଥାଲାରେ ଉଦୁବଃତାନା । ନେଆଁ ହରାତେ ସବେନ୍‌କ ବିଶ୍ୱାସକେଦ୍‌ତେ ପାରମେଶ୍ୱାର୍‌ଆଃ କାଜି ମାନାତିଙ୍ଗ୍‌ତାନ୍ ହଡକ ହବା ଦାଡ଼ିୟଃଆ । ୨୭ ଯୀଶୁ ଖ୍ରୀଷ୍ଟ୍‌ଆଃ ହରାତେ ସବେନ୍ ସେଣାନ୍ ମିଆଁଦଗି ପାରମେଶ୍ୱାର୍‌ଆଃ ମାଇନାନ୍ ଜାନାଅ ଜାନାଅ ଜାକେଦ୍ ହବାଅଃକା । ଆମେନ୍ ।

☆ ୧୭:୨୩ ୧୭:୨୩ ପ୍ରେରିଡ୍ ୧୯:୨୯; ୧ କରିନ୍ଥ୍‌ୟ ୧:୧୪; ୨ ତିମଥ୍ ୪:୨୦. † ୧୭:୨୪ 16:24 ନେ ପଦ ଚିମିନ୍ ମାରି ଅନଲ୍‌କରେ ବାନଃଆ

ପାରମେଶ୍ଵରୀୟାଃ ଜୀନିଦ୍ ବାଚାନ୍
The New Testament in the Munda language of India:
ପାରମେଶ୍ଵରୀୟାଃ ଜୀନିଦ୍ ବାଚାନ୍

copyright © 2020 The Word for the World International

Language: ମୁଞ୍ଜା (Muṅḍa) (Munda)

Contributor: The Word for the World International

ପାରମେଶ୍ଵରୀୟାଃ ଜୀନିଦ୍ ବାଚାନ୍
ନାଞ୍ଜା ନିୟାମ୍ , 2020

The New Testament in Munda Language

The Word for the World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-13

PDF generated using Haiola and XeLaTeX on 22 Feb 2024 from source files dated 14 Apr 2023

903abb6b-97c3-582d-9df8-a6a8f2fce6d6